

बुरै आबैनि सल'



लक्ष्मीनाथ बेजबरुवा

बुरै आबैनि सल'

बुरै आबैनि सल'

गुबै लिरगिरि
लक्ष्मीनाथ बेजबरुवा
राव सोलाइग्रा
धीरेन्द्र नाथ बर'

दिहुनगिरि
गितुमणी प्रकाशन
बरमा : नलबारी
(आसाम)

"BURWI ABWINI SOLO" *Folk tales on Buri Air Sadhu,
Likhminath Bezbarua and Translated by Dharendra Nath Boro in Bodo
and Published by R.D. Kalita on behalf of the Gitumani Prakashan,
Barama, Nalbari, Assam. Rupees Thirty Only.*

Publisher :
R.D.Kalita
Gitumani Prakashan
Barama : Nalbari. 781 346

First Edition : 2000

C. Author

Cover Design & Illastration : *Tapan Bordoloi*

Price : *Rupees Thirty Only.*

Printed by :Gumur Printers
Dhirenpara. Ghy - 25

फोसावगिरिनि फनैसो

गोमोथाव ! खाफालनि रिफिनायाव गिबियावनो होबाय बिजाब गला । बरमा कलेजनि बर' बिजोनि फरायसाफोरा आनि बाथ्राखौ खोनासंग्रा जाबाय, बिजाब फरायनानै मोननाय गियान आरो गोजोननायनि सोमोन्दै आं बिसोरखौ बुंबाय । बिसोर बुडे- “असमीयाखौदि फरायनो रोड” । आं बुडे- “नाजा, असमिया रोड- इराजि फराय, हिन्दि, बांला फराय” । धिरेन, खर्गेस्वर, बिजय आरो कातिमोना फरायग्रा जाबाय । फरायनानै गोजोननाय मोननायनि बाथ्राखौ बिसोर बुजिमोननाय जाबाय । आं बुंबाय- “असमीया थुनलायनि मोजां मोजां बिजाबफोरखौ बर' रावसिम रावसोलाय । रावसोलायनाय थुनलायजों बर' थुनलायनि बाग्रिखौ गोखों खालाम- लोगोसे बै थुनलायनि गियानजों गुबै (मौलिक) बिजाबबो लिरनांगोन । धिरेना खामानिखौ मावबाय । “सेक्सपियेरनि सल' ” बिजाबखौ गिबियाव दिहुनबाय । नाथाय रां खामायनो हायाखै, आंबो-धीरेनाबो ।

बेखेबाव बे “बुरै आबैनि सल' ”खौ दिहुनबाय । बिजाबा बर' राव थुनलायनि फोथाराव फेल्लेबसे बिहोमा होनो हायोब्ला गोजोनगोन । रायजोफोरा धिरेनखौ थुलुंगा होथों जाहाते बियो इयुनाव मुंदांखा बिजाबफोर रावसोलायनो हाथों आरो आंबो गांनैसो मोजां बिजाब दिहुननो हायो ।

गोजोनथों
रनीधर कलिता
बरमा

रावसोलायगिरिनि फनैसो

बेजबरुवानि जोनोमा 1864 माइथायाव मुन्सि बेजबरुवानि नखं राव जायो। आसमीया राव आरो थुनलाइखौ गोदान आरो गोथार मुस्नि होनानै गोजौआव दैखांग्रा लिरगिरिफोरनि गेजेराव लक्ष्मीनाथ बेजबरुवायाबो सासे। बेजबरुवाया उन्दैनफ्रायनो आखुगोनां आरो गोसो गोथौ गथं मोन। कलिकतानि सिटि कलेजनिफ्राइ 1890 माइथायाव बि, ए, आनजादखौ उनश्रिना बिथाडा नं आव फैफिनो। बिनि उनाव एम, ए आरो आयेन फराइनो साननानै कलिकटानि रिपन कलेजाव मुं थिसं नहैंयो। बे समावनो आसामनि बै समनि सासे मुंदांखा बंफां खारबार खालामग्रा भलानाथ बरुवाखौ लोगोमोनो आरो उनाव बिथानि थुलुंगानायावनो आरोबाव फरायाबासिनो बंफां खारबार खालामनो लायो। साननैसोनि गेजेरावनो बिथाडा उरिष्यानि चम्बलपुराव थानानै सासे मुंदांखा असमीया बंफां फालांगि होननानै मिथिजायो। बिथाडाजे खारबारावलं मुंदांखा बेलं नडा, बिथाडा बयनिखुइबो बांसिन मुंदांखा जादों सासे मुंदांखा लिरगिरि महरैसो। जोनोम हादरनि गोजानाव थानानैब्लाबो बिथाडा जिरायनाय गैयाजासे गावनि बिमानि रावजों थुनलाइ सोरजिलांदोंमोन आरो गुबुनखौबो थुलुंगा होदोंमोन। बिथाडा लिरनाय गोबां बिजाबफोरनि गेजेराव खन्थाइ बिजाबा जादों- कदमकलि, थुनफावथाय बिजाबफोरा जादों- जयमति, चक्र ध्वज सिंह, बेलिमार, लिटिकाइ, नमल, पाचनि, चिकरपति, निकरपति, सुंदं सलं फोरा जादों- साधुकथार कुकि, सुरभि, जोनबिर सलं बाथा बिजाबा जादों बुढी आइर साधु, सलं माफोरा जादों- पदुमकुवरी, कूपावर बरुवा, काकतर टबला उभतनि, जिउखौरांफोरा जादों - दिनानाथ बेजबरुवा जीवन चरिट, श्रिशंकरदेव, माधवदेव आरो गोबां।

बुढी आइर साधु सलं बाथा बिजाबा बेजबरुवानि गांसे मुंदांखा सलं बाथा बिजाब। बेयाव गासै मोन-थामजि सलं बाथाफोर दं। गासैबो सलं बाथाफोरा फराइनो गोदै आरो खं हाबगोनां। मोनसे हारि आरो मोनफ्रोमबो हादरा गावबा-गाव राव थानायबादि सलं बाथाफोरबो दं। मोनसे हारिनि गोरों-गोरा, सोद्रोम-असोद्रोम, गियान-अगियानि गासैबो मानसिनो आगानफोरा जैरैबादि गावनि रावआव हुखोमोरजायै

जानानै थायो, गोजाम सलं बाथाफोराबो बेफोरबादिनो बै हारिनि गासैबो थाखोनि मानसिफोरनि आखल-आखु, आसार-खान्थि, साननाय-हनाय, मावनाय-दांनाय बाइदिफोरा खोमोरजायैबादि रोखा जानानै थायो ।

बेजबरुवाया राइज्जायनायाव जेरैबादि फेस्ला रावजों मानसिफोरखौ मिनिहोयोमोन बिदिनो बिथाड गावनि फेस्ला आरो गोथौ गोदै लिरनायजों जायखिजाया थाखोनि फराइग्राफोरखौ मिनिहोनो हायोमोन । बिथानि सलं फोरा गुबैयै मोननै रोखोमनि- मोनसेया जादों नेमखान्थि आरो बोसोन होनो हानाय सलं आरो गुबुन मोनसेया जादों फराइग्रा आरो खोनासंग्राफोरनि गोसोयाव रंजानाय होनो हानाय सलं । बिजाबा गोजाम जादोंब्लाबो नाथाय बिनि सलं फोरा गोजाम आरो बिदैगोयै जायाखै एमंखि बे बिजाबनि सलं फोरा दिनैसिमबो मानसिनि खुगा-खुगा बोहैबोनानै बांसिन गोथांसिनसो जानानै दं ।

बाइदि समाव नांगौबादि बोसोन आरो हेफाजाब होनायनि थाखाय मानगोनं आंनि फोरोंगुरु आरो लोगो बिथामोननोबो आंनि सिबिनाय आरो साबायखर बाउहरबाय । गिटुमुणी प्रकाशननि बिगोमा आर, दि, कलिता बिथाड आंखौ खेसेव-खेसेव बुंबाय थायामोनब्ला बे खामानियाव जानोबा जाफुंनाय नडमोन । बे मुंदांखा बिजाबखौ बरं बिजोंआव थोंजों राव सोलाइनायाव गोरोनथिया थाखालांगोन । थेवबो फराइग्रानि आखायाव दैखांना होनो नाजानानै गोजौआव मखं नाय दिहुनगिरिया साफायनानै दिहुननायनि थाखाय बिथानोबो आंनि गोरबोनि साबायखं र बाउहरबाय ।

धीरेन्द्र नाथ बरं

सल'नि मुं	बिलाइ
1. माउजि फिसाजोनि सल'	9
2. मोखा आरो सियाल	13
3. दाउखा दन्दा आरो सखा थुनि	17
4. सोलोगोरा सियाल	22
5. मोसा आरो खांखाइ	26
6. तेजिमला	36
7. बोराइ बुरै आरो सियाल	42
8. आइथें गोलाव	45
9. ना थ'फा	48
10. मिथिगोरें	51
11. सासे बोलोगोरा मानसि	56
12. सिला फिसाजोनि सल'	59
13. तुला आरो तेजा	68
14. हाजानाय गंनथंखौ खारै होना फांथे	82
15. तिखर आरो हायथु आब'	87
16. सम्पाबति	91
17. बावदा राजानि बिजिरनाय	99
18. पानेशै	102
19. बिजामादैनि सल'	107
20. खुखि खाना	110
21. एम्बुनि सल'	114
22. आफानि (बिफानि बिसिगि) सल'	117
23. लट्कन	120
24. माइनाव हिनजाव	124
25. सानै सोलोगोरा	127
26. कान्चनि	132
27. थायगिर राजखुंग्रि	140
28. सासे बिबार नेग्रा आरो फांसे बिबार बिफां	143
29. नोमोलिया फिसा	144
30. मासे सिंग्रा नानि सल'	146

माउजि फिसाजोनि सल'

मोनसे न'खराव मासे जोबोर अनजाथाव माउजि दंमोन । बियो गाभिनि जादोंमोन । बै न'खरनि हिनजावाबो थिग बे समावनो मोदोमाव दंमोन । माउजिया ना जानो गोसो जानायलाय न' बिगोमाजोखौ बुंबाय- “आंहा जोबोर ना जानो गोसो जादों ।” फिननायाव बिगोमाजोआ बुंबाय- “आयु हाबाब, नों नागिरै मायै लाबोनानै होफैबासो आं होनो हागौ, नडबालाय आं बबेनिफ्राय होनो ?” बेखौनो खोनानानै बै सानखालिनिफ्राय मावजिया गुबुननि न'निफ्राय खावनानै एबा थगायथसि खालामनानै सोलोजों नड बोलोजों जेरैखि जाया ना लाबोनानै न' बिगोमाजोनो होफैनो हमबाय । नाथाय फारसेथिं न'बिगोमाया सडै-खावै गावसोर मोदोमखिनिखौ जानानै माउजिनो हारा हाराखौल' होनो हमबाय । बिदिनो माउजिया सानफ्रोमबो ना लाबोनानैबो ना मोनजाया । माउजिया गोसोआव जोबोर दुखु मोनबाय । बिनिखायनो बियो बिगोमाजोखौ साव होनानै बुंबाय- “आंनि उदैआव जा दं बिनि उदैयाव थांथों आरो बिनि उदैआव जा दं बेयो आंनि उदैयाव फैथों ।” बिनि साननैसो उनाव थारैनो बिगोमाजोआ मानै माउजि फिसा जोनोम होबाय आरो माउजिया सानै हिनजावसा गथ' जोनोम होबाय । अनसि-अनसि खाडै-बायै माउजिया फिसाजो सानैखौ जेनथेन गिदिर गोलाव खालामबाय । फिसाजो सानैखौ दोननानै माउजिया सानफ्रोमबो ना, गायखेर नागिरनो बायजोआव ओंखारलाडे । हिनजावसा सानैया लासैनो बुजिमोननाय जाबाय, उनाव बिसोर सानसेखालि बिमाखौ बुंबाय- “आइ, नों जिदु गामियाव थांनायाव सोरबा नोंखौ बुथारना दोनो अब्ला जों माबोरै मोनथिनो आरो मा खालामनो ?” अब्ला बिमाया फांसे थुलुंसि बिफां आरो बिनि खाथियाव आवा गायखेर दोननानै बुंबाय- “जिदु आंखौ सोरबा बुथारो अब्ला बे थुलुंसि बिफाड ज्र'य सिरिगोन आरो गायखेरा गोसोम जालांगोन । अब्लानो नोंसोर आंखौ नागिरनानै थांनो नाला ।” बिनि साननै उनाव ब्रायनो थुलुंसि बिफाड ज्र'य

रानलांबाय आरो गायखेराबो सोमब्रोम जालांबाय। अब्ला हिनजावसा सानैया गाबै-गाबै आइया मा जाखो होनानै बिमाखौ नागिरनानै ओंखार लांबाय। बिसोर गोबाव सम थाबायलानाय उनाव बिनानावा दै गांनायलाय बिब'आ दै नागिरनानै मोनसे दैमा मोनहैबाय। मथावरियाव बिनानावखौ दोननानै बिब'आ दै लायनो ओंखारलांबाय। आजोलि सिख्लाया गाव दै लोनानै बिनानावनो दै लाबोनो नागिरनायावनो दैमानि दैया रानलांबाय आरो लोगो-लोगोनो दैनि राजखुंगुरा राव होनानै बुंबाय- “जिदु नों नोंनि आखाइनि गंखनखौ आंनो होयोब्लासो नों दै लानो हागोन।” बिनानावनिखुइ गंखनालाय मा गिदिर बाथ्रा, बेबादि सानना गंखनखौ होनानै बिब'आ दैखौ लाबोनायसै। बिनानावा दैखौ लोंखानानै बिब'खौ आरोबाव गंखनखौ लायफिननो थिनहरबाय। बेखेबाव बिब'आ दैआव ओंखारनाय लोगो-लोगोनो दैनि राजखुंगुरा बिखौ खावनानै लांखारबाय। बिब'खौ लांखारनायखौ नुनानै बिनानावा बोरियावनो जनानै बिखा सोवै-सोवै गाबनो हमबाय। बिनि दसे उनावनो सासे धोनि फालांगिरिया नावजों बे फाराव बे दैमाजोंनो फैबाय दंमोन। बे हारसिं महरगोसा सिख्लाखौ दैमा जिडव गाबूबाय थानाय नुनानै फालांगिरिया नावआव दैखांना लाना थांबाय। न' मोनहैनानै फालांगिरिया बिनि गासै बिसिफोरजों लोगोसे बिखौबो उनदै बिसि खालामनानै लाबाय। गोरलै बैसोनि उनदैसिन हिनजावखौ फालांगिरियाबो सिगांनि सानै बिसिनिखुइ बांसिन अननो हमबाय। हिंसाजों बिसोर सानैया बिखौ माबोरै हौवाजों गात्रि मोनजाहोनो हागोन बेनि राहाखौ साननो हमबाय। बियो गिबि फिसा जोनोम होनाय समाव, बिनि मेगन थाइनैखौ हिजों खाथेनानै, बियो मोनसे दिंखि रोमोन जोनोम होदों होननानै हौवासा गथ'खौ बिहारिफोरा दैआव फोजाव हरबाय। उननि खनसे जोनोम होगासेयावबो बियो बिदिनो थायसे जोगोनार जोनोम होदों होनना बिनि हौवासा गथ'खौ आगोलनिबादिनो दैआव फोजाव हरबावबाय। ओजोंहाय दैनि राजखुंगुरा बोनानै लानाय बिब'आ बै फोजावहरजानाय हौवासा सानैया बिनानावनि फिसाज्ला होनना मिथिनानै हौवासा सानैखौ खाडै-बायै गिदिर-गोलाव खालामबाय। फारसेथिं फालांगिरिया उन्दै हिनजावनि बेफोर बाथ्राया थार साननानै बिखौ सिथां-फाखि हिनजाव सानना न'निफ्राय होखारहरनानै गावनि न'खरनि खालायसिमाबारियाव गंसे फिसा देरा लुना होनानै बेयावनो थानो होबाय। बियो खेसेरबारिनि न'आवनो थानानै दुखुजों

दिन थांहोने हमबाय । सानसेखालि फालांगिरिया फालांगियाव ओंखारलानाय समाव दैन राजखुंगुरा बिनि नावखौ दै गेजेरावनो हमथानानै लाखिबाय । फालांगिरिया नावखौ बोखानो राहागोथे जानानै जोबोर आख'-फाख'आव गोग्लैनाय समावनो दै सिंनिफ्राय सोरबा राव होना नै बुंबाय- “नों मोनसे बराय आफाद खुंनो बिबान ला आरो माब्ला खुंनो हागोन थिराडै बुंनानै नौनि बाथा आरो लौथिखौ गारनानै गालां, अब्लासो नौनि नावआ उदां जागोन ।” फालांगिरिया राहा गोथे जानानै मोनसे गिदिर आफाद खुंनो बाथा होना नै गावनि बाथा आरो लाउथिखौ दैयाव गारनानै होनाय लोगो-लोगोनो नावआ उदां जागारबाय । ओजोहाय बिमायंआ बै हौवासा सानैखौ बिसोरनि बिमाया माउजिनि उदैआव जोनोम लानायनिफ्राय जागायनानै बिसोरखौ दैआव फोजाव हरनाय बैफोर गासैबो बाथाखौ फोरमायनानै खिन्थाबाय । बे गासैबो बाथाखौ बिसोरनि बिफाया लिंनाय जथुम्मायाव थांनानै राइजोफोरनि सिगाडव बुंनो थिनबाय । बिसोरो जथुम्मानि सानखालि बिफानि लाउथि आरो बाथाखौ लानानै फालांगिरिनि न'सिम थांनो हमबाय । गिबियावनो बिसोर खालायसिमा बारियाव थानाय बिमानि खाथियाव थांनानै बिखौ “आइ” सोमोन्दो लिंनानै दै लोनो बिबाय, बिसोरो गावखौ थामसा खालामदों साननानै बिमाया बुंबाय- “नोंसोर आंखौ मानो एदावनो फैदों, बै आफादाव गोबां मानसिफोर फैदों, थां बेयावनो जा मोनो जाहैथां ।” अब्ला बिसोरो गासैबो बाथाखौ बिमानि सिगाडव फोरमायना गावसोरनि गुबै सिनायथिखौ होबाय, आरो बेयावनो दान्दिसे जिरायना जथुम्मायाव थांबाय । जथुम्मायाव मानसिफोरा होंगो-दोंगो फैनानै जिरायनो हमदों, एसेयावनो खबर मोनबाय जे खालायसिमा बारियाव थानाय हिनजावनि न'आव जायै- लोडै सोरबा सानै मानसिया जथुम्मायाव जिराइफैदों । जेब्ला बे बाथाखौ बयबो राइजोफोरा मिथिजोबबाय अब्ला राइजोफोरनिफ्राय बिसार खालामनाय जाबाय जे मानसि सानैया जथुम्मानि गेजेराव ओंखारनानै गावसोरनि सिनायथिखौ होनांगौ । बाथाखौ खोनानाय लोगो-लोगोनो बिदा-फंबाइ सानैबो दुफुं सिखारना बुंनो हमबाय जे- “जों जेराव हाबना जिराइनानै फैदों बियो जौनि आइ ।” अब्ला राइजोफोरा फालांगिरिखौ बेनि सोमोन्दै मा मिथिगौ बुंनो थिनबाय नाथाय फालांगिरिया बेनि सोमोन्दै जेबो बुंनो हायासै । अब्ला राइजोफोरा बिसोरखौ बेनि सोमोन्दै गुवारै बुंनो थिननायाव, बिदा गिदिरा गासैबो राइजोफोरखौ गोसो

बुरै आबैनि सल'

होनानै खोनासंनो थिननानै गासैबो बाथ्राखौ राइजोफोरनो फिद-फिद फारसेनिफ्राय खिन्थाजोबबाय आरो फालांगिरिनि बाथा आरो लाउथिखौ राइजोफोरनि सिगाडव दिन्थिनानै गावसोरनि बाथ्राखौ नंगौ होनना फोरमान खालामना दिनथिबाय । फालांगिरिया हांमा गोलाव सुरनानै सारअन्थाइ गोग्लैनाय मानसिबादि जाबाय, आरो लाउथि आरो बाथाया गावनि नंगौ होननानै सिमान लाबाय । अब्ला बिहारि सानैनि गाज्जि सोलोनि सोमोन्दै बयबो राइजोफोरा मिथिनानै मोनबाय आरो फालांगिरिनि हिनजाव सानैखौ लिनं लाबोना बाथ्राखौ सोंनायाव बिसोर जेबो फिन होनो हायासै, राइजोफोरा जेबो दावराव-दावसि खालामाबासिनो जथुम्माखौ जाफुंसार होबाय । जथुम्मा जोबनाय उनाव फालांगिरिया हिनजाव सानैखौ लिनं लाबोनानै खोमा-गनथं हाख्लाबनानै बिसोरखौ न'निफ्राय होखार हरबाय आरो हौवासा सानैजों लोगोसे उनदै हिनजावखौबो न'आव लाबोफिनबाय । हौवासा सानैयाबो बिमा-बिफानि बिखा गेजेराव थानानै आलो-गोजोनै राइजो जानो हमबाय ।



मोखा आरो सियाल

मासे मोखा आरो मासे सियाल दंमोन। बिसोर सानैबो बिसुखे खाना गोसो खुसियै जाबथिंना बेराइनो राइज्जायबाय। सानसेखालि बिसोर बबेयाव मा जानो मोनगोन बेखौ साननानै हाग्रा गेजेरनि राजा-लामा मोनसेयाव थाखोमानानै दंमोन, थिग बे समावनो साब्रैसो मानसिफोरा हाबानि गायखेर-गुरु मिथिय, थाइलिर-खुसेरनि बिबान लाना थांनाय नुहुरबाय। बेखौ नुनानै सियाला मोखाखौ बुंबाय- सुखे, बै मानसिफोरा लांनाय बेसादफोरखौ जानो नांगोन, दा बिनखायनो मोनसे सोलो खालामनाय जाथों। नों इसे गोजानाव लामा सेरनि हाग्रा सिंआव थाखोमानानै था, “आं हौवा हौवा” होनना गाबगोन आरो नों “जा जा” होनना गाबखाव। नायबायथा बिसोरो जोंनि “हौवा” “जा” होननानै गाबखावनायखौ खोनानानै गिना बेसादफोरखौ गारना खारलांगोन।

मोखा आरो सियाला बे सोलोखौ साजायना थाखोमाना थाबाय, मानसिफोरा फैनानै खाथियाव सफैब्ला “हौवा-हौवा” आरो “जा-जा” होननानै होसिखावनायाव मानसिफोरा मोसा एबा मुफुरफोर फैदों सानना गिनानै जाय जेरै हागौ बिबानखौ बेयावनो गारनानै खारफिनलांबाय। मानसिफोरा आलायसिलाय जाना खारलांनायखौ नुना सियाल आरो मोखाया रंजानायजों बाज्जना बेसादफोरनि बिबानखौ लाना हाग्रायाव खारलांबाय। मोखाया सियालखौ बुंबाय- “सुखे, जों बेसादफोरखौ बेयावनो ज’नानै जायोब्ला जिदु बै मानसिफोरा गावसोरनि बेसादफोरखौ नागिरनानै फैफिनो, अब्ला जोंखौ बेयावनो बुना आधामरा खालमना बेसादफोरखौ सेखना लांफिनगोन। बिनखायनो मोनसे खामानि मावनि, आं बेसादफोरखौ लानानै बे गोजौ बिफाडव गाखोनि आरो नों सिंआव था, नोथ’ बिफाडव गाखोनो हाया। सायाव आं आंनि बाहागोखौ जागोन आरो नोंनि बाहागोखिनिखौ आं मोनफा-मोनफायै नोंनो सिंआव हरबाय थागोन। बिनखायनो नों बेसादफोरखौ आंनो दैखांना हर, आं सायाव लांनि।” मोखानि बाथ्राखौ फोथायनानै बेसादफोरखौ मोखानो दैखानानै हरनो हमबाय आरो मोखायाबो बेसादफोरखौ लांनानै मोनसे खेफ्रायाव ज’मा खालामनो

हमबाय । गासैबो बेसादफोरखौ रोगाना मोजाडै सिदोल खालामखांनायनि उनाव मोखाया बिफां दालायाव मोजाडै ज'ना लाना सिन्ता गैयाजासे जोबोर खुसिजों उदै बुगार-बुगार जानो हमनायसै । सियाला बिफांसिनिफ्राय बुंहरबाय- “सुखे आंनि बाहागोआ बोरों ।” मोखाया थालिरखौ जाना बिनि बिगुरखौ सिंआव गारहरनानै बुंबाय- “सुखे नै नोंनि बाहागो थालिरखौ हरदों हम... हम... ।” गायखेरखौ जानानै हासुं आरो थिंखिलखौ गारहरनानै बुंहरबाय- “सुखे नोंनि गायखेर बाहागोआ थांगासिनो हम... हम... ।” बेबादिनो मोखाया सियालखौ थगायना गासैबो बेसादखौ जाजोबनायखौ नुनानै सियाला रागाजों दंफां गुदिखौ अरना आरो हाखौ खुरनानै गासोनि दुखुजों बेनिफ्राय जायखारलांबाय ।

सानसेखालि मोखाया सियालखौ बाहासे थिंखिल बेरेनि सेराव जबायथानायखौ नुनानै खाथियाव थांनानै सोंबाय- “सुखे मा खालामदों ।” सियाला दुखुजों फिन होबाय- “ए सुखे माथो बुंनोलै सना, राजाया आंखौ दबा(नाग्रादल) नेग्रा खालामदों, बिनिखायनो राजानि बे दबाखौनो नेबाय थादों ।” मोखाया अब्ला बुंबाय- “सुखे खनसे दामनायनि दे ।” सियाला फिन होबाय- “होनो हानाय नड सुखे । राजाया खोनायोब्ला आंखौ दानस'ना सनै खालामगोन । नों खोनायाखै दामैसायावनो बुं-बुं बुंगासिनो ।” अब्ला मोखाया बुंबाय- “नडदे सुखे, लासैयै खनसेल' दामगोन, राजाया खोनानाय नड, आं दामनो जोबोर गोसो जादों ।” सियाला बुंबाय- “अब्लालाय दे सुखे, नोंनि बाथ्राखौलाय आं माबोरै गारनो, नाथाय लासै-लासैसो दामनांगोन अले ।” मोखाखौ बिदि बुंनानै सियाला गोखै खारलांबाय । मोखाया खुसिजोंनो बेरे बासाखौ दामानानै होबाय, लोगो-लोगोनो थिंखिलनिफ्राय गासैबो बेरेफोरा ओंखारबोना बिनि मोखां-गनथं, मोदोम, आखाइ-आथें बाफ'बनानै जोनो हमबाय आरो मोखानि मोखाड बुगाव जाना हुगुमा नारेंफिथाइबादि जाबाय । मोखाया हरखाब सानस'नामोना बासिनो हायाव लुथुर-फुथुर जाना होसिखाव-होसिखाव बिसुखेखौ लिंहरनो हमबाय- “सुखे, सुखे, आं थैथारबाय ।” सियाला गोजाननिफ्राय फिन हरबाय- “थालिरखौ जानानै आंनो बिगुरखौ गारनानै हरदोंमोन बेखौ नोंहा गोसोआव दंना ?” मोखाया बुंबावबाय- “सुखे आंखौ बासाय, आं थैथारबाय ।” सियाला फिन होबाय- “गाइखेरखौ जाजोबनानैजे खालि थिंखिलखौल' हरदोंमोन बिखौ नोंहा गोसोआव दंना ?” मोखाया आरो लिंहरबावबाय- “सुखे, आं थैथारबायलै,

आंखौ बासायदो ?” सियाला फिन होबाय- “खुसेरखौ जानानैजे साबाखौल’ आंनो गारहरदोंमोन दिनै बनि खिथेर होखारबाय।” बिदि बुंनानै मोख्राखौ बेयावनो गारनानै सियाला जायखारलांबाय।

गोबां साननि उनाव मोखाया सानसेखालि नुबाय जे, सियाला दब्लायसे थास’ नेबाय दं। मोखाया अब्ला बै बेरे जोजानाय बाथ्राखौ बावबायमोन। बियो खाथियाव फैनानै सियालखौ सोंबाय- “सुखे मा खालामदों ? बेलाय मा ?” सियाला मोख्रानिथिं नायनानै मिनि-मिनि फिनबाय- “सुखे, बेयो राजानि खुसेर। आंखौ राजाया बेखौ नेग्रा खालामनायलाय आं नेबाय दं, माथो खालामनो लोगो, राजानि हुकुम।” खुसेरनि मुंखौ खोनानाय लोगो-लोगोनो मोख्रानि सालायजों खुदै बोहैनो हमबाय। मोखाया बुंबाय- “सुखे, फिसा नायनानै आंनो फांसे जानो होनो ना ?” सियाला फिन होबाय- “अह, सुखे नों मा एसे अख्रालै, राजानि खुसेर आं नोंनो माबोरै जाहोनो ? राजाया खोनायोबा आंखौथ’ बुथारगोनानो, आंनि उदैनि फिसाखौबो खुफ्लेना बुथारगोन।” लुबैसुला मोखाया आरोबाव बुंबाय- “नडा सुखे, आंहा जोबोर गोसो जादों, सिरि-सिरि फिसा नायनानै फांसेल’ हो, राजाया मिथियादे।” सियाला अब्ला बुंबाय- “नों अख्रा खालामबाय जेला जा, आंहा जा जायो जाथोंसै, नाथाय फांसेनि बारा नडा।” सियालनि गनायथि मोननाय लोगो-लोगोनो खांखुवा मोखाया गिदिर थास’ बिफां फांसे लाबोनानै मागा-मुगु सोना सावसुबनो हमबाय। थाबैनो थास’आ बनि खुगायाव माननो हमबासो बिहा थर फैखांबाय आरो बियो होसिखाव होसिखाव अखां गोमहोलायना सियालखौ लिंहरनो हमबाय- “सुखे आंखौ बासाय, आं थैथारबाय।” सियाला फिन होबाय- “थालिर जानानै जे बिगुरखौ आंनो गारहरदोंमोन गोसोआव दंना ?” मोखाया बुंबावबाय-“सुखे, थैथारबायलै”। सियाला फिन होबाय- “खुसेर जानानै साबाखौल’ आंनो गारहरदोंमोन गोसोआव दंना ?” मोखाया बुंबावबाय- “सुखे, आंखौ रैखा खालाम, आं थैथारबाय।” सियाला फिन होबाय- “गुरु मिथाइ जानानै थिंख्लिखौ आंनो गारना हरदोंमोनना, बनि खिथेर होखारबाय।” बाथ्राखौ बुंनानै सियाला बिनिफ्राय जायखारलांबाय।

बे जाथाइनि गोबां साननि उनाव सानसेखालि मोखाया बेरायनो फैनाय समाव लामायाव नुबायजे मोनसे गोजाम दैख’र खाथियाव सियाला ज’गासिनो दं। दैख’रनि मोखाडा माखाय(बेमा)नि जेजों खोबथेना दंमोन। मोखाया सिगां

खननैनि जाल्लाखौ बावगारना सियालनि खाथियाव थांना सोंबाय- “सुखे मा खालामदों?” सियाला बुंबाय- “ए, सुखे माथो बुंनोलै, राजानि मोनसे नडा मोनसे खामानि आंनियाव थायो। बेयो राजानि फिसाजोनि हाबायाव मोननाय दोला, बेखौनो राजाया आंखौ नेग्रा खालामदों, बिनिखायनो आं नेगासिनो दं।” मोख्राया बुंबाय- “राजानि दोलायाव गाखोनो जोबोर आराम नडासै सुखे? माबोरै मोनो खनसे गाखो नायनिदे सुखे?” सियाला बुंबाय- “हानाय नडा सुखे, राजाया माबोरैबा दोलायाव सोरबाफोर उथिनायनि सिन मोनोब्ला आंखौ एरैनो एगारनाय नडा।” मोख्राया बुंबाय- “मा सिन मोननोलै राजाया? लासैयै खनसे उथिना नायनिदे।” नोंथ’ एरैनो एगारग्रा नंखाया, नों गाखोनो लुबैदों जेला, रावबो नुयैयावनो थाबैनो उथिदो। सियाला बुंबाय। मोख्राया राजानि दोलायाव गाखोनानै सुखु मोनगोन साननानै बाज्जगासिनो जेयाव बारजुमबाय, बामब्लेमानि जेया जिना मोख्राया दैख’राव गोग्लैना थैबाय।



दाउखा दन्दा आरो सखा थुनि

मोनसे समाव मासे दाउखा दन्दा आरो मासे फिसा सखाथुनि दंमोन । बिसोरो सानैबो बिसुखे खालायबाय । सानसेखालि बिसोर सानैबो फांसे बिफां दालायाव बानानै दंमोन । थिग बे समावनो नुबाय सासे बुरैया सेख्लायाव माइ लामगासिनो दं । दाउखा दन्दाया सखाथुनिखौ बुंबाय- “सुखे, सुखे बैखौ नायनयायसाय बै बुरैया माइ लामबाय थानायखौ नुदोंना ? थाब्रोमनो हमनानै मुथासे लायनि थु ।” सखायाबो बुंबाय- “ए, नंगौथ’, थौ बिदिब्ला ।” अब्ला दाउखा दन्दाया बुंबाय- “नाथाय सुखे मोनसे बाभ्रा, आं गुनथुथ्रिजों जेसेबां माइ लाबोगोन नोंबो जिदु आंनिसेबां लाबोनो हाया अब्ला आं नोंखौ जागोन । आरो नों जेसेबां लाबोगोन आंबो जिदु एसेबां लाबोनो हाया अब्ला नोंबो आंखौ जा ।” दाउखा दन्दानि बाभ्राखौ खोनानानै सखाथुनिया सानबाय- “आंथ’ गुनथुथ्रिजों खनसेलागैनो बिनि समान माइ लाबोनो हानाय नड, आदसा नायनिथ’, बियो आंखौ माबोरै जायो ।” बाभ्राखौ साननानै सखाया बुंबाय- “आदसा सुखे बेनो जाथों ।” बेखौनो बुंनानै सखाया गुनथुथ्रिजों थाब्रोमयै गुनथुथ्रि बहरा (बुंजासे) माय लाबोबाय, नाथाय बेयो जेबोर इसेल’ । बिनि उनाव दाउखा दन्दाया थाब्रोमै एसेबां माइ लाबोबाय जे दाउखाया मायखौ लाबोखानानै बुंबाय- “सुखे दा आं नोंखौ जानो हायो ।” सखाथुनिया फिन होबाय- “थारैनो, नों आंखौ जानो हागोन, नाथाय बिनि सिगाडावनो नों आंनि मोनसे बाभ्रा लाखिनो नांगोन, नों जेराव मेरावनो गोथै बेदर जाबथिंलाबायो, बिनिखायनो नोंनि गुनथुथ्रिया जेबोर गाज्जि मोनामसोगारो ।” दाउखा दन्दाया बुंबाय- “आदसा सुखे नोंनि बाभ्राखौ लाखिगोन, आं दा आंनि गुनथुथ्रिखौ लैथोनि दैयाव सुनानै फैनि ।”

बाथ्राखौ बुंनानै दाउखा दन्दाया लैथो सेराव बिरलांना लैथोखौ लिंहरबाय-
“लैथो, आदालै, लैथो आदा।” लैथोआ फिन होबाय- “मा जाखो फंबाय?”
दाउखाया बुंहरफिनबाय-

“दै हर, सुम्नानि गुनथुथ्रि

जागारनि सखाथुनिखौ।”

लैथोआ फिन होबाय- “माबोरै लांनो? जिदु नों माबा मोनसे आयजें
होनो हागोन अब्ला आं हरनो हागोन।”

लैथोनि बाथ्राखौ खोनानानै दाउखाया दो दोखोल बानायग्रा कुमारनि
न'आव थांबाय। कुमारखौ दाउखाया राव होनानै बुंबाय- “कुमार आदा, कुमार
आदा, न'आव दंना?”

कुमारआ फिन होबाय- “दड' मानोबा नांगौ?”

दाउखाया बुंबाय-

“हर थिंख्लि, दैखांनि दै, सुम्नानि गुनथुथ्रि।

जागारनि सखाथुनिखौ।”

कुमारा फिन होबाय- “आंनि न'आव बानायखानाय थिंख्लि गैया।
जिदु नों इसे हा लाबोनानै होफैनो हागोन, अब्ला आं नोंनो थिंख्लि मोनसे
दानानै हरनो हागोन।”

कुमारनि बाथ्राखौ खोनानानै दाउखाया हानि खाथियाव थांनानै हाखौ
बुंहैबाय-

“हर हा, हैनि कुमारनो, दाथों थिंख्लि,

दैखांनि दै, सुम्नानि गुनथुथ्रि।

जागारनि सखाथुनिखौ।”

हाया फिन होबाय- “आं गावनो माबोरै हरनो? नों जिदु माबा मोनसे
राहाजों जावनानै लांनो हायोब्ला लां।” हानि फिननायखौ मोननानै दाउखाया

मासे मैसोनि सेराव बिरलांबाय । बियो मैसोखौ राव होनानै बुंबाय-

“गं हर, जावनि हा ।

होनि कुमारनो, थिंख्लि दाथों

दैखांनि दै, सुम्नानि गुनथुथि ।

जागारनि सखाथुनिखौ ।”

मैसोआ फिन होबाय- “आं गावनो आंनि गंखौ नोंनो माबोरै हरनो ?
जिदु नों माबा राहायै लांनो हायोब्ला लां ।”

मैसोनि बाथ्राखौ खोनानानै दाउखाया थाडै-थाडै-मासे सैमानि खाथियाव
स'हैना बुंबाय-

“मैसोखौ बुथार, लांनि गं, जावनि हा,

हैनि कुमारनो, दाथों थिंख्लि ।

दैखांनि दै, सुम्नानि गुनथुथि

जागारनि सखाथुनिखौ ।”

सैमाया फिन होबाय- “दिनै गोबां सान आं गायखेर मोनजायाखै,
बिनिखायनो आंनि देहाया बोलो गैया जालांदों । नों जिदु आंनो गायखेर जाहोनो
हायो अब्लासो आं मैसोखौ बुथारनो हागोन ।”

बे बाथ्राखौ खोनानानै दाउखाया गाय मोसौनि खाथियाव थानानै बुंबाय-

“गायखेर हर, जाहोनि सैमानो,

जाथों बोलो, बुथारथों मैसो ।

लांनि गं, जावनि हा

हैनि कुमारनो, दाथों थिंख्लि ।

दैखांनि दै, सुम्नानि गुनथुथि ।

जागारनि सखाथुनिखौ ।”

मोसौ गाय फिन होबाय- “आं बुरै जाबाय, गोबां सान मोजाडैगांसोखौनो
मोनजायाखै । नों जिदु आंनो मोजाडै आथिसे गांसो जानो लाबोनानै होफैनो
हायो, अब्ला आं नोंनो जेसेबां गायखेर नांगौ एसेबां हरगोन ।”

मोसौ गायनि फिननायखौ मोननानै दाउखाया गांसोनि खाथियाव थानानै
गांसोखौ बुंबाय-

बुरै आबैनि सल'

“हर गांसो, जाहोनि गायनो, ओंखारथों गायखेर,
जाहोनि सैमानो, जाथों बोलो, बुथारथों मैसो,
लांनि गं, जावनि हा।
हैनि कुमारनो, दाथों थिंखिल ॥
दैखांनि दै, सुम्नानि गुनथुथि।
जागारनि सखाथुनिखौ।”

गांसोआ फिन होबाय- “आं माबोरै गांसो हरनो ? जिदु नों हानानै लांनो
हायो अब्बालाय लां।”

गांसोनि बाथ्राखौ खोनानानै दाउखाया खामारनि खाथियाव थांबाय।
बायजोनिफ्रायनो दाउखाया खामारखौ गाबजिहरबाय- “खामार आदा, खामार
आदा, न’आव दंना ?” खामारा फिन होबाय- “दं दाउखा फंबाय, मा
खामानियावबा फैलायखो ?”

दाउखाया फिन होबाय-

“हर खासि, हानि गांसो, जाहोनि गायनो
ओंखारथों गायखेर, जाहोनि सैमानो, जाथों बोलो,
बुथारथों मैसो।
लांनि गं, जावनि हा।
दैखांनि दै, सुम्नानि गुनथुथि
जागारनि सखाथुनिखौ।”

खामारा बुंबाय- “आंनि अरा गोमोरलांबाय, जिदु आंनो इसे अर
लाबोनानै होफैनो हागोन, अब्बा आं दानो खासि गंसे दानानै हरनो हागोन।”

दाउखाया खामारनि बाथ्राखौ खोनानानै सोरगिदिं नायथिंनानै नुबायजे
लैथो बारनानै ओजों फाराव अर जोंनायनि उखुन्दै ओंखारदों। नुहुरनानै बियो
बिरलांना नुहैबाय सासे बुरै मानसिया माइ रुगासिनो दं। बुरैनि खाथियाव
फैनानै दाउखाया बुंबाय- “आइ, आंनो इसे अर हरनो हागोनने ?” बुरैया फिन
होबाय- “माबोरै हरनो ?” दाउखाया फिन होबाय- “आंनि गां सिडववो
खानानै हर।” बुरैयाबो बेखौनो मावबाय। दाउखाया अरखनि थप्लाखौ गांआव
लानानै लैथो साजों बिरबोनो हमबाय। बिरबोबाय थानाय लामा स’सेयाववो
बार नांनानै अरखिया अर जोंब्लावना अरआ दाउखानि गांआव नांनायलाय

बुरै आबैनि सल'

बियो लैथो गेजेरावनो गोग्लैनानै थैबाय। ओजोंहाय सखाथुनिया सिरि-सिरि
दाउखानि खिथु खिथु फैनानै गुदिनिफ्राय बिजौसिम गासैखौबो नायगासिनो
दंमोन। उनाव दाउखानि बिदि थैलानायखौ नुनानै गोजोननाय मोननानै फांसे
बिफांनिफ्राय गुबुन फांसे बिफाडाव बाहैबाय। आरो आंनि जि-जोमफोराबो
गोसोम जाबाय, आंबो फैफिनबाय।



सोलोगोरा सियाल

सानसेखालि मासे सियाला जोबोर उखैनानै माबाफोर मोनजायोखोमा साननानै मोनसे गामियाव मानसिनि बारि न'फोराव सुन-सुन बेरायबायदोंमोन । थिग बे समावनो बियो न'खरसेनि बाखिनि बैसाडव खिथु गोबाय खादायाव थालिर बिलाइ खोबनानै लोक्षिनो फिथा थाइनैसो बावनानै दोननाय नुबाय । बियो फिथाखौ ग'बा-ग'ब जाना फोजोबखांना, गोबाय खादानि गब्लंजों खोबनानै दोननाय थालिर बिलाइखौ खर' जांखि-जांखि सोलानो हमबाय । बियो सोलानायावनो सोलानायावनो थालिरबिलाइया जिनानै गोबाय खादाया बनि गोदोनायाव मालाबादि हाबना थाबाय । सियाला गोबां नाजासेयावबो खादाखौ गोदोनानिफ्राय बोखारनो हायासै । जाहोनाव एरैबादि जाबाय जे बियो सिकार खालामना दाव-हांसो हमना जानो हाया जाबाय, मानोना गोरनायाव गोबाय खादाखौ लानानै धोलै-मोलौयै हाग्रानिफ्राय ओंखारबोनो हमो अब्ला मानसिफोरा जै होना होखार हरो, आरो गोजानाव बिखौ नुयोब्लानो बयबो खादागोबायखौ हम होनना सेसा होसोनाय होयो ।

सानसेखालि सियाला हाग्रा गेजेराव बेरायथिंबाय थानाय समाव नुबायजे मोनसे जायगायाव जरासे मोसा फिसानि सिगाडव इसे बेदर दं । सियाला बे बेदरखौ जानो लुबैनानै मोनसे सोलो खालामना गोजाननिफ्राय हाखु-दाखुयै गोदोनानि खादाखौ जांखिना बुंबाय- “ओइ, नोंसोरनि नोमा-नोमफाया बहा थांखो ? आंखौ फैनाय नुनानै खारखोमाबाय जानांगौ ? बिसोर बहा दं बुं ?” सियालनि गिदिर गारांखौ खोनानानै मोसा फिसाफोरा गिनायजों थनश्र'ना गुरै गारांजों बुंबाय- “आइ-आफाया सानैबो सिकार खालामनो थांदों ।” अब्ला सियाला बुंबाय- “आदसा, थाडे थांथोंदे, गिदिंबोफिनब्ला आं फैदोंमोन होननानै खिनथा, नायनायसाय नोंसिनि नोमफाया बोसोरनैसो सिगांनो आनिफ्राय बे खादाजों खादासे रां-रुफा दाहार लाबोदोंमोन, दिनैसिमबो बियो आंनो बै रां-रुफाखौ हरफिनाखै । आं दिनै बिसोरखौ बारा गोबाव नेनो हाया, बियो गिदिंबोफिनब्ला नोंसोरो नोमफानो बाथ्राखौ खोनथा । आं जोबोर उखैदों, ओइ

माबाफोर दड'नामा नायनायसाय आं जालांनि।' सियाला बिदि बुंनानै मोसा बिमाया फिसाफोरनो दोनलांनाय बेदरखौ जानानै गावनि उदैखौ सुफुंना जायखार लांबाय ।

सानफ्रोमबो मोसा फिसानि बिमा-बिफाया सिकाराव ओंखारलाडोब्ला सियाला फैनानै फिसानो दोनलांनाय बेदरखौ जानानै थाडे । बेफोर बादिनो गोबां सान बारलांनायनि उनाव मोसा फिसाफोरनि सोलेरा खेब-खेब रानलांनायखौ नुनानै बिमाया बाथ्राखौ एसे गोथौयै साननानै बुंबाय- “बिसोर मानो खेब-खेब रानलांदों ? जों सिकाराव थांब्ला बिसोरनो दोनलांनाय बेदरफोरखौ सोरबा बिसोरखौ सिगिनानै जालाडे नामा ?” मोसा बिमाया बाथ्राखौ गोथौयै साननानै फिसाइखौ बुंबाय- “खोनादोंना, दिनै नों सिकाराव थांनो नाड, आंनो हारसिडै थांगोन । जों गैयै समाव बेयाव सोरबाफोर फैयो नामा बेखौ नायनो गोनां जादों । दिनै नों गोजाननिफ्राय थाखोमानानै नायबाय था ।” फिसाइखौ बैसानखालि दोननानै गाव हारसिं सिकाराव ओंखारलांबाय ।

गुबुन साननिबादिनो बै सानखालिबो मोसा फिसाफोरनि सिगाडव खादा गोबायखौ जांखि-जांखि मोसा फिसाफोरखौ सिगिनानै बेदर जानो लानाय समावनो, गोजानाव थाखोमानानै थानाय मोसाया सियालनि खामानिखौ नुनानै बिनि गासैबो खामानिखौ बुजिमोनना नेरखानानै सियालखौ होसोलांबाय । सोलोगोरा सियाला माब्लाबा बियो बेफोरबादि हमजानो गोनां जायोब्ला मा खालामगोन बे सोलोखौ बियो सिगाडवनो सानखाना दोनदोंमोन, बिनिखायनो बियो सिगां-सिगां खारलांनानै फांसे जेवजा बिफांनि खेफ्रा गेजेरजों सोरखिना खारलांबाय । मोसायाबो गोखै खेफ्रानि गेजेरजों बारलांनो नाजानायावनो मोसाया खेफ्रायाव नांथानानै थालांबाय । मोसाया खेफ्रानिफ्राय ओंखारनो थाखाय जेसेबां बाब्राबना नाजादों, एसेबां गोरायै खेफ्रायाव नांथासिनदों । मोसानि होसिखावनायजों हाग्राया खमफिखानो हमबाय । मोसौ, मैसो, मै, बाइदि हाग्राणि जुनारफोरा गिनानै हाग्राणि सोरगिदिं खारथिंनो हमबाय । मोसानि होसिखावनायखौ खोनानानै मोसा बिमायाबो खारबोनानै बेसिम सफैबाय । सियाला इसे गोजानाव गसंनानै नायबाय दंमोन । बियो जो मोसाखौ नुनानै बुंनो हमबाय- “नायनायसाय, नोंनि फिसाइखौ आं माबादि बोलि होखो ? मालायनि रां दाहार लाबोनानै, होफिननो गियान गैया, दा माबोरै मोनदों । नोंखौबो बुथारगोन नोमफाया । नों मोजाडै

मोजां आंनि रांखौ हरनोबा हर । रां गैयाब्ला आंनि सिं जाना था, आंनि खोथा-
बाथ्रा मानिनानै सोलि नडब्ला नोंबो रैखामोना बे थार, मिथिना लाखा, नोंनि
फिसाफोरखौबो बाथोन देनासो गारगोन आं ।”

बे समावनो मोसाया बाब्राब-बाब्राब थैबाय । जो मोसाया जेबो गुबुन
राहा मोनैलाय सियालनि सिं जानानै थाबाय । बै साननिफ्रायनो सियाला जेबो
गिनाय गैया जासे मालायनि सायावनो ज’नानै जाबाय थानो हमबाय । बियो
मोसा बिमाखौ सिकाराव थिनहरना गाव आरामाव आथिं सोमाव-सोमाव जायो ।

बेनि साननैसो उनावनो मोसाया थाग्रा दन्दरखौ सोलायनो सानबाय ।
मोसाया फिसा मानैखौ लानानै मोनसे दैमा बारनानै मोनसे गोजान हाग्रायाव
थानो थाखाय लाहार-फाहार खालामबाय, सियालाबो बिसरजों थांफानो
ओंखारबाय । बे थांखियै मोसा बिमा आरो फिसा मानैयाबो दैमाखौ सानस्मिनानै
बारनो हमबाय । सियालाबो गावनि मानखौ लाखिनो थाखाय थैबा थैबाय साननानै
दैयाव ओंखारफाबाय । नाथाय दैन दाहारजों बुसोमजानानै सियाला थलं-बलं,
गुवा-गु दै मोनलोंना दै दाहारजों बुखारलांजानायखौ नुनानै मोसाया बिखौ
खानायाव साबखांना बोनानै लाबोबाय । सियाला बोरियाव सिखां बोखांनाय
लोगो-लोगोनो मोसाखौ दाबि होखांनायें बुंबाय- “नों आंखौ मानो बोनानै
लाबोनो गोनां जाखो ? नोंखौ बोनानै लाबोनो सोर थिनदोंमोन ? नोंसोरबादि
हिनजावफोरा बिदिनो इसेबो सोलो गैया । नों मिथिगौना दैन राजखुंगुरा बेजों
खादाब्रै रां दाहार आंनो होनो दं, बियो आंखौ नुबानो खारखोमायो । दिनै बियो
बे बोराइनि आखाइयाव गोर्लैदोंमोन, बिखौ नुनाय लोगो-लोगोनो दिनै मोजाडैनो
हमथारदोंमोन, सानदोंमोन दिनै आं बिनिफ्राय दाहार रांखौ दिहुननानैसो
गारथारगोन । बिनिखायनो बिजों आंहा नारखां-नारसि जादोंमोन । नों आंनि
गासैबो नाजानायखौ फेलें खालामबाय । आदसा, नों बुंनायसाय, नों मानो जोंखौ
हेंथा होदोंमोन ?”

बेबादिनो सोलोजों फाव खालामना सियाला गावनि मानखौ लाखिनानै
आरोबाव मोसाजों लोगो लाफिनबाय । मोसा फिसाया लासै-लासै बुजिमोननाय
जाबोबाय । सिकाराव थानो थाखाय बिसोर फाला खालामनानै लाबाय । माब्लाबा
मोसा बिमा माब्लाबा मोसा फिसा आरो माब्लाबा सियाला सिकाराव थानांगोन ।
नाथाय सियालनि फाला गोर्लैब्ला सियाला बाइदिसिना बाथ्रा बुंनानै एरायबाय

थायो, सानसेखालि सियाला एरायनो हाथारैनि मोसा बिमाजों सेसा मैहुर खालामनो ओखारलांबाय। सियाला मोसाखौ बुंबाय- “आं सेसानि दरखं मोखाडव नेबायथानि, नों बै फारसेथिं थांनानै सेसाखौ होनानै है, सेसाया आंनि फारसे फैंयोब्ला बियो आरो बहा खारगबावनो?” सियालनि बाश्त्राबादिनो मोसाया सेसाखौ होनानै हैबाय, नाथाय सियाला दरखं मोखाडव लांखांना गोग्लैना थाबाय थानाय समावनो सेसाया सियालनि उदै साजोंनो खारलांबाय। सेसानि गानायाव सियालनि उदैया दोला लांबाय। सेसाया ओंखारलांनायनि उनाव मोसाया सियालनि खाथियाव फैबाय, सियाला बिखौ खेंखाय-खेंखाय बुंबाय- “खोनादोंना ? सेसाया आंनि फारसे खारबोनायाव आं एरैबादि मिनिनो ओंखारबाय जे सेसाखौ हमनायाथ’ गोजानानो, आं आंनि मिनिनायखौनो लाखिनो हायासै। एसेबां फिसा सेसाखौ आंबादि सासे जोहोलावनो हमनो होनायखौ नुनानै मिनिनायावनो आंनि ऊदैया जिना बिबुआसो ओंखारलाय लांबाय।”

बे खेबावबो सियाला सोलोजों देरहानानै आरोबाव साननैसो मोसाजों ज’नानै जानो मोनबाय। बेबादिनो साननैसो थांनाय उनाव मोसा फिसा मानैया सियालनि सोलोखौ बुजिमोननानै बिखौ हमनो सानबाय। सानसेखालि हराव इसे गोजानाव गुबुन सियालफोरा हुवा-हुवा गाबनायखौ खोनानानै बै खादाखौ माला लानाय सियालाबो गाबनो लुबैनानै इसे गोजानाव जायखारलांनायलाय मोसा फिसा मानैयाबो बिनि गुदि-बिजौ मिथिनो बियो नुयैबादि सिरि-सिरि खिथु-खिथु थांफाबाय आरो बियो इसे गोजानाव मोनहैना गोसो होसारना हुवा-हुवा गाबनो हमबाय, मोसा फिसा मानैया दुथां सियाल होनना मिथिनानै बिखौ होसोलांना हमनो मोननानै खुफ्लेना बुथार गारबाय।



मोसा आरो खांखाइ

गोदो-गोदाय मोनसे हाग्रायाव मासे मोसा दंमोन । बियो दन्दर सोलायनानै गुबुन मोनसे दन्दर नागिरनानै थांबाय । थांनाय समाव लामायाव मासे खांखाइजों मोगा-मोगि जालायबाय । खांखाया मोसाखौ नुनानै मिनिस्तु मिनिनानै माथो होबाय- “आदा बहा थांनो ?” मोसाया खांखायनि मिनिस्तु मिनिनानै माथो होनायखौ मोजां मोननानै बुंबाय- “आं दन्दर सोलायनानै मोनसे गुबुन हाग्रायाव थांनो ओंखारदों । नोंलाय बबाव थांनो ओंखारदों ?” खांखाया बुंबाय- “आं जेरावबो थाड, आंनि न’आ खाथियावनो, आं हारसिं जिब, आंखौ नायनो आंजों सिगाडवबो रावबो गैया उनावबो रावबो गैया ।” मोसायाबो बुंबाय- “आंहाबो बेनो जादों, आंबो लोगो गैयायै हारसिं जिब । आंहाबो रावबो गैया ।” बिदिनो सानैबो गावबा गावनि गोसोनि बाथ्राखौ राइज्जालायनानै गोसोआव गोजोननाय मोनबाय । उनाव सानैबो बिसुखे खानानै बै हाग्रायावनो सानैबो खाथि-खाथि थालायबाय ।

बेफोरबादिनो बिसोर सानैबो साननैसो गोरोबलायनानै दंमोन । मोसाया सेसा सिकार खालामनानै लाबोयो, बेखौनो सानैबो रानलायनानै जाना जोबोर आलो गोजोनै थायो । खांखाया मोसानि बिसुखे होनना मिथिनायलाय हाग्रानि गुबुन हिंसाखुरिया जुनारफोराबो खांखाइनि जेबो इनाय खालामनो गियोमोन । सानसेखालि खांखाया मोसाखौ बुंबाय- “सुखे बेदर जायै-जायै आंहा आंगायबाय, नोंनि सिगाडव थार बाथ्राखौ बुडबालाय सोरनि सिगाडव बुंनो, बेदर जायै-जायै आंनि उदैया लासै-लासै रुगिया जाबोदों । बिनिखायनो जों गेजेर-गेजेर निरामिस आदार जानायनि राहा खालामब्ला माबोरै जायो ? जों सानैबो लोगो नांना आबाद मावनिदे सुखे ?” मोसाया फिननायाव बुंबाय- “आबाद मावनोलाय मा गोब्राब बाथ्रा सुखे ? नोंहा जिदु गोसो जादों, अब्बालाय मावजागोन ।” खांखायनि बाथ्रायाव मोसाया मदद होनायलाय खांखायाबो बुंबाय- “आदसा, सुखे, अब्ला नों गामियाव थांनानै माइ फोथारनिफ्राय माखासे खोथिया लानानै फै । आं हाग्रानि बै हा दख्लाखौनो एवनि ।” बेबादिनो सानैबो राइज्जालाय लायनानै,

खांखाया हाखौ एवनो लाबाय आरो मोसाया गुबुननि फोथारनिफ्राय गोसोम जोसा माइनि खोथिया खावना लाबोनानै गायना होबाय ।

साननैसोनि उनाव बिसोरनि माइया बिदां ओंखारबाय । माइ ओंखारनायखौ नुना खुसिजों खांखाया बुंबाय- “माइखौथ’ जों मोनबायर’ सुखे नाथाय मैगं-थाइगं गैयाब्ला माबोरै जानो ? ओंखामगोजालाय माबोरै जानो ? बिनिखायनो जों मैगं थाइगंबो गायनांसिगोन । नों गामियाव थांनानै लाय-लाफा, सुका-पालें, गाजर-फानथाव, कबिफुलि लानानै फैहै । लाव बिफानि फुलिबो लाबोफानो बावगारनो नाड । आं मैगं थिलिनि थाखाय हा फोमोननि ।” बेबादिनो मोसाखौ मैगं फुलि लाबोनो थिननानै खांखाया हा जावनो हमबाय । मोसाया आगाननैसो आवगाय लांनायनि उनाव खांखाया उनथिंजायनिफ्राय गाबखावहरनानै बूंहरबाय- “सुखे, आं बूंनोसो बावदों, बानलुनि फुलिबो फानैसोबो लाबोनो दाबाव । गोखै ओंख्रैजों ओंखाम जानो बानलु नडाब्ला माबोरै ख’हाबनो ?” मोसाया “हु” होननानै गोसोजों लाबोगोन साननानै गोलाव-गोलाव बारनानै गामिफारसे दावगालांनो हमबाय ।

बेबादिनो आबाद मावनानै सानैबो जनानै दं । लासै-लासै आधोन दाना सौफैबाय । माया मोननो हमबाय । खांखाया माबा-माबि बुथुमनानै मोसाखौ बुंबाय- “सुखे आं मायनाव लायनि ।” बिदि बुंनानै खांखाया माइखौ हानानै लायबाय आरो मोसाया नाराखौ हानानै लाबोबाय । एसेआवनो फानथाव फिथाइयाबो खाजानाय जाबाय । मोसाया खांखाइखौ सोंबाय- “सुखे नों फिथाइ लांनो ना बिफां लांनो ?” खांखाया फिथाइ लांनो होननानै फानथाव फिथाइखौ लाबाय, मोसाया बिफां लाबाय । बेबादिनो सानसे आबादखौ मावखां दोनखां मोसाया सानसेखालि खांखायखौ गावनियाव ओंखाम गोरलैजों अनला ओंख्रि संना, फानथाव भाजा एवनानै खांखायखौ जाहोबाय । खांखायालाय बेफोरखौ माबेसे जानो ? एरैनो एसे दांज्रानानैल’ दोनबोबाय । बे जिखियानो जाथों, बेनि उनावबो खांखाया गोबां बार मोसानि न’आव बेदरजों ओंखाम जाबाय, नाथाय खांखाया मोसाखौ सानसेबो गावनि न’आव ओंखाम जानो लिंआसै । मोसाया बे बाथ्राखौ गोसोखानानै सानसेखालि खांखायखौ बुंबाय- “सुखे नों सानसेबो आंखौ नोंनि न’आव ओंखाम जानो लिडाखै । सानसे ओंखाम गोरलैन लाहार-फाहार खालामनानै आंखौबो लिंहर । नोंलाय माबोरैथ’ सडै-खावै जायो, आंबो

जानायनायनो गोसो जादों ।” खांखाया लोगो-लोगोनो फिन होबाय- “लिंगोन, लिंगोन मानो लिङा जानोब्रा सुखे ? आं नोंखौ ओंखाम गोरलै जानो लिनो-लिनो होननानै गोसोजों गोसो सानगासिनो दंमोन, नाथाय आंनि न’आ जोबोर फिसा । नोंखौ लांना बहा जाहोनो, बहा जहोनो साननानै आख’-फाख’आव गोसलैदों, बिनिखायनो बे खामानिखौ मावनो हाथ’आखै । जिखिजादोआ, नों जिदु गात्रि मोनाब्ला गाबोन फुंनि बोथिसेखौ आंनि न’आवनो जाहैदो । ना मा बुडो सुखे ओंखाम गोरलै जानायाथ’ नामावसो । गैजारोडैनि न’आवलाय मा मोननो, नोंनि आगान हैनानै मैगं थाइगंजोंनो बोथिसे थेब्रे जाबोदो ।” मोसाया फिन होबाय- “जागोनदे सुखे, गाबोन नोंनि न’आव ओंखाम गोरलै जानो थांगोन ।”

अखानायै फुंआवनो खांखाया जोसा माइरंजों ओंखाम गोरलैखौ संबाय, फानथावजों खारै ओंखै संबाय । मोसाया खांखाइनि न’आव ओंखाम गोरलै जानो फैदों । खांखाया मोसाखौ बुंबाय- “सुखे, नों आंनि गुदुं सेरावनो ज’, आं ओंखाम, ओंखै खुरना हरबाय थानि, नों जाबाय था, नोंथ’ आंनि हाखर सिंआव हाबलांनो हाया । बिदि बुंनानै खांखाया गुदुं सिंनिफ्राय ओंखाम-ओंखै गुदुं मोखाडव दिहुननानै हरनो हमबाय आरो मोसायाबो ओंखाम-ओंखैखौ ग्ल’बा-ग्ल’ब जानो हमबाय । खांखायनि ओंखाम संनाय खान्थाया फिसा, बेयाव जेसेबां ओंखाम संनाय जादोंमोन मोसाया बेखौ ख’बनैयावनो फोजोबबाय, बेखौ नुनानै खांखाया गिनो हमबाय । बियो सानबाय, मोसानि गोसोखौ बुजिनो हानाया गोब्राब । जानो ज’नानै जिदु बिनि उदैया बुडबोला, आंनि मोखांखौ नायाबासिनो लोगो-सोगो बावगारना रागाजों बहाबा आंखौसो जागारगारगोन । बिनिखायनो मोनसे सोलो खालमनानैबाबो खारगनो नांगोन । गोसोजों गोसो बेखौनो साननानै बियो मोसाखौ बुंबाय- “सुखे नोंनो गले-गले ओंखाम ओंखि रोगायै-रोगायै आंहा सिंआसो सालायलांबाय आरो सिखारनोनो हाला । नों नोंनि लानजायखौ आंनि गुदुं सिडव सोनानै हर, लानजायावनो आं ओंखाम ओंखि खाथाबनानै हरनि, नों लाडै-लाडै जाहै ।” खांखाया सोलो खालामनानै बुंनाय बाथ्रानि गुबै ओंथिखौ बुजिनो हायाबासिनो मोसाया गावनि लानजायखौ गुदुं सिंआव सोनानै हरबाय, खांखाया मोसानि लानजायखौ सिंआव बोलांनानै आसिबिमा फारनैजों खेबनो हमबाय । मोसाया दुखु मोननानै लानजायखौ बोयोसो बोयो, नाथाय

लानजाया ग'बोआ, फारसेथिं खांख्रायनि खेबनाया बारानिफ्राय बारानिनसो जायो। मोसाया सानायजों गोलोमस्रावना गावख्रौनो बावगारना गारामा फुवारनानै होसिखावनो हमबाय, थेवबो खांख्राया खेबनायखौ एगारासै। खाफालबादियै थिग बे समावनो खाथिनि फोथाराव सासे राजखुंगुरा खदाल जावगासिनो दंमोन। बियो मोसानि होसिखावनायखौ खोनानानै हा जावनायखौ गारना खारलानायखौ नुहरनानै सोसाया गोजाननिफ्राय बिखौ होसिखावहरना गाबै-गाबै खुलुमथाबना बुंबाय- “हे आफा, दसे ओजों फैथ’, आं थैथारबाय, खांख्रायनि खेबनायाव आंनि जिउआ गलानोसै। आंनि लानजायखौ बख'नानै होफैलै।” राजखुंगुरा फिननायाव बुंबाय- “आं हायालै, नों जाबाय मोसा, आं जाबाय मोनिस, बख'नानै होयोब्ला नों आंखौ जागारगारगोन।” मोसाया बुंबाय- “ओइ आफा, फै लै, सैथो-सैथो थाम सैथो आं खोमा खेबना सदबांसा लादों, नोंखौ आं जाया। आंखौ बासायलै आफा। नों जिदु आंखौ बे खैफोदनिफ्राय बासायो अब्ला आं सदबांसा लानानै बुंदों सानफ्रोमबो नोंनो माफायै सेसा लाबोनानै होफैगोन।” बे बाश्राखौ खोनानानै राजखुंगुरा मोसानि बाश्रायाव फोथायना खाथियाव फैना खदालजों मोसानि लानजाइखौ दानस'ना होनायलाय मोसाया रैक्षा मोननायसै। मोसाया बै जायगानिफ्राय जायखारलानाय समाव राजखुंगुरनि खोमा खाथियाव बुंलांबाय- “नोंनो आं आंनि बाश्रा मतै सानफ्रोमबो मासे सेसा होफैगोन नंगौ, नाथाय नों बे बाश्राखौ रावनोबो खिन्थानो मोननाय नइ, खिन्थायोब्ला नों जेरावखि थाया मानो, नोंखौ बिनिफ्रायनो अरखांना लाना थांगोन।”

मोसाखौ हेफाजाब होनायनि थाखाय बेनि उननिफ्रायनो राजखुंगुरनो मोसाया सानफ्रोमबो माफायै सेसा होफैनो हमबाय। बेबादिनो गोबां सान बारलांबाय। सानसेखालि राजखुंगुरा जोबोर गोसा लोमजाबाय, बिमा बुरैया सासे कबिराजनियाव गोदान नायहैबाय। कबिराजआ गोदान नायनानै बुरैखौ बुंबाय जे सानैसो गुणि गियानि भक'टफोरखौ सेसा बेदरजों भज जाहोयोब्ला राजखुंगुरनि लोमजानाया हामगोन। बे बाश्राखौ खोनानानै बुरिया फिसाज्जानो खिन्थानायलाय राजखुंगुरा मोसाखौ भजनि थाखाय मानैसो सेसा लाबोनानै होफैनो खावलायबाय। मोसायाबो राजखुंगुरनि खावलायनाय लेखा भजनि सानखालि मानैसो सेसा लाबोनानै होफैबाय।

भजनि सानखालि न'खरनि गासैबो आलासि-दुमसि आरो गुनि भक'टफोरा राजखुंगुरनि न'आव भज जानो जबाय, बे समावनो गांसे बिलाइ खम जानायलाय सासे मानसिया थालिर बिलाइ गांसे दाननानै लायनो होननानै न' उनथिं थानानै नुहैबाय मानिबा माखासेमानि हारा (बेगें) दामोल जानानै दं। मानसिया हारानि दामोलखौ नुनानै हाखु-दाखु खारबोना गासैबो मानसिफोरनि सिगाडव बाथ्राखौ खिन्थानानै बुंबाय- “राइजोफोर, जों बेयाव भज जानो हाया, बियो माबा मोनसे गुबुन जुनारफोर जायो, नोंथांमोना फोथायाबा नायफै, नैबेयाव एसेबां बुरजा हारा दामोल जाबनानै दं, एसेबां बुरजा हारा दामोल जाबनानै दोननो बियो बहा मोनखो ?” बे बाथ्राखौ खोनानानै बयबो मानसिफोरा ओंखामनि बिलाइनिफ्राय सिखारना नायफैबा नुबायजे बाथ्राया नंमारगौ। अब्ला बयबो राजखुंगुरखौ सोंबाय- “बेफोर मानि हारा ? खर'फोरा बहा ? नों बाथ्राखौ बेखेवनानै खिन्थायाब्ला जों नोंनि न'आव भज जाया।” राजखुंगुरा फिननायाव बुंबाय- “जानो मोननाय जुनारनि अनगायै बेफोर गुबुन जुनारनि हारामुरा नड। नोंथांमोना गात्रि सानाबासिनो अननानै भजखौ जादो। आं नाथाय बाथ्रानि गुदि बिजौ नोंथांमोनो खिन्थानो हानाय नड, मानोना बाथ्राखौ बेखेवना खिन्थायोब्ला मोसाया आंखौ लानानै थांगोन। बिनिखायनो नोंथांमोना आंखौ नायनानै बाथ्राखौ दिहुननो सोंफ्लेबाय थायाबासिनो भजखौ जालांदो।” राइजोफोरा बिनि बाथ्राखौ खोनासंना फोथायनो हायैनि बिखौ बुंबाय- “जों बयबो सिखा-रुवा, बोरला-थिर लानानै नोंखौ नेबाय थागोन, थार बाथ्राया मा बेखौल' जोंनो खिन्था, नडब्ला जों भजखौ जाया।” राइजोनि बाथ्राखौ खोनानानै राजखुंगुरा राहागोथे जानानै बयनिबो सिगाडव हान्थु खरायनानै मोसानि गासैबो बाथ्राखौ राइजोफोरनो खिन्थानानै होबाय, बाथ्राखौ खोनानानै राइजोफोराबो बयबो जं-जाथि, सिखा-रुवा लानानै राजखुंगुरखौ नेबाय थाबाय। बे बाथ्राया जोबनाय लोगो-लोगोनो हरखाब मोसाया बहानिफ्रायबा फैना मानसिनि गेजेरनिफ्राय बिखौ थाब्रोम अरखांना लाना थांबाय। भज जानो फैनाय मानसिफोरा बिखौ दसे सम ओजों-ओजा नागिरना मोनैनि सान हाबनायलाय बयबो गावबा-गाव न'आव थांजोबूबाय।

ओजोंहाय मोसाया राजखुंगुरखौ लानानै मोनसे हाग्रामा गेजेराव मोनहैबाय। बैसानखालि राजखुंगुरा खाफाल मोजांमोन, थिक बे समावनो ओंखाम उखैनायजों

बिनि उदैया खेखे-खुखु गाबखांनो हमबाय। मोसाया राजखुंगुरनि उदैया गाबनायखौ खोनानानै सोंबाय- “नोंनि उदैया मानो खेखे-खुखु गाबदों?” बाश्राखौ खोनानानै राजखुंगुरा हरखाब मोनसे सोलो खालामनानै फिन होबाय- “आइया उन्दैयावनो जखायद’ खांखाय आंनो जाहोदोंमोन, बिनिनो जखायथाम खांखाया सिगाडवनो ओंखारलांबाय, दा जखायथाम दंबावो, दा बै जखायथाम खांखायानो ओंखारबोनो नागिरदों।” मोसाया खांखायनि मुं खोनानाय लोगो-लोगोनो सानबाय- “हे भगवान, मासे खांखायानो आंखौ खिगु-हासुगु खालामनानै आइ-आफानि हाबा नुहोदों, आरो जिदु जखायथाम खांखाय ओंखारबावनंगौबा आंहा मा अबस्था जानांगौ।” मोसाया बेखौनो साननानै राजखुंगुरखौ बेयावनो गारनानै खारलांबाय।

राजखुंगुरा मोसानि आखाइनिफ्राय गनानै लासै-लासै फैना मोनसे दैमानि सेराव फांसे गेरेमसा बिफां मोनहैबाय। बियो नुबाय, गेरेमसा बिफांनि सिडवनो हाग्रानि मैसोफोर थाग्रा खुलि। मैसोफोरा अब्ला बेयाव गोयैखौ नुनायलाय जायगायाव गोग्लैनानै थानाय गायखेरनि फेंफोनाखौ जानानै जायगाखौ सिबै-लिरै साफा-सुफा खालामनानै बिफां सायाव गाखोनानै थाबाय।

गासैबो मैसोफोरा बेलासियाव फोथारनिफ्राय फैबाय, ऐदिनखालि गावसोरनि थाग्रा खुलिया एसेबां साखोन-सिखोन जाना थानायखौ नुनानै बिसोरो बयबो गोमोजोबूबाय, बिसोरो हाग्रानि सोरगिदिं नायनानै रावखौबो नुयैलाय गावसोरनि गेजेरावनो खोथा-बाश्रा राइज्जायनानै उन्दुना थाबाय। अखानायै जेब्ला फुंआव मैसोफोरा फोथाराव गांसो जानो ओंखारलांबाय, अब्ला राजखुंगुरा बिफां सानिफ्राय लासैयै ओंखार बोबाय। मैसो फिसाफोरा आहार जानायाव बिसोरनि खुगानिफ्राय जायफोर फेंफोना हायाव गोग्लैना दंमोन बिफोरखौ बियो जानानै, सिगां साननि बादि गोबोरफोरखौ गारनानै सिबै-लिरै साखोन-सिखोन खालामना आरोबाव बिफां सायाव गाखोनानै थाफिनबाय। बै सानखालिबो बेलासियाव मैसोफोरा फोथारनिफ्राय गिदिंबोफिननानै जायगाखौ साखोन-सिखोन जाना थानायखौ नुनानै गोमोबाय आरो सोरथ’ बे खामानिखौ मावदों बिखौ हमनो थाखाय बिसोर राइज्जायलायनानै अखानायै मासे बोराइ मैसोखौ नेग्रा खालामना फोथाराव थांबाय। थांनोसै समाव बिसोरो बोराइ मैसोखौ बुंलांबाय जे- “नों मोजाडै नायबाय था, सोर बिदि सानफ्रोमबो फैनानै जोंनि

थाग्रा खुलिखौ साखोन-सिखोन खालामनानै दोनलाडो ? जों नॉनि थाखाय दै गांसो लानानै फैगोन ।” नाथाय सानजौफुनि सानदुं गोसा दुंनाय समाव बोराइ मैसोआ उन्दुलांसनबाय, मैसोआ उन्दुलानायखौ नुनानै राजखुंगुरा स्रोदयै बिफां सानिफ्राय ओंखारबोनानै सिगांनिबादिनो फेंफोनाफोरखौ जानानै जायगाखौ सिबझां-आरिखां साखोन-सिखोन खालामनानै बिफां सायाव गाखोनानै थाफिनबाय, नाथाय बोराइ मैसोआ इसेबो थरखौनो मोनासै ।

बेलासियाव मैसोफोर फैनानै बोराइ मैसोखौ मा नुखो होननानै सोंनायाव बोराइया बुंबाय- “आं जेबोखौनो नुआसै ।” बिसोरो बोराइजों जेबो खामानि जानाय नड साननानै अखानायै मासे खानि मैसोखौ नेग्रा खालामनानै गालांबाय । खानिया मोजां मेगनखौ गाहायथिं आरो खाना मेगनखौ साथिंजाय खालामनानै उन्दुबाय थानाय समावनो बैसानखालिबो राजखुंगुरा सिगांनिबादिनो गासैबो खामानिखौ मावखांनानै बिफाडव गाखोनानै थाबाय, खानिया जेबोखौनो नुवासै । बेलासियाव मैसोफोरा फैनानै खानिखौ बाथ्राखौ सोंनायाव खानिया जेबो नुवासै, होननानै फिन होबाय अब्ला बिसोर बुजिनो हाबायजे खानिया खाना मेगनखौ साथिं फारसे दोननानै उन्दुबाय थानाय थाखायनो बियो जेबो नुआसै । बेखेबाव बिसोरो गाहाइ मैसोखौनो नेग्रा खालामना दोननानै थानो थिग खालामनानै अखानायै बिखौनो खालामबाय । नाथाय बैसानखालिबो गाहाइ मैसोजोआबो सिल-मितै उन्दुलानायखौ नुनानै राजखुंगुरा ओंखारबोनानै फेंफोनाखौ जाना जायगाखौ गोखै साखोन-सिखोन खालामना बिफां सायाव गाखोनो नागिरनाय समावनो मैसोजोआ सारिमोनायलाय, बियो बिखौ नुनानै खारलांनानै सोंबाय- “नों मोदायना मानसि बुं, आरो नों मानसियानो जा एबा मोदायानो जा, सानिफ्राय ओंखारबो ।” राजखुंगुरा बुंबाय- “आं मोदायन नड, मानसिसो, आं ओंखारलांनो हाया, ओंखारलांब्लानो नों आंखौ सौना बुथारगोन ।” मैसोजोआ बुंबाय- “आं नोंखौ सौवा, नों ओंखारबो ।” राजखुंगुरा आरो बुंबावबाय- “नों आंखौ सौगोन ।” बिनि उनाव मैसोजोआ खोमा खेबना सदबांसा लानाय उनावसो राजखुंगुरा बिफां सानिफ्राय ओंखारबोबाय, गुदिनिफ्राय बिजौसिम गासैबो बाथ्राखौ बियो मौसोजोनो खिन्थाबाय । बिनि बाथ्राखौ खोनानानै मैसोआ अनखांनाय फैबाय ।

बियो बिखौ बुंबाय- “नों दिनैनिफ्राय रावखौबो गयाजासे बेयावनो था, नोंखौ जों जोंनि बिगोमा खालामबाय आरो नों गायखेर जानो थाखाय जों नोंनो उफ्रा मासे मैसोजो होगोन।” बेलासियाव जेब्ला गुबुन मैसोफोरा फैयो अब्ला गाहाइ मैसोजोआ गासैबो बाश्राखौ मैसोफोरनो खिन्थानायाव बिसोर जोबोर रंजानाय मोनबाय आरो राजखुंगुरखौ गावसोरनि बिगोमा होननानै बयबो मानिनानै लाबाय। बिनि उनाव बिसोरो खानि मैसोखौ बुथारना बिनि गं मोननैखौ राजखुंगुरनो होनानै बुंबाय- “बे गं मोननैनि मोनसेया दुखु आरो मोनसेया सुखुनि गं। जों फोथाराव गांसो जानो थाडेब्ला नों जिदु सुखुनि गंखौ दामनानै होयो अब्ला नों मोजाडै दं साननानै जों जोबोर गोसो खुसियै गांसो जाबथिंनो हागोन आरो जिदु नोंहा माबा मोनसे खैफोद जायो अब्ला नों जिदु दुखुनि गंखौ दामनानै होयो, अब्ला जों नोंखौ बासायनो थाखाय होसोबोगोन। नों जोंनि थाग्रा जायगाखौ सिगांनिबादि स्रां-स्रिं साखोन-सिखोन खालामनानै दोनबाय था।”

बेबादिनो गोबां सान थांबाय। सानसेखालि राजखुंगुरा बिफांनि मोनसे दालायाव जनानै खानाय खानाय समाव बोरैबा बिनि खर'नि दोंसे गोलाव खानाया जनानै दैयाव गोग्लैबाय। बे खानाय दोंसेखौ मासे गिदिर बारलि नाया बोरैबा जास'ननो मोनबाय। सानसेखालि सासे दुमनि जेयाव बै गिदिर बारलिनाया बिनि जेयाव नांबाय, नाया गिदिर, मेजेम आरो थै गोनां नुनानै दुमा बिखौ लांनानै राजानो दान हैबाय।

राजाया सासे जोंखोल-माखोल समायना फिसाजो दंमोन। रुवाथिफोरा नाखौ सायबाय थानाय समाव राजखुंग्रिया खाथियावनो गसंना नायबाय दंमोन। बारलिनि उदैनैफ्राय एसेबां गोलाव दोंसे खानाय मोननायखौ नुनानै राजखुंग्रिया बै दोंसे खानाया जायनि खर'नि बिखौ गोसोजों गोसो फिसाइ सानना लाना, बै खानायखौ मोनसे थेमायाव सोना दोनना, बोरनाय न'आव हाबनानै थाबाय। फिसाजोआ मानो बोरनाय न'आव हाबनानै थाखो होनना सोंब्ला फिसाजोआ बुंबाय- “जे बे खानायनि बिगोमाखौ लाबोनानै गावजों हाबा होयोबासो बिथाड बोरनाय न'निफ्राय ओंखारगोन नडब्ला बिथाड दै ओंखाम जायाबासिनो रानना थैलांगोन।” राजाया बे बाश्राखौ खोनानानै खाफाल हमना साननो हमबाय- बबेनि मानसियाबा खानाय हनानै दैयाव खानायखौ खोख्खैहरखो, आरो नायाबा खानायखौ बबाव मोनाना उदैयाव लाना फैखो, दुमआबा नाखौ बबाव हमखो?

बिथाड दा बिखौ बबाव नागिरना मोननो । फारसेथिं नडाबोला राजानि फिसाजोआ
थैनोसै । राजाया जोबोर आख' -फाख' आव गोग्लैना खर' गुदुं जाना खाफालाव
हमना जबाय थाबाय ।

राजखुंग्रिया मासे दाउखा फिसिदोंमोन । बियो राजानि दुखुखौ नुना
खाथियाव फैना बुंबाय- “महाराजा नोंथाड जेबो जिंगा खालामनो नाड, आं बै
खानायनि बिगोमाखौ दिहुनानै लाबोनो हागोन । नोंथाड आंनो खालि थायसेल'
थाइजौ गोमोन हर ।” राजाया दावखानि बाश्नाखौ खोनानाँ इसे हां लास्राना
हाखुदाखुयै गोमोन थाइसे थाइजौ नागिरना लाबहोनानै दाउखानो होबाय ।
दाउखाया बिरलांना राजखुंगुरनि खाथि मोनना बुंनो हमबाय-

“दुखु आरो सुखुनि गंखौ सोर दामो ?”

गोमोन थाइजौखौ सोर जायो ?

थाइजौ गोमोननि बाश्ना खोनानाय लोगो-लोगोनो राजखुंगुरा जानो लुबैनानै
फिन होबाय-

“दुखु आरो सुखुनि गंखौ आं दामो ।”

“गोमोन थाइजौखौ मोनोब्ला आंबो जायो ।”

राजखुंगुरा बिदि बुंनायलाय दाउखाया राजखुंगुरनो गोमोन थाइजौखौ
होबाय आरो राजखुंगुरा थाइजौखौ लानो आखाइ फोलावनायावनो बियो
हरखाबनो दुखुनि गंखौ साबखांना लानानै थांबाय । बेखायनोथ' मानसिफोरा
बुडे- “दाउखा आरो मावरिया गथ'नि सोलोजों सोर हानो ?” बियो राजखुंगुरखौ
माबोरै थगायखो नुबाय ? राखुंगुरनि आखाइनिफ्राय दुखु गंआ बिरलांबाय-
बेसेरानि लाउथियानो बायबाय । बिनि उनाव राजखुंगुरा सुखुनि गंखौ दामोसो
दामो नाथाय मैसोफोरा सुखु गंनि देंखोखौ खोनानानै बिसोरो गोसो खुसियै
गिदिं-गिदिं गांसो जाबथिंनो हमबाय ।

ओजोंहाय दावखाया राजानो दुखुनि गंखौ होनानै बुंबाय- “नै बे गंनि
बिगोमायानो बै खानायनिबो बिगोमा । नोंथाड आंजों आब्रा-ब'ब्रा, बानलु आरो
सानैसो थिनहर, आं बिखौ दिस्थिना हैनि ।” दाउखानि बाश्नाखौ खोनानानै राजाया
आब्रा-ब'ब्रा, बानलु आरो सानैसोखौ लिंहरना बिजों थिनहरफाबाय । बिसोरो
गोरलैयैनो राजखुंगुरखौ हमनानै लाबो हाबाय, मानोना दुखुनि गं गोयैलाय बिहा
गांखंआनो बायखाबायमोन ।

बुरै आबैनि सल'

राजखुंगुरखौ आब्रा-ब'ब्रा आरो बानलुमोना हमना लाबोना राजानो होफैबाय। राजखुंगुरखौ जेब्ला राजानि मानसिफोरा हमनानै लाबोयो अब्ला बियो लामा-लामा गावनि मोदोमनि जिफोरखौ जिख्लाबसे जिख्लाबसे बिसिनानै गारलांदोंमोन। मैसोफोरा बेलासियाव गलिसिम गिदिंबोफिननानै राजखुंगुरखौ नुयैलाय बिहा माबा खैफोद जादों साननानै राजखुंगुरा बिसिफ्लेना गारना गालांनाय बै जिख्लाब जिफोरनि सिनखौ संदानना थाडै-थाडै राजानि न' सहैबाय। राजाया मैसो फालो फैनायखौ गिनाय नुनायलाय राजखुंगुरा बेयो गावनि मैसो फालो होननानै खिनथाबाय। मैसोफोरा राजानि न'आव राजखुंगुरखौ नुनानै रंजाना मोसानो हमबाय। राजाया राजखुंगुरखौ बुंबाय- “जिदु बिसोरो नोंनिनो मैसो अब्ला नों बिसोरनि फाफ्लि फाफ्लि गेलेथिनो हागोनना?” राजखुंगुरा हागोन होनना मैसोनि फाफ्लि-फाफ्लि गेलेना दिन्थिनायाव राजाया बाथ्राखौ फोरमान मोनना गोजोननानै राजखुंगुरजों गावनि फिसाजोखौ हाबा होनानै बिजामादैखौ राजा खालामनानै गाव आजिरा मोननाय राजा जानानै थाबाय।



तेजिमला

सासे फालांगिरिया सानै बिसि दंमोन। गिदिरसिना सासेल' फिसाजो दंमोन, बिनि मुडा तेजिमला। उन्दै बिसिया सासेबो गथ'- गथाय गैयामोन। तेजिमलानि बिमाया तेजिमला गोरलै समावनो थैदों, बिनिखायनो उन्दै बिमा, बिमादैया बिखौ खाडै-बायै फेदेरदों। न'खरनि नायल'-जाल' सासेल' फिसाजो तेजिमलाया बिफानि आमाय थख्ल, मेगननि फिथाइमोन, नाथाय बिमादैया गोसोजों गोसो तेजिमलाखौ इसेबो नायनो हायामोन, खालि फिसाइखौ गिनानैसो तेजिमलाखौ खाडै-बायै गिदिर गोलाव खालमनो गोनां जादोंमोन।

आथिखालाव तेजिमलाया जि-जिसे बोसोरसो जाबाय। बै गामिनिनो सासे मोजां मानसिनि फिसाजोजों बिफाया तेजिमलाखौ बिलोगो खानानै होबाय।

तेजिमलानि बिफाया फालांगिरि मानसि, बेफार-फालांगियाव थाडबा जाया। बिनिखायनो बिथाड जेब्लाबो सोरगिदिं गिदिंबाय थानांगौ जायो। बेखेबाव बिथाड द'-स्नि मासनि थाखाय गोजान जायगायाव फालांगिनि थाखाय थानांगौ जाबाय। बिनिखायनो बिथाड थानोसै समाव बिसिखौ खाथियाव लिंनो लाबोनानै गावनि जोबोर अनजालि फिसाजो तेजिमलाखौ बिसिनि आखाइयाव गथायनानै बुंबाय- “बेखेबाव आं द'-स्नि दाननि थाखाय गुबुन हादोराव थानि। नोंनि आखाइयाव आं तेजिमलाखौ गथायबाय। बियो आजिगार हिनजावसा, बिखौ अनै-खानै मोजाडै लाखि।”

बिसिया सानबाय- बे खेबाव आंहा मोजां सुबिधा जादों, बे दान मोननैसोनि गेजेरावनो आं आंनि मेगननि सु-जें जाबोरखौ बोस्रानानै लानो हागोन। बिखौ थेख्साय-थेख्साय आंनि गोसोनि हाबिलासखौ होखारगोन। बियो आरो सानबावबाय- खालि थेख्सायनानैल' एगारा बिदि खालामनानैल' एगारोब्ला बिफाया फैनानै बै बाश्नाखौ बोरैबा मिथिमोनोब्ला न'खराव दावराव-दावसि जागोन। बे खैफोदखौबो खनसेलागैनो मुदा मारिथेखानांगोन। बिखौ हाबा हरनांगौ जायोब्ला आंनि न'खरनि माखासे दोहोन सम्फथि मुवा बेसादफोरखौसो बिनोनो हरफानो नांगोन। बियो जाबाय आंनि बिहारिनि फिसा।

आंनि खाफालावथ' रावबो फिसा-फिसौ जुफियासैयानो, बिहारिनि फिसाखौलाय अनै-बायै फेदेरना आंहालाय मा मुलामफा जानो ? बिफाया बिनो जिखिनि मुवा बेसाद हरफागोन, बैखिनिखौ आं आइनि न'आव हरोबा बांसिन बानजायनाय फैगोन । बनिखायनो बिखौ, बिफाया गिदिंबोफिननायनि सिगांनो मोनसे सोलो खालामनानै बिखौ गोजान खालामानै लानांगोन । बेखौनो साननानै बिफाया नावजों फालांगियाव ओंखारलांनाय सानखालिनिफ्रायनो तेजिमलानि दाय गोरोनथिफोरखौ नागिरनो हमबाय आरो जेसेबां हागौ तेजिमलाखौ हारसिं मोनना दुखु होबायथानो हमबाय ।

बे समावनो सानसे तेजिमलानि बिलोगोनि हाबा सौफैबाय । समफोर हाबा । बिलोगोनि न'निफ्राय तेजिमलाखौ हाबायाव लिंहरनाय जाबाय । हाबानि सानथाम सानब्रैसो बिसुखेनि न'आव थानानै तेजिमलाया रंजा-बाजा, थुखैस्रां लोबस्रां डै बिसुखेखौ हाबा होनांगौ । तेजिमलाया जोबोर हाबिला जे हाबा साननैसोआव बिसुखेनि न'आव थाना रंजा-बाजायै हाबा जागोन ।

बिमादैया गोबां दिननिफ्राय सानानै दोनबोनाय बाथ्राया जाफुंसारगोन साननानै तेजिमलाखौ हाबायाव थानो होनानै मानसिफोरनो दिन्थिनो मा-खालामनो मा-मानो, बेखौ गानहोनोना बैखौ गानहोनो, तेजिमलाया हाबायाव गाननो थाखाय बेखौबो दिहुनदों, बैखौबो दांदों- “नैबे जराया जोबोर समायगोन नडासै ? नैबे दखनाया नोंजों समायगोनना ?” बेफोरबादि बाथ्रा बुडै-बुडै-बिमादैया खुसि दिन्थिफ्लानो हमबाय । बिमादैया मोनसे मोजां समायना दख'ना ज'रासे आरो गांसे फालि दंमोन, उनाव बिमादैया तेजिमलानो हाबायाव गाननो दिहुनना होनानै बुंबाय- “आइ, नैबे जरासे जिखौ आं नोंनो हाबायाव गाननो थ'फ्ला बोननानै होनि । नों दा नोंनि मोदोमाव थानाय जिजोंनो लोगोनि न'आव थां, लोगोनि न' खाथि मोनहैयोब्ला थ'फ्ला बोननानै हरनाय द'खना आरो फालिखौ गान, न'निफ्रायनो बे जिखौ गानलाडोब्ला लामायाव धुला-बाला नांनानै गात्रि जागोन ।” बिदि बुंनानै बिमादैया फालि-द'खना ज'रानि गेजेराव सिरि-सिरि मासे एनजर आरो हांगारफोर सोनानै थ'फ्ला बोनना होनानै तेजिमलानो होबाय ।

बिलोगोनि न' मोननोसै मोननोसै समाव तेजिमलाया बिमादैनि बाथ्रा मतै आगर गोनां द'खना आरो फालिखौ गाननो थाखाय थ'फ्लाखौ खेवबा नुबाय हि सिंनिफ्राय मासे एनजर ओंखारनानै खारलांबाय आरो जिनि सिंनिफ्राय

माखासे हांगार ग'बोबाय । तेजिमलाया नुनानै खर' गिदिंबाया एनजरबो द'खना आरो फालिखौ थेर-बेथेर खालामबाय आरो हांगाराबो गेजेर गेजेर दाग्ला-दाग्लि नांबाय । तेजिमलाया गिनायजों गारामा रानखांबाय, बियो गिनायजों थोर-थोर खमफिना फेफे-फुफु गाबनो हमबाय । लोगोआव थांफानाय मानसिफोराबो बे जाथाइखौ नुनानै गोमोबाय, उनाव तेजिमलाखौ गोबां बुजाय-आजाय बिलोगोनि न'आव लाना थांनानै फालि आरो द'खना बिनानै बिखौ गानहोना हाबायाव लानानै थांबाय । हाबानि उनाव तेजिमलाया गावनि न'आव गिदिंबोफिनबाय, बिमादैया बिखौ हिनि बाथ्रा सोंनायलाय बियो गिनायजों खमफि-खमफि बै जिफ्लेनाय आरो हांगार नांफबनाय हिनि थ'प्लाखौ बिमादैनो दिहुनना होबाय । बिमादैया जिफ्लेनाय आरो हांगार नांफबनाय हिखौ नुनानै रागाजों हुस गैयै जाफ्ताना तेजिमलाखौ रायै-बुयै नोरजिया खालामबाय । एसेबां बुसेयावबो बिमादैया अहानाय मोनासै । तेजिमलाखौ नाखां-नासि लाबोनानै बिमादैया दिंखियाव माइ लुना होना गाव दुम-दाम दिंखिगाना बिखौ एरनानै होनो थिनबाय । बिमादैया सौबाय थानायावनो खनसे हरखाब खाबु नायनानै दिंखिखौ गारना होनानै तेजिमलानि आगदा आखाइखौ सौखुबनानै होबाय । आखाइ सौखुब जानानै तेजिमलाया सानायजों होसिखावना गाबनो हमबाय, बिमादैया तेजिमलानि बिखुंआव हासिबजों बुसे बुनानै बे खेबाव आगसि आखाइजों माइ एरना होनो हुकुम होबाय । आगसि आखाइजों माइ बिरबाय थानाय समावनो बिमादैया खाबु नायनानै आगदा आखाइबादिनो आरोबाव आगसि आखाइखौबो सौखुबनानै होबाय, आगसिखौ सौखुबखांनानै बिनि उनाव बिमादैया तेजिमलाखौ आगदा आर्थिजों माइ एरना होनो थिननानै आगदा आर्थिखौबो सौखुबबाय आरो बिनि उनाव बिदिनो आगसि आर्थिखौबो सौखुबबाय । उनाव बिमादैया तेजिमलाखौ खर'जों माइ एरना होनो थिननानै तेजिमलानि खर'खौबो सौखुबबाय । बिदिनो उनाव तेजिमलाया इनायै साजा होजानानै थैलांबाय ।

बिदिनो फिसाइनि स'ना फिथर अनजालि तेजिमलाखौ बुथारना खारबारि बिसिया रावबो मिथियै नुयैबादि हाखा-दावरा बुद्रुना लाना थांनानै दिंखिसालिनि दै गोलैग्रा जायगायाव हाखर मोनसे जावनानै तेजिमलाखौ फ'बनानै दोनबाय ।

तेजिमलाखौ फ'बनाय जायगायाव साननैसो उनाव फांसे लाव बिफां रजनानै लोब-लोब देरबोबाय आरो बिफाड माखासे मेगनाव गोनां लाव फिथाइ

थायबाय। ओजोंहाय न'सुंसेनि मानसिफोरा गोबां सान तेजिमलाखौ नुनो मोनैलाय, बिमादैखौ बिनि सोमोनदै सोंनायाव फिन होबाय- “तेजिमलाया बिलोगोनि न'निफ्राय फैनायानो जायाखै।”

सानसेखालि सासे बिबायारि बुरैया फालांगिरिनि दिंखिसालि न'नि उखुमाव माखासेमानि लाव थायना थानायखौ नुनानै फालांगिरिनि बिसिनि खाथियाव फैनानै बुंबाय- “आइ आंनो लाव थायसे हर।” तेजिमलाया थैनाय साननिफ्रायनो बिमादैया दिंखिसालिफारसे थाइखैमोन बिनिखायनो बियो उखुमाव माखासे लाव थायना थानायखौबो बियो नुवाखैमोन। बिनिखायनो बियो बिबायारि बुरैखौ बुंबाय- “आं नोंनो हरनो बहा लाव मोननो? आं गावनो गोबां सान लाव मोनजायाखै।” बिबायारिया बुंफिनबाय- “आइ, मानो बिदि बुंदों, नोंसानि दिंखिसालिनि उखुमावनोथ’ माखासेमानि लाव थाइनानै दं।” बिबायारि बुरैनि बाथ्राखौ खोनानानै गोमोनायजों फालांगिरि बिसिया बुंबाय- “आं हले नुवाखै, नों नुदोंबोला थाइबेसे नांगौ लानानै थां।” बुरैया बे बाथ्राखौ खोनानानै लाव बिफां खाथियाव फैना थाइसे फिथाइ खानो थाखाय आखाइ फोलावनाय समावनो लाव बिफाड खाराव-मारावै बुंबाय-

“आखाइबो फोलावनाड लावबो खानाड बहानि बिबायारि नों फालि द'खना जिनायनि मादैया आंखौ देखुबबाय, आं तेजिमलासो।”

लावबिफाड माथो होनायखौ नुना बुरैया गिनानै लावखौ खायाबासिनो फैनानै खारबारि बिसिनो बाथ्राखौ खिन्था फैबाय- “आइ, आं लाव खानो आखाइ फोलावनायावनो लाव बिफाड आंखौ एरै होनना माथो होदों। आंनो आरो लाव नालिया आइ, आं थानोसै।” बिदि बुंनानै बिबायारिया ओंखारलांबाय। अब्ला खारबारि बिसिया गुबै बाथ्राखौ मोजाडै बुजिमोननानै, सिखा गंसे लाना लाव बिफांखौ दानना बुद्रुना लाबोनानै न'नि बारि उनथिंजाय गारहैबाय।

लावबिफांखौ दाननानै जा जायगायाव गारदोंमोन बैखिनि जायगायाव साननैसोनि उनाव फांसे नारेंबिफां जाना रजनानै दालाइ-बिलाइ बहरा नारेंफिथाइ थाइनानै दंमोन। बिफाडव नारेड एरैबादि थायदोंमोनजे बिफांनि दालाइ-बिलाइफोरानो देमग्लायजोबदोंमोन। सानसेखालि सानैसो लाउखारफोरा मोसौ गुमनाय समाव बै नारेंबिफाडव नारेंफिथाइखौ नुना जानो लुबैनानै खारबारि बिसिनि खाथियाव फैनानै बुंबाय- “आइ जोंनो थाइनैसो नारेंफिथाइ जानो

होगोनना ? “आं बहानिफ्राय नारें हरनो ?” बिदि बुंल्ला बिसोर बुंबाय- “मानो आइयै, नोंथांनि बारि उनथिंजाय माथो बिफां देमगुलायजासे नारें फिथाइ थायनानै दं।” बिसोरनि बाथ्राखौ खोनानानै खारबारि बिसिया गोमोनानै बुंबाय- “आं हले बहा नारें दं नुवाखै, नोंसोर बहाबा नुदोंबा लानानै थां।”

खारबारि बिसिनि हुकुम मोननानै लाउखारफोरा नारेंबिफां सेराव थांनानै नारेंफिथाइ खानो नागिरनाय समावनो बिफाड खाराव-मारावै राव होबाय-

“गामिनि लावखारफोर, आगैबो बुडे, आदाबो बुडे आं।”

“आखाइबो फोलावनाड, नारेंबो खानाड, न'आव गिदिंलांफिन।

फालि-द'खना जिनायनि मादैया आंखौ देखुबबाय, आं तेजिमलासो।”

लाउखार गथ'फोरा बे खाराव-माराव बुंनाय रावखौ खोनानानै माबा मोदाय-दावदाय बिफाडव दं साननानै नारें फिथाइखौ खायाबासिनो बारिनिफ्राय फैनानै खारबारि बिसिनो बे बाथ्राखौ खिनथाना थांफिनबाय। खारबारि बिसिया हरखाबनो बै लाव बिफांखौ थिग बे जायगायावनो गारना दोनदोंमोन बियो गोसोआव गोग्लैबाय। बे बाथ्राया गोसोआव गोग्लैबा बियो बुजिमोनबाय जे तेजिमलायानो नारें जानानै दं। बेखौनो साननानै बियो नारेंबिफांखौ दाननानै दैयाव फोजाव हरबाय।

नारें बिफाड दैयाव गोजाव लांनानै खाथिनिनो मोनसे गाथोनाव नांथाना फांसे फदुम बिफां जानानै बारसे जोंखोल-माखोल जोबोर समायना बिबार बारबाय। साननैसोनि उनाव बेफार-फालांगि खालामखांनानै बै दैमाजोंनो तेजिमलानि बिफाया नावजों फैबायथानाय समाव दैमा गाथोनाव बारसे समायना फदुम बिबार बारनानै थानायखौ नुना तेजिमलानो बे बिबारखौ लाना थांनो साननानै सासे नाव जावग्राखौ बिबारखौ खाना लायनो थिनबाय। नावजावग्राया बिबारखौ खानो होननानै आखाइ फोरावनायावनो बिबारा खाराव-मारावै बुंबाय-

“आखाइबो फोलावनाड, बिबारबो खानाड, बहानि नावजावग्रा नों”

फालि-दखना जिनायनि मादैया आंखौ देखुबबाय, आं तेजिमलासो।”

बिबारा खारव-मारावै बुंनाय रावखौ खोनानानै नावजावग्राया गिनानै खारबारिनो खिन्थाहैबाय, बाथ्रायालाय नंगौना नड साननानै खारबारिया खाथियाव फैना बिबारखौ खानो आखाइ फोलावबानो बिबारा खाराव-मारावै बुंबाय-

“आखाइबो फोलावनाड, बिबारबो खानाड, हे अनजालु आफा।”

फालि-द'खना जिनायनि मादैया आंखौ देखुबबाय, आं तेजिमलासो।”

बिफाया तेजिमला बिमादैनि आखल-आखुखौ सिगांनिफ्रायनो मिथिखागौमोन, बिनिखायनो बियो सानबाय जे- बियो थारैनो तेजिमलायानो जामारगोन। बेखौनो साननानै खारबारिया गावनि आगसि आखाइयाव खुगानिफ्राइ खान्दिसे गय सावफ्लेनानै लाबाय आरो आगदाथिं मोनसे लारु लानानै बुंबाय- “जिदु नों आंनि अनजालि तेजिमलायानो नंमारगौ, अब्ला थारैनो नों दावसि जाना बिरबोनानै आंनि आखाइयाव बाफैनानै बे गय सावफ्लेनायखौ जागोन। आरो जिदु नड गुबुन सोरबासो जायो अब्ला लारुखौ लांगोन।” बेबादि बुंनाय लोगो-लोगोनो फदुम बिबारा मासे दावसि जाना बिरबोनानै बिथांनि आखाइयाव बाफैना गय सावफ्लेनायखौ जाबाय। बिफाया अब्ला बियो थारैनो तेजिमलायानो जाथारगोन साननानै दावसिखौ मोनसे फेन्नायाव सोनानै नआव लाबोफाबाय।

खारबारिया न'आव फैना बिसिखौ सोंबाय- “तेजिमलाया बहा थांदों?” बिसिया बुंबाय- “बिमायनि न'आव थांदों।” सदागरा बिसिखौ फाखाय-फाखाय सोंथि सोंनानै थार बाथ्राखौ दिहुनना सिमान लाहोबाय। बिनि उनाव दावसिनि मोदोमाव गावनि गांसे फालिखौ गारनाहोनानै बुंबाय- “जिदु नों आंनि तेजिमला नंमारगौ आरो जिदु नोंहा आंनि फारसे अननाय दं, नों बे गामसाखौ गाननानै मानसि जाफिन।” बे बाथ्राखौ खोनानानै तेजिमलाया सिगांनिबादि सासे जोंखोल-माखोल समायना सिख्ला जाफिनबाय आरो खारबारिया अब्लानो बिसिखौ न'निफ्राय होखार हरबाय।



बोराइ बुरै आरो सियाल

सानै बोराइ बुरै दंमोन । सानसेखालि बोराइया माखासे थारुन लाबोनानै गायगासिनो दंमोन । थिग बे समावनो खाथिनि हाग्रानिफ्राय मानैसो सियाल फैनानै बोराइखौ बुंबाय- “आबौ, नों थारुनखौ गोथाडै गायदोंना रुनानै गायदों ?” बोराइया फिन होबाय- “फिसौ आं थारुनखौ गोथाडै गायदों ।” सियाला बोराइनि बाथ्राखौ खोनानानै मिनिना बुंबाय- “आबौ नों थारुन गाइनो रोडाखै, थारुनफोरखौ सिगां रुगोनानै ला । आरो जेराव गायगोन बेवहाय हाखर जावनानै मोजाडै लाय बिलाइजों खोबना गायना दोन, नों नुगोन हरसेनि गेजेरावनो थास’आ लोब-लोब देरबोदों ।” बिसोरनि बाथ्राखौ खोनानानै मिनिना बोराइया बुंबाय- “आदसा, आबौमोन, आं नोंसोरनि मतैनो थारुनखौ गायमारनि ।”

बेलासियाव बोराइया सियालनि सोलो मतैनो थारुनखौ रुनानै जुथे लाइजों जुना गायनानै दोनबाय । मोनायाव सियालफोरा फैनानै गोसो खुसियै रंजा रंजा थारुनखौ जाजोबनानै थांफिनबाय । अखानायै बोराइया फुडावनो सिखारना थारुनखौ नायनो थाडोब्ला नुबायजे थारुना दरसेबो गैया । अब्लासो बोराइया थार बाथ्राखौ मिथिना लाजिनायजों मोखां सोमखे जाना जिंगा सिबाय थाबाय ।

बे जाथाइनि साननैसो उनाव बोराइया मोनसे सोलो खालामना बुरैखौ बुंबाय- “बुरै, दिनै नों आंनि मोदोमाव खुसेर बिदै सारदलानानै दोन । खुसेर बिदैनि मोनामनाय मोनब्ला थामफैफोरा फालो-फालो फैनानै आंनि मोदोमाव बाफैगोन, अब्ला नों खाराव-माराव आंनि बोराइया थैबाय होनना गाबूबाय था । नोंनि गाबनायखौ खोनानानै सियालफोरा खाथियाव फैनानै मा जादों होनना नोंखौ सोंब्ला नों बिसोरनो बोराइ थैबाय होनना खिनथाना गोथैखौ न’सिंनिफ्राय दिहुनना लानानै जाहैनो थिन । आंनि खाथियाव नों गंसे थख’न दोनखोमानानै दोन । बिसोरो आंखौ दिहुनना लानो न’सिंआव हाबखांबानो नों लासैयै दरजाखौ फांथेनानै हो, दरजा फांनाय लोगो-लोगोनो आं दुफु सिखारना बिसोरखौ बुनानै बुथारगोन ।” अखानायै बुरैया बोराइनि बाथ्रा मथैनो मावमारबाय, सियालफोराबो

फालो-फालो फैनानै बुरैखौ सोंबाय- “आबै मानो गाबदों ? मा जादों ?” बुरैया फिन होबाय- “फिसौफोर, दिनै आंनि बोराइया थैबाय, बिनिखायनो आं गाबदों। नोंसोर जिदु हायो बोराइखौ बाइजोआव दिहुनना लानानै जाहैथां।” बुरैन बाथ्राखौ खोनानानै सियालफोरा रंजाखांबाय, बिसोर फालो-फालो बोराइखौ दिहुनना लानो न’सिंआव हाबखांनाय उनाव बुरैया लासैयै दरजाखौ फांथेना होबाय, सिगां बुंखानाय बादिनो बोराइया दुफुं सिखारना थख’नखौ लानानै सियालखौ फारसेनिफ्राय बेखौ बुलाय बैखौ बुलाय बुथारजोबबाय। बिसोरनि गेजेरनिफ्राय खालि माब्रैल’ सियाल बौरैबा खारगलांबाय।

साननैसो उनाव सानसेखालि बुरैया बोराइखौ बुंबाय- “आं गोबाव सान सियालखौ गिनानै जेरावबो ओंखाराखै, फिसाजोनि न’आव फाखोसे थानानै फैनो सानदों, गोसोफोरखौबो मोजां मोनथाराखै।” बोराइया बुंबाय- “बुरै, नों थाडोब्ला सियालफोरा लामायाव नोंखौ हारसिं मोननानै जागोन।” बुरैया बुंबाय- “जानो हाया हाय आंखौ, आं जेरैखि जाया थांथारगोन।” बिदि बुंनानै बुरैया फिसाजोनि न’आव ओंखारलांबाय। लामायाव सियालफोरा बुरैखौ हारसिं मोननानै बेंखनना लानानै बुंबाय- “बुरै नोंखौ दिनै जों एरैनो एगारा, नोंखौ जों जागोन।” बुरैया फिन होबाय- “नोंसोर जानो होनदों जेला जानो हागोन दे, नाथाय आं गोबाव सान फिसाजोखौ नुवाखै, गोसोखौ गाज्जि मोनगासिनो, बिनिखायनो थैनायनि सिगां फिसाजोखौ नायस्रानानै फैनो होननानै सानदों। आं गिदिंनानै फैफिनब्ला जा दे।” सियाला बुंबाय- “नों गिदिंनानै फैफिनाब्ला ?” “आं खिरा लानानै बुंदों, बे लामाजोंनो आं थाबैनो फैफिनथारगोन। बेनिउनाव आरो नोंसोर जि खालामो खालाम।” बुरैन बाथ्राखौ फोथायनानै सियालफोरा बुरैखौ एगारना हरनायलाय बुरैया फिसाजोनि न’आव स’हैबाय। फिसाजोनि न’आव साननैसो जायै-लोडै थानायनि उनाव बुरैया सानसे फैफिननो ओंखारनानै लामायाव सियालनो बुंभोनाय गासै बाथ्राफोरखौ फिसाजोनो खिन्थाजोबबाय। अब्ला फिसाजोआ बिमाखौ बुंबाय- “आइ, आंनि न’आव मोनसे गिदिर लाव ख’था दं, नों बेयाव हाबनानै न’सिम सहैनो हागोन। अब्ला सियालफोरा नोंखौ नुनाय नड।” बुरैया फिसाजोनि सोलो बादिनो लाव ख’था सिंआव हाबनानै दुदु लांबाय थानो हमबाय, थिग बे समावनो सियालफोरा लाव ख’थाखौ नुनानै गावजों-गाव राइज्जालयनो हमबाय- “बेयो जोबोर गोमोथाव बाथ्रा, नुदोंना लावआ

माबोरै दुद्रुबोदों, थारैनो बेयो लाव नझ बेनि सिंआव माबा मोनसे दंथारो ।” बिदि बुंनानै बिसोरो लावखौ जोयै-जोयै सिफायगारबाय । जेब्ला लाव ख’थाया बायो अब्ला बुरैया ओंखारबोबाय । बिसोरो बुरैखौ नुनानै खुसिजोंनो मिनिखाख्लायना हुवा-हुवा होनना गाबनो हमबाय । बिसोरो बुरैखौ बुंबाय- “बुरै नों जोंखौ थगायना खारखोमालांनो नागिरदोंमोन । दा नों मा खालामनो ? जों नोंखौ जानोसै ।” बुरैया फिन होबाय- “माथो खालामबावनो जानो लुबैदों जेला जानो हागोन, नाथाय आं फिसाजोनि न’आव मोनसे गोदान समायना मिलौदो मोसानाय सोलोंबोदों, आं थैनानै थांबोला आं सोलोंबोनाय मोसानाया आंजोंनो थांफागोन नोंसोर रावबो नुनाय नझ, बिनिखायनो आं बे मोसायनायखौ नोंसोरनो दिनथिलांनो गोसो, बिनि उनाव नोंसोर आंखौ जा ।” बुरैनि मोसानायखौ नायनो लुबैनानै बिसोरो बुरैनि बाथ्रायाव राजि जाबाय, अब्ला बुरैया बुंबाय- “आं मुं गाबज्रिनानै होगोन, नोंसोर बयबो नोंगौ-नोंगौ होननानै बुंलां अब्लासो आंहाबो मोदोम दुंखांगोन । बेखिनियावनो मख’नो हायो जे बुरैया लाव ख’थायाव हाबना दुद्रुबोनानै न’ खाथिसिम सफैखाबायमोन । बुरैया न’आव मानै बांग्रा-बांग्रि, सैमा दंमोन । बुरैया गिदिडै-गिदिडै मोसा-मोसा मेथाइ खननो हमबाय-बांग्रा ओइ, बांग्रि ओइ, सियालफोराबो बुंबाय- “नंगौ नंगौ” बेबादिनो बुरैया मोसानानै बुंबावबाय- “गोसोम ओइ, गोजा ओइ” जेब्ला बुरैनि बे सल’खौ बांग्रा-बांग्रि सैमा मानैया खोनानानै खारबोबाय । सैमा मानैखौ नुनाय लोगो-लोगोनो सियालफोरा गावबा-गाव फोरसा-फोरसि खारजोबलांबाय आरो बेबादिनो जोंनि बुरैया न’आव फैफिननायसै । जोंनि हि-जोमफोरा गोसोम जानायलाय जोंबो गिदिंबोफिनबाय ।



आयथें गोलाव

सासे बुरै दंमोन। बियो फालोसे मोसौ गाय फिसिनानै बिन गायखेर फाननानै जेनथेन थोब्लिद-माब्लिदयै सोलिबाय दंमोन। बिनो उन्दुग्रा न'आ जोबोर गोजाम। बिन उखुमा गब्र' लांनाय, अखा हायोब्ला उखुमजों अखा सेरो। सानसेखालि हराव बोथोरा दोमैलु जानायलाय बुरैया जाखां लोंखां उन्दुनाय समाव बुंबाय- “हे, गसाइ आइथें गोलावा जेन फैया।” बिदि बुंनानै बुरैया उन्दुनानै थाबाय।

बै सानखालिनो हराव सासे सिखावा बुरैनि मासे मोसौ खावनानै लांनो होननानै ग'लि सेराव थाखोमाना थानानै बुरैया उन्दुलांनायखौ नेबायदंमोन। बै सानखालिनो मासे मोसायाबो बुरैनि मोसौखौ जानो गोसो जानानै सिरि-सिरि खोमसि-खोमलाव फैनानै मोसौनि फालो गेजेराव हाबना बिबो बुरै उन्दुलांनायखौ नेबाय दंमोन। मोसा आरो सिखाव सानैबो बुरैया बुंनाय बै बाश्त्राखौ खोनाबाय। नाथाय आइथें गोलाव मानेबा मा बेखौ बुजिमोनैयाव बिसोर साननो हमबाय- “आइथें गोलावाबा मा?”

बुरैया गोदो गोदो उन्दुलांबाय। सिखावा मोसौखौ खावनो थाखाय गुलियाव हाबहैबाय। सिखावा सानबाय- “बबे मासे मोसौआ मोजां आरो बबे मासे मोसौआ गात्रि, दा खोमसि खोमलाव माबोरै सिनायनो? बिनिखायनो जाय मोसौनि खिथुआव आखाइ होनाय लोगो लोगोनो बादलखाडे, थारैनो बे मोसौआनो बयनिखुइ साबसिन मोसौ जागोन।” बिदिनो साननानै बियो माफा-माफायै मोसौ खिबुयाव एगथुलांनो हमबाय। थिग बिदिनो एगथुनानै नायलांबाय थानायावनो मोनसे समाव मोसानि खिबुयावबो आखाइया गोगलैनायाव मोसाया बाज्लखांबाय। सिखावा सानबाय- “बेयो जोबोर कारहा मोसौ बेखौनो लांनांगौ जाबाय।” बेखौनो साननानै बियो मोसानि लानजायाव हमना फाखायना होबाय, मोसाया सानबाय- “बे खेबाव बुरैया बुंनाय बै आइथें गोलावानो आंखौ हमबाय।” बेखौनो साननानै मोसाया आरोबाव बागदावखांबाय। सिखावा सानबाय- “बेयो इसेल' मोसौ नडदै। बिन बिखुंआव गाखोआब्ला हले बिखौ लांनो

हानाय नड देइ ।” बेखौनो साननानै सिखावा बाज्लगसिनो बिखुंआव गाखोबाय, मोसाया थिग बिखौ थारैनो आथिं गोलावानो मोजाडै हमथारबाय साननानै गलिनिफ्राय ओंखारना सिथिब्रबना खारनो हमबाय । सिखावाबो मोसौनि गोहो बोलो आरो बाहादुरिखौ नुनानै बुजिबायजे बियो मोसौ नड, माबा आइथें गोलावसो । दिनै आंखौ थारैनो आइथें गोलावासो मोनबाय । सानैयाबो सानैखौनो आइथें गोलाव साननानै रावहाबो गिनायजों थर गैलायै जाबाय ।

मोसाया सिखावखौ बिखुंआव लाना खारलानानै हाग्रायाव हाबहैनाय समावनो सिखावा गिनायजों थै-थां बिनि फाफ्लियाव हमख्र'बबाय । अब्ला मोसाया सानबाय, “अह, बियो आइथें गोलाव नड, माबा सिं देमनायसो ।” मोसाया गिनानै आरोबाव गोख्रैसिन खारनो हमबाय । सिखावा मोसानि फाफ्लियाव गोब्राबै हमनानैबाबो लाखिनो हायैलाय बिनि आखाइया मोसानि लानजायाव गोग्लैनायाव मोसाया आरोबाव गोख्रैसिनै खारबावबाय । मोसाया खारनायनि खुबाव सिखावा मोसानि बिखुंआव जबायथानो हायैनि हायाव गोग्लैबाय । नाथाय बियो मोसानि लानजाइखौ एरैबादि गोरायै हमदोंमोनजे मोसानि लानजाया सिखावनि आखाइ मुथियावनो स'से थालांबाय । मोसाया खारनानै गबाय । बियो हाग्रा गेजेर मोननानै इसे हां गोलाव लास्रानानै साननो हमबाय, बिखौ सिं खेंखाया नड खेंखायग्रायासो मोनदोंमोन । ओजोंहाय सिखावा आखाइयाव थालांनाय लानजाय ससेखौ दांनाय बिलिरनाय नायनानै नुबायजे बेयो मोसौनि एबा गुबुन माबा जुनारनि लानजाइ नड, बेयो मोसानिसो लानजाइ । अब्लासो बिनि गोसोआव गिखांनो हमबाय । हरआ सोरांनो अब्ला गोबाव सम दंभावोमोन । बिनिखायनो बियो हर स'सेखौ थांहोनो थाखाय खाथिनि फांसे गिदिर थाइजौ बिफांआव गाखोना थाबाय ।

ओजोंहाय मोसाया हाग्रामायाव हाबहैनानै खेंखायग्राया गावखौ लानजाय बस'नाय बाश्राखौ लोगोफोरनो खिन्थानायाव, बिसोरो राइज्लाय होनज्लाय थिग खालामबायजे- “बियो जोबोर लासिं-सिंनि बाश्रा जादों, जों हाग्रानि राजा, बिनिखायनो जों जोंनि लोगो राजा सासेखौ खेंखायग्राया बिदि लाजिफोनांगोन, बे इसेबो सहायथावै बाश्रा । बेनि जों खिथेर लायाब्ला, खेंखाया हमनाय बे मोसाया खालि लानजाय ल'सो गोमादों, जोंहा नाथाय खोमा-गनथं गासैबो ज'जोबदों आरो बिनि अनगायैबो खेंखा राजा होननानै जिदु जोंनिखुइ

सोरबा बोलोगोरासिन जुनार उजिदों, अब्ला जों राजानि सारिनिफ्राय थांनानै बन रोगाग्रा, दै रोगाग्रानि सारियावसो गोग्लैसिगोन ।' बेखौनो साननानै मोसाफोरा ज' जाना बेखौनो थिग खालामबायजे इसेबो गोबाव खालामाबासिनो दानो खेंखायग्राखौ नागिरना बिनि बेरेखायै दाउहा नांहैनांगौ ।

सानगानैसो मोसाफोरा ज' जानानै खेंखायग्राखौ फिद-फिद नागिरनो हमबाय नाथाय जेरावबो खेंखायग्राखौ नागिरनानै मोनासै । जोबथारनायाव मासे मोसानि मेगना बै थाइजौ बिफांनि सायाव गोग्लैबाय, बियो खेंखायग्राखौ मोनबाय होननानै खिन्थाहरनाय लोगो-लगोनो गासैबो मोसायानो ज' जाना रंजानायजों होसिखावबाय । दसे सम बिसोर सानै हयै मोनसे सोलो दिहुनबाय । बिफां सानि खेंखायग्राखौ मोनहास'नो थाखाय बिसोर मासेनि बिखुंआव बि मासे आरो बिनि बिखुंआव गुबुन मासे बेबादिनो गाखोयै गाखोयै गोजौ जालांबाय । सिखावा सानबाय बिहा दासो खैफोद फैदों । बियो सानबाय दिनै थैयाबा आं आरो थैला । दसेलानैनो सिखावा मोनसे सोलो खालामबाय । बियो नुबाय जे, बयनिखुइबो गाहायाव बै खेंखायग्राया मोननाय मोसाया दं । बै लानजाय खान्दा मोसाखौ सिखावा बलबला रावजों माथो हरबाय- “ओइ लानजाइ खान्दा, मा ख'बर ।” बै मोसाया सानबाय- “खेंखायग्राया गुबुन मोसाफोरखौ गारनानै आंखौसो हमबावसिगोन नामा ।” बेखौनो साननानै बियो गावनि साननो हानाय गोहोखौ खोमाना हाग्रा गेजेराव खारलांबाय । बियो बिदि खालामनायाव बिनि बिखुंआव थाखो-थाखो गाखोनाय माफ्रोम मोसाफोरानो गिर-गिर गाहायाव गोग्लैजोबबाय । बिसोरबो जोंखौबो खेंखायग्राया हमबाय साननानै जोबोर गिनानै हां सरथेलायजासे खारनानै हाग्रायाव हाबहैबाय ।

सिखावा हरखिनिखौ बे बिफाडवनो थानानै अखानायै फुंआव न'आव फैफिनबाय आरो बै साननिफ्रायनो बियो आरोबाव सिखाव खावला होननानै सदबांसा लानायसै ।



ના થ'ફા

સાનસેઘાલિ નાફોરા જ' જાલાયનાનૈ ના જાગ્રા જુનારફોરજોં દાઢહા નાંનો થિ ઘાલામનાનૈ આફાદ જ'ગ્રા બિલોનિ ગોથૌસિન ફુઘિયાવનો સાનજૌફુ સમાવ આફાદ જબાય। બૈ આફાદઆવ રૌ, બારલિ, ઘાવૈ, સેનાર, ગોરિ આરિફોરઘૌબો લાફાનાનૈ ગાસૈબો રોઘોમનિ નાયાનો નુજાફૈદોંમોન। બયબો નાયાનો નુજાફૈનાયલાય લાનથા મુરા ગોરિ નાઘૌ બૈ આફાદનિ આફાદગિરિ સાયઘબાય આરો માસે જાંગિલા નાસેનો લિંથુમગ્રાનિ બિબાનઘૌ હોબાય। લિંથુમગિરિયા ના થ'ફાઘૌ આફાદઘૌલાય માનો હાંઘાયનાય જાદોં બયનોબો મોજાઢૈ બુજાયનાનૈ હોનો બુંનાયલાય ના થ'ફાયા આઘાય ઘબજ'બનાનૈ બુંનો હમબાય- “રાઢજોફોર દિનૈ આં નોંથાંમોનનિ આફાઘિઘૌ ઘર'આવ લાનાનૈ જોંનિ લિંથુમગિરિયા હાંઘાયનાય લેઘા નોંથાંમોનનિ સિગાઢવ ફંનૈસો બાથ્રા બુંનો નાગિરદોં, જિદુ આંનિ બાથ્રાયાવ માબોરૈબા ગોરોનથિ જાયો, અબ્લા આંઘૌ જામ્બા સેંગ્રા સાનનાનૈ આંનિ દાય- ગોરોનથિફોરઘૌ નિમાહા હોયો જેન। નોંથાંમોનનિ સેરાવ બેનો આંનિ આર'જ।”

ગાસૈબો જુનારનિ ગેજેરાવ જોંઘૌ ગુબૈયૈ “માનસિ” મુંનિ જુનારફોરા જોંનિ જોબોર હિંસા આરો ઇનાય ઘાલામબોદોં। બિસોરો જે, સેન, ફલ', જેઘાય, ઘ'ઘા બાઢિદિ મુંનિ આયજેંફોરજોં જોંઘૌ હમનાનૈ ગુદું ગોદૌનાય થાવઆવ આરો અરઘિયાવ ગારસોમના ઁવયૈ-સાવૈ, સંના, મેના, ફોમોનના જાયો। નાથાય મોનસે બાથ્રાઘૌ રાઢજોફોરા ગોસો હોના સાનનાનૈ નાયજે, બિસોરો જિદુબાબો જોંઘૌ બેફોરબાદિ રાહાયૈ સાજા હોનાનૈ જાયો, થેવબો બિસોરઘૌ ગુબુન ગુબુન જુનાર જાથિફોરનિ ગ'લામ ઘાલામનાનૈસો ગ'સાયા સોરજિનાનૈ હરદોં। નોંથાંમોના માનસિ મુંનિ જુનારફોરનિ નઘ'ર નઘ'ર થાંનાનૈ નાયહૈથાં, નોંથાંમોના નુગોન બિસોરો મોસૌ, મૈસો, બોરમા, ગરાઢ બાઢિદિ જુનારફોરનિ માબાદિ ગલામિ બૈનો હમદોં। ગરાઢ, મૈસો, બોરમાનિ ઘિ-હાસુદૈફોર સિન્થાય માબોરૈ સાઘોન-સિઘોન ઘાલામના હોનાંદોં।

राइजोफोर फारसेथिं नायनो थाडेब्ला बै मानसि जाथिया गोदोनि दिनाव मोसौ फिसामोन जानो हागौ, मानोना बिसोरो मोसौनि गायखेर जायो। जुनार जाथिफोरनि गेजेराव नुनोमोनोजे बिसोरो खालि बिमानि गायखेर जानानैसो फिसाया देरबोयो। बेफोर बाथ्राखौ मोजाडै साननानै नायोब्ला मानसि जाथियाजे थाल्ला मोसौ आरो गराइ सुलथुग बेखौ मोजाडैनो बुजिनो हायो। बिनिखायनो बिदि मोसौ मानसिखौ जों जायगायावनो बुथारना लारु खालामनो हागोन।

राइजोफोर आं जाम्बा सेंग्राया मानसिफोरनि सोमोन्दै गासैबो बाथ्राखौ मोजाडै सुना बिजिरनानै नोंथांमोननि सिगाडव फोरमायजोबनो हायाखै। आंनि मादै गान्दा गागेबा बे आफादाव दिनै मानो फैयाखै आं मिथिया। बिथाड बेयाव थानायमोनब्ला जुनारनि गेजेराव अध'मसिन बे मानसिफोरनि सोमोनदै आरो मोजांसिन बेखेवनानै नोंथांमोननो खिन्थानो हागौमोन आरो बिसोरखौ माबोरै बुथारनो हायो मा गुन एबा मा राहा गासैखौबो मोजाडै बुनो हागौमोन। मानोना बिनि खुगाया गुवार। बे खुगा मोनसेजोंनो गान्दा गागेब आदैया गोदोनि कुरुक्षेत्रनि दाउहायाव जिडाइन अक्षौहिनि सानथ्रिफोरनि गेजेराव हारसिनो से अक्षौहिनि सानथ्रिफोर मनदोंमोन होननानै खोनादों। बिनिखायनो बिथांखौ थाबैनो लिंनो लाबोनानै आंनि बाथ्राखौ फोरमान नायफै।

ना थ'फानि बाथ्राखौ खोनानानै अब्लानो आफादनि आफादगिरि लावथख्रा गोरैया लिंथुमग्राखौ हुकुम होबायजे दानो गान्दा गागेब आब'खौ लिंनो लायनांगौ। लिंथुमग्राया सासे सेंग्रा गोरै नाखौ लिंनो लायनो थिनहरबाय। गोरै नाया गान्दा गागेबनि खाथियाव थानानै राव होबाय-

“गान्दा गागेब आब', गान्दा गागेब आब'

आफादाव थांगोनना थाड ?”

गोरि नानि बाथ्राखौ खोनानानै गान्दा गागेब आब'आ थिरिं-बिरिं रागा जोंखांबाय। गान्दा गागेबा खात्रां रावजों फिन होबाय- “रायक्षसि, फिसा जाग्रा, थाडा थां।” बे फिननायखौ खोनानानै गोरै नाया लाजिनाय मोननानै गिदिंबोफिननानै बयनोबो खिन्था फैनायलाय ना थ'फाया गावनो बिमादैखौ लिंनो लायनो आफादगिरिनिआव सोनानै ओंखारलांबाय। गान्दा गागेब आब'आ जिदुबाबो गोरै जालियानि सिगाडव रागाजों थाड होननानै बुंदोंमोन थेवबो राइजोफोरनि हुकुमखौ एगारनो हाया साननानै सिन्दुर फोथा फुननानै देलाय

बुरै आबैनि सल'

मालाय आफादआव ओंखारबाय दंमोन बे समावनो ना थ'फाया ओंखारफैनानै राव हरबाय ।

“कान्चनमति आइ, कान्चनमति आइ ।

आफादआव थांगोनना थाड ?”

थ'फा नानि सोमोन्दो लिंनायखौ खोनानानै गान्दा गागेबनि खर'नफ्राय रागाया मोब्लिबबादि हरखाबनो गैया जालांबाय । गान्दा गागेबा थाबनो फिन होबाय—

“नंमारगौथ', मोजाडसो मोजांखौ सिनायो ।

जोंहा गंगाधर फिसौना सोर ?”

थौ गडय आबौ, थांदिनि थु । बिमादैनि खुगानि बाख्यायनाय रावा जेब्ला गडय फिसौनि खोमा फारनैजों हाबलाडे, अब्ला गडय फिसौहा खुसिनि सिमा गैया । सिगाडव गावखौ बियो बेफोरबादि बाख्यायनाय खोनायाखैमोन । बिनिखायनो बियो सोरगोखौनो मोनहास'नायबादि मोननानै गोगानाय मोनबाय । बिमादैनि बाश्राया ना थ'फानि गोसोआव जेसेबांखेब फैदों एसेबांनो बिनि उदैया बुगाखांबोनो हमबाय । बुगानाय उदैया आगानफ्रोमबो देरै देरै जेब्ला आफाद सेराव सफैयो, हरखाबनो बमा बेरनायबादि सोदोब होनानै बिनि उदैया बेरफ्रुगारबाय ।

दिंखिया बिथराय खिलिबाय

आंनि बाश्रायाबो थुंगिबाय ।

गया दाबायबाय बिबार

बबाव थांनो सोर ?

गोसोम मावजिनि गुफुर खोमा ।



मिथिगोरों

मोनसे गामियाव सासे गुमा मुंनि आबादारि मानसि दंमोन । बिनि बिसिया एनाव-दुगा आखुनि हिनजावमोन । न'खराव खालि हौवा आरो हिनजाव । बिसोरहा फिसा-फिसौ गैयामोन । मागो दान, इसे फ्रि-फ्रि अखा हाबाय दंमोन । गुमाया फुंआवनो सिखारनानै बिसिखौ बुंबाय- “दिनै बोथोरा दोमैलु, आंहा फिथा जानो गोसो जादों, नों संनो हागोन ना ? दिनै ओंखाम जायादे ।” फिसाइनि बाथ्राखौ खोनानानै बिसिया बुंबाय- “फिथा संनोलाय माइब्रा माइयालाय बहा ? बाख्रियावथ' माइब्रा माइ गैया ।” फिसाइया बुंबाय- “अब्लालाय मा खालामनो ? फिथा जानाइया जानाय नंला ।” बिसिया फिन होबाय- “थानायसाय सोरहाबा माइब्रा माइ नादों नामा नायनानै फै । नडबा खादासे बिनानै लायथां ।” बिसिनि बाथ्राखौ खोनानानै, फिसाइया दसे सम सानहाबना थानानै मोनसे सोलो दिहुनना, मोदोमाव गांसे इन्दिहि लानानै ओंखारलांबाय ।

गुमाया नसुंसेनि न'खराव माइब्रा माइ नाबाय थानाय नुनानै, मारान नानाय खाथियावनो न' बिगोमाजों जानाय लोंनायनिफ्राय नख'राव सुखु-दुखुनि बाथ्रा राइज्जालायनो हमबाय । गोबाव सम बिसोर बेयावनो राइज्जालायबाय थाबाय । मोनसे समाव मारानाबो नाखांबाय । नख'रनि मानसिफोराबो जिगाबखौ गारनानै माइखौ फारसे थारला खलामबाय । एसेयावनो गुमाया गावहा जोबोर उदै सानाय फाव खालामना मोदोमाव लाबाय थानाय इन्दि हिदों माइ सायाव लुथुर-फुथुर उनदुनो हमबाय । एरैनो खिस्लां गोनां माइब्रा माइ, बेयावनो आरोबाव इन्दि हि, माइफोरा हियाव थफ्रा-थफ्रि सिथाबजोबबाय । माइ सायाव मोजाडै खनथाम खनब्रैसो उलथां-फालथां उन्दुनानै गुमाया खेंखाय-खेंखाय लासैयै सिखारनानै न'आव फैफिनबाय । गुमाया न'आव सफैना इन्दिहिखौ जांखिना दुख्लिसेसो माइ मोनबाय । बिसिया माइब्रा माइखौ नुना खुसिजों लामना, माइरं दिहुननानै फिथा गुनदै देबाय । बेलासियाव बिसिया ओंखाम संना गुमानो जाहोखां आरिखां, अदाब बानायनानै फिथा सावनो हमबाय । ओंखाम जाखांनानै गुमाया उन्दुनो ओंखारनायलाय उन्दुनानै थाबाय । बिसिया नैजि ज'खाय फिथा सावनानै खावसे

थिंख्लियाव सोना दोनना खावसेखिनिखौ गाव अहाजासे जानानै, खालि मोननैसोल' फिथा मोनसे खुरैयाव दोनबाय। बिसिया उन्दुनो गोनां समाव फिसायखौ फोजानानै बुंबाय- “फिथा सावनाया जोबबाय, नाथाय नोंजों मोनसे बाथ्रा खानानै लानि, गाबोन फुंआव जौनि गेजेराव जाय बैसांनिफ्राय सिगां सिखारगोगोन बिनो खालि थामबाहागोनि से बाहागोल' फिथा जानो मोनगोन आरो जाय उनाव सिखारगोन बिनो बाहागोनै जानो मोनगोन।” गुमाया बिसिनि बाथ्रायाव राजि जानानै उन्दुनानै थाबाय।

अखानायै फुंआव उन्दुनायनिफ्राय रावबो सिखारा जाबाय। सान ओंखारनानै सानजौनोसै, थेवबो सानैनि गेजेराव रावबो सिखारा, सानैबो फाव खालामना गनथंजों गरदना उन्दुबाय थाबाय। उनाव गुमाया सानबाय बियो बेफोरबादि खामानि-दामानि हाल-खदाल गारनानै उन्दुप्लाबाय थायोब्ला मा जानो ? बिसियानो फाननै जाथोंसै, आंनो बाहागोसेल' जासिगोन। बिदि साननानै बियो सिखारबोबाय। फिसाइखौ सिखारबोनाय नुनानै बिसिया बुंबाय- “नों आंनिखुइ सिगां सिखारबाय, बिनिखायनो नोंहा बाहागोसे आंहा बाहागोनै।”

गुमाया फिथा जानो जनानै नुबाय जे फिथाया मोननैसो लथार। बियो बिसिखौ सोंबाय- “आरो फिथा गैला नामा ?” बिसिया फिन होबाय- “आरो फिथायालाय बहानिफ्राय ओंखारबाय थानो ? जिखिनि फिथा जादोंमोन गासैबो बे खुरैयावनो दंजोबो। नों बेनिफ्रायनो बाहागोसे जानानै बाहागोनै आंनो दोन।” गुमाया गोसोजों गोसो सानबाय- “दुख्लिसे माइयाव खालि बेखिनिल' फिथा जादोंना ?” बेरायाव आलायना दोननाय दोआव बिहा हरखाबनो मेगन गोग्लैबाय, बियो नुबायजे बेयाव फिथाखौ बोननानै दोनदों। बियो साननानै नायबाय जे बेयाव नैजि ज'खाय फिथा दं। बियो बिसिखौ जेबो बुछबासिनो बायजोआव ओंखारबोबाय। एसेयावनो बिसिया बाथायाव गय लाबोनानै होफैबाय, बियो गय खान्दिसे आखाइयाव लानानै मोनसे बाथ्रा फाव आवरायबाय-

“मोसौखौ सिनाय बिखुंआव

मानसिखौ सिनाय खोथा-बाथ्रायाव

आमोखिया गावबा जायो, नैजि ज'खाय

खुगा बुगब-गब।”

फिसाइनि बाथ्राखौ बुजि मोनना बिसिया लाजिनानै जानजियाव दैहु लाना गाथोनाव दै लायनो ओंखारलांबाय । गाथोनाव माखासेमानि हिनजावफोरनि गेजेराव गावनि लाजिनांनयनि बाथ्राखौ मोजाडै बेखेवना होनायजों लोगोसे बे बाथ्राखौबो खिन्थाबावबायजे बिनि फिसाइया सासे मिथिगोरों । हिनजाव मानसिनि खुगा होनोब्ला दावखा खुगा, बिनि खुगा, बिनि खुगा बाथ्राया गुवार जालांबाय आरो गामिनि बयबो मानसियानो गुमाखौ सासे मिथिगोरों होननानै मिथिजोबबाय ।

थिग बे समावनो सासे मानसिया मासे गोसोम मोसौगाय गोमादोंमोन । बिगोमाया सानबा बै मोसौखौ नागिरना मोनैलाय उनाव गुमाखौ मिथिगोरों होननानै खोनानायलाय गुमानि खाथियाव फैनानै मोसौनि सोमोन्दै माबाफोर बुंनो हागोन नामा सोंफैबाय । खाफालाव थाखानायबादि बै सानखालि फुंआव गुमाया गावनि बारिउनथिं थोरि गेजेराव बै गोसोम मोसौ गायखौ गांसो जाबाय थानाय नुबोदोंमोन । बाथ्राखौ गोसोखानानै बेखायनो गुमाया बुंबाय- “बारिउनथिं नै बेथिं नागिरलांबानो नों नोंनि मोसौखौ मोनगोन ।” मानसिया गुमानि बाथ्रा मथेनो थानानै थि जायगायाव मोसौखौ मोनना लानानै फैबाय । बेनि उनाव गुमायाजे सासे फोरमान होनो हानाय सानसे मिथिगोरों बे बाथ्राया सोरगिदिं जेरावबो गोसार हैबाय । बे बाथ्राया थाडै-थाडै राजानि खोमायावबो सौहैबाय । बेनि सिगांनो राजानि न'आव से लाख रांनि मोनसे समायना बेसेनगोसा दोंसे हार गोमादोंमोन । राजाया जोबोर खुथार-खुथार नागिरनानैबो बे हारखौ दिहुननो हायासै । बिनिखायनो राजाया हारखौ दिहुनना होनो थाखाय गुमा मिथिगोरोंखौ लिंहरबाय । बे बाथ्राखौ देवानिया गुमानो बुंफैनायाव गुमाया गसंनयैनो थर गैयैबादि जाबाय । थाडबाबो राजाया बुथारगोन, थानानै हारखौ दिहुनना होनो हायाब्लाबो राजाया बुथारगोन आरो बियो मिथिगोरों नड होननानै बुंनो लायोबाबो बुथारगोन, मा खालमनो बियो जेबोखौनो सानना मोनासै, खाफालावा जा लिरनाय दं बेनो जाथोंसै बिदि सानना गसाइखौ गोसोजों गोसो आर'ज गाबना गुमाया राजानि खाथियाव सौहैबाय । राजाया मिथिगोरोंखौ फैनाय नुनानै मोजाडै अनना जोथोन लाना न'सिंआवलांना जाहोनायनि बेबस्था खालामनो बुंनयाव गुमाखौ राजानि न'सिंआव लाना थानानै गायखेर दाखा-सिरा, थालिर, फिथा आरिजों मोजाडै उदैबुंजासे जानो होबाय ।

राजाया सानै राजखुंग्रि दंमोन, सासेनि मुड मुदै आरो सासेनि मुड हादै । हादैयानो राजानि सनानि हारखौ खावनानै दोनखोमाना दोनदोंमोन । मिथिगोरों फैदों होनना खोनानानै हमजानो गिना हादैया गिनो हमबाय । बिनिखायनो बियो गुमाया जानो जनाय ख'था सेरावनो गसंनानै बेरा गब्लंजों मिथिगोरोंखौ नायखोमागासिनो दंमोन । ओजोंहाय गुमायाबो गिनायजों थनश्रना दं । बियो थालिर, गायखेर-दाखा, सिरा-फिथा आरिखौ नुनानै गावखौनो-गाव बुंन लाबाय- “हा, दै, जा मोनदों दिनैनो जानानै लाखा, गाबोनो राजाया मा खालामो थिग गैया ।” मिथिगोरोंआ बिदि बुंनयखौ खोनानानै उनदै राजखुंग्रि हादैया गिनायजों खमफिनो हमबाय । हादैया सानबाय- “आंनो सिखाव होननानै मिथिगोरोंआ मिथिखाबाय ।” बिदि साननानै बियो ओंखारबोना गुमानि आथिडाव हमनानै बुंनो हमबाय- “मिथिगोरों, नोंथाड राजानो आंनि बाश्राखौ खिनथानो नाड, नोंथानो जा नांगौ आं बेखौनो होगोन ।” गुमाया अब्ला बुजिमोननो जेबो आद्रा थायासैजे बे हादै मुंनि राजखुंग्रियानो सिखाव । बियो गोमजोर रावै बुंनबाय - “आइ, आं नोंथानि बाश्राखौ खिन्थायादे, नाथाय नोंथाड सनानि हारखौ दानो लाबोनानै राजानि बाकसुआव दोनहैथां ।” गुमानि बाश्रामतैनो राजखुंग्रिया स'नानि हारखौ अब्लानो राजानि बाकसुआव दोननानै फैबाय ।

अखानायै राजाया राज आफादआव मिथिगोरोंखौ लिंहरनानै स'नानि हारखौ सोर खावदों खिन्थानांगौ सोंनायाव गुमाया राजाखौ खुलुमनानै बुंनबाय- “महाराजा, नोंथानि स'नानि हारखौ रावबो सिखावा खालामाखै, महाराजानि बाकसुआवनो हारआ दं होननानै आंनि गोसोआ बुंदों ।” अब्ला राजाया गावनि बाकसुखौ लाबोना खुलिनानै नुबायजे बाश्राया सैथो, सनानि हारा बेयावनो दं । बाश्राखौ फोरमान जानाय नुनानै बयबो गोमो जोबबाय । राजाया गुमानो हा-हु दोहोन-सम्फथि, बाइदिसिना मुवा-बेसाद बान्था होनानै गावनि राजउलाफादआवनो सोद्रोमा खालामनानै लाबाय ।

बुरै आबैनि सल'

सानसेखालि राजाया आखाइ मुथियाव गुमा मासे गोरायै हमथुमना लानानै
मिथिगोरोखौ सोंबाय- “आंनि आखाइ मुथायाव मा दं, दे बुं?” मिथिगोरोडा
थालोआ ग’ब्लंन जिय गलानायबादि मोनना दुखुजों बुंबाय-

“खनसे बुंबाय लिरनानै

खनसे बुंबाय नुनानै

हा, दै बुंनयावनो ओंखारबाय हारा

दासो फैबाय गुमानि थैनायनि फाला।”

राजाया मिथिगोरोनि मुंखौ गुमा होननानै मिथियाखैमोन। बिनिखायनो
“गुमानि थैनायनि फाला” होननाय बाश्राखौ खोनाना गावनि आखाइ मुथियाव
थानाय गुमानि बाश्राखौनो बुंदों साननानै खुसिजों आखाइ मुथियाव थानाय
गुमाखौ एगारना होनानै मिथिगोरोनो गावनि मोदोमनि गहेनाखौ बान्था होबाय।



सासे बोलोगोरा मानसि

मोनसे राइजोआव मासे गिदिर मैदेर आरो मासे मोसा दंमोन। बिसोर मानैनि उदखाराव राइजोनि मानसिफोरा बयबो गिनायजों संखिखांदोंमोन। गोबां नाजानायनि उनावबो जेब्ला राजाया बै मैदेर आरो मोसाखौ बुथारनो हायैनि गासै राइजोआवनो दल दामनानै फोसावनाय जाबायजे जाय बे मैदेर आरो मोसाखौ बुथारनो हागोन बिथानो गोबां बानथा होनाय जागोन। बे बाथ्राखौ खोनानानै गोबां मानसिफोरानो मैदेर आरो मोसाखौ बुथारनो नाजाबाय, नाथाय रावबो बुथारनो हायासै। खाफालनि रिफिनायबादि सानसेखालि सासे मानसिया गोसोनि दुखुआव बिस जानानै थैनो साननानै फिथायाव बिस लगायनानै न'निफ्राय ओंखारलांना, दा लामायाव जाहैगोन सानना लामाजों थाडै-थाडै बै राजानि राइजोआव सफैबाय। फैबाय थानाय लामायाव बाज'नो ओंखारनायलाय फिथा बोननानै लाबोनाय थफ्लाखौ लामायाव दोननानै दैमा जिडव बाज'नो होननानै ओंखारलांबाय। थिग बे समावनो बै फाग्ला मैदेरा बे लामाजों फैनानै लामायाव फिथाखौ मोनानै गब जागार गारबाय। नाथाय बे बिस लगायनाय फिथाखौ जाना मैदेरनि मोदोमाव बिसा गोसारना मैदेरा थैनानै थाबाय। सासे मानसिया फाग्ला मैदेरखौ बुथारनाय बाथ्राखौ खोनानानै राजाया मैदेरखौ सोर बुथारनाय होननानै सोंनायाव बै बिस लाबोग्रा मानसिखौ राजानि खाथियाव लाबोनाय जाबाय। फाग्ला मैदेरखौ बियो माबोरै बुथारखो राजाया मानसिखौ सोंबाय। बियो फिनबाय- “आं खनसे सौनायावनो मैदेरा थैदों।”

राजाया जोबोर खुसि जानानै बिनो गोबां दोहोन सम्फथि होनानै बुंबाय- “आंनि राइजोआव आरोबाव मासे दुथां मोसा दं, नों जिदु बे मोसाखौबो बुथारनो हायो अब्ला आं नोंनो गोबां दोहोन सम्फथि होबावगोन।” बियो

फिनबाय- “महाराजा, बे मोसाखौबो आं बुथारगोन ।” अब्ला राजाया बुंबाय-
“नों समफोरनो मोसाखौ बुथारनो नांगोन ।” मानसिया राजि जानानै फैयै-फैयै
सिन्ता खालामनो हमबाय, बियो माबोरै बै मोसाखौ बुथारनो हागोन । जेब्ला
मोसा बुथारनांगौ साना सफैबाय, बियो माखासे दिरुं आरो मोनसे दिंखि रोमोन
लानानै गिलुं-गिलुंयै हाग्रासिंआव हाबहैबाय । बै हाग्रा गेजेराव फांसे जोबोर
गिदिर बिफां दंमोन । बियो थानानै बै बिफां सायाव गाखोनानै गा, गा, गि, गि,
होननानै नंखायखौनो मेथाइ खनफ्तानो हमबाय आरो दावफोराबो बै बिफांनि
दालाय बिलाइफोराव बानानै मेथाइ खनफानानै दावराव खालामगासिनो दं ।
बेखौनो खोनानानै मोसाया बिफां सिडव फैनानै मानसिखौ नुनानै बुंबाय-
“आदा नों दाउफोरखौ मा फोरोंदों ?” मानसिया फिनबाय- “फंबाय आं
बिसोरखौ मेथाइ खननो फोरोंदों ।” अब्ला मोसाया बुंबाय- “आदा आंखौबो
नों बिसोरनिबादि मेथाइ फोरोंनो हागोनना ?” मानसिया अब्ला बुंबाय- “नों
जाबाय मोसा, आं जाबाय मानसि, नों आंखौ जागोन नडना ?” अब्ला मोसाया
बुंबाय- “सैथो, सैथो, थाम सैथो आं सदबांसा लानानै नोंनो बाश्ना होदों आं
नोंखौ जाया, नों आंखौ खालि मेथाइल’ फोरों ।” मोसानि बाश्नाखौ खोनानानै
मानसिया बिफां सानिफ्राय ओंखारबोनानै मोसानि थोंब्रै आथिंखौ मौजाडै खाना
लानानै दिंखि रोमोनजों बिखौ जेरै मोनो एरैनो मोखां गनथं बुनो हमबाय ।
बुनायखौ थर हमनो हायाबासिनो मोसाया बुंबाय- “आदा आं आरो मोथाइ
सोलोंला, आंखौ एगारदो ।” मानसिया बुंबाय- “मोजाडै सोलोंना ला, मानो
सोलोड जानो ?” बिदि बुबाय थानायावनो मोसाया थैबाय । बियो मोसाखौ
लाबोनानै राजानो दिन्थिफैबाय । अब्ला राजाया जोबोर गोजोननाय मोननानै
बिखौ बुंबाय- “दिनै नोंजों खमलायनो थाखाय सासे बोलोगोरा मानसि लाबोनानै
होगोन, नों जिदु बै मानसिखौ फेजेननो हायो अब्ला आं नोंनो बुरजा दोहोन
सम्पथि होगोन ।” बिदि बुनानै सासे बोलोगोरा मानसि लाबोनानै हरआव

बिजों राजाया फुथुनानै दोनबाय। हरआव मानसिया बै बोलोगोरा मानसिखौ
बुंबाय- “फंबाय आं खनसे सौगासिनो मासे मैदेर आरो मासे गिदिर मोसाखौ
बुथारदों। नों आंजों माबोरै जुजिनो? नों दा बे सेंग्रा बैसोआव आंजों जुजिनानै
अबथिरा थैनो फैदों।” बिदि बुंनायखौ खोनानानै मानसिया गिनानै हरआवनो
खारखोमालांबाय। उनाव अखानायै राजाया बोलोगोरा मानसिखौ नागिरना
मोनैलाय मोसा बुथारग्रा बोलोगोरा मानसिखौ गोबां दोहोन सम्फथि होनानै
बिदाय होबाय आरो अब्लानिफ्रायनो मैदेर आरो मोसानि उदखारनिफ्राय उदां
जानानै राजायाबो आलो-गोजोनै राइजो खुंनो हमनायसै।



सिला फिसाजोनि सल'

मोनसे हादराव सासे कुमार दंमोन। बिहा गोबां दोहोन सम्पद दंमोन, नाथाय बिहा फिसाज्जा गैयामोन। बिनि बिसिया खनले खनले फिसाजोसो जोनोम होदोंमोन। बिनिखायनो कुमारनि गोसोआव अराइबो दुखु। साननैसो उनाव बिसिया आरोबाव मोदोम गिलिर जानायलाय बिसिखौ बुंबाय-“बेखेबावबो जिदु हिनजावसा जोनोम होयो, अब्ला आं नोंखौ गंगारनो फानहरगोन।” फिसाइनि बाथ्राखौ खोनानाँ बिसिया जोबोर गिबाय। गथ' जोनोम जानोसै समाव कुमारनि बिसिया बिमानि न'आव थांबाय। नाथाय खाफाल मोन्दा बे खेबावबो बियो हिनजावसासो जोनोम होबाय। हिनजावसा जोनोम जानायखौ नुनानै कुमारनि बिसिया थोर-थोर मावना गारामा रानखांलायबाय। बिनिखायनो बियो फिसाइया मिथिनायनि सिगांनो हाखादावरायै हिनजावसाखौ हिस्त्रिजों फानफबना मोनसे खानथायाव सोनानै दैयाव फोजाव हरबाय।

खान्थाया दैजों बोहैलांगासिनो दं, बे समावनो दै सेराव सासे हि सुबाय थानाय धबाया खान्थाखौ नुनानै बेयावलाय माथो दं सानना सानस्रिनानै नायबा नुबाय, गोदानै जोनोम मोननाय गोरलै हिनजावसा गथ', खान्थायाव सोनानै सोरबा फोजाव हरदों। धबाया हिनजावसाखौ दैखांनो लाबोनो साननानै खान्थाखौ सानस्रिना लासै-लासै बोरिफारसे बोना लाबोनाय समावनो हरखाब मासे सिलाया खानथानिफ्राय गथ'खौ साबनानै लाना थांबाय। फांसे सिमलि बिफां सायाव सिलाया बासा लादोंमोन। बियो हिनजावसाखौ लांनो बै बिफां बासायावनो दोनहैबाय। उन्दै नाथाय समायना हिनजावसाखौ नुनानै सिलाया जोबोर अनखांनय फैबाय। बिनिखायनो बियो गथ' गोरलैखौ खाडै-बायै गिदिर गोलाव खालामनो गोसोआव जानजि खाफ्राबाय।

सानफ्रोमबो सिलाया जेराव जा मोजां बेसाद मोनो बेयावनो साबखांनो लाबोनानै हिनजावसानो जाहोफैयो। बिदिनो सिलाया बिखौ लासै-लासै खाडै-बायै फेदेरबाय। सोरनिबा न'खराव मोजां समायना गाननाय जोमनाय द'खना

लामना दोननाय नुयोब्ला सिलाया बैफोरखौ साबखांना लाबोनानै फिसाजोनो गाननो होफैयो। सानसेखालि राजानि सासे फिसाजोआ गावनि सना-रुफा गहेनाफोरखौ खुना दोननानै दैयाव दुगैनो ओंखारदोंमोन, बे समावनो सिलाया साबखांना गहेना आरिफोरखौ लाबोनानै फिसाजोनो गाननो होफैबाय। बेबादिनो खानजं, आरसि, सिन्दुर-थेमा, थावनि बथल बाइदिसिना जेराव जा मोनो लानानै सिलाया फिसाजोनो होफैयो।

हिनजावसाया लासै-लासै बिफां सायावनो देरनानै महरावबो रुजुथावै समायना सिख्ला जाबाय। सानसेखालि सिलाया फिसाजोखौ बुंबाय- “फिसा नोंथ’ दा देरबाय, आं सानफ्रोमबो नोंखौ हारसिडै दोनलानानै जोबोर गोजानाव थांनांगौ जायो, बिखायनो नोंहा माबाफोर खैफोद जाबाय साननानै आं जोबोर गिबाय थायो। दिनैनिफ्राय आं गोजानाव थांनाय समाव जिदु नों गियो एबा आंखौ नोंनो नांगौ जायो अब्ला एरै होनना लिंहर, आं जेरावखि थायामानो थाब नोंनि खाथियाव बिरबोगोन’

“बार सिउ सिउ बारो

सिला आइयाबो बिरबोयो।”

सानसेखालि सानजौफुआव सिलानि फिसाजोआ बिफां दालायावनो ज’नानै खानाय हबाय दंमोन। थिग बे समावनो बेथिंजाय सासे सदागर बबावबा थांनो फैनायाव सानदुं गोसा जानायलाय मेंनानै बै बिफां सिंआवनो दान्दिसे जिरायनो ज’बाय। बै जायगायाव रावबो सबुं गैयामो। बबेनिफ्रायबा दोंसे खानाय बिरबोना सदागरनि मोदोमाव गोल्लैफैबाय। सदागरा खानायखौ नुना गोमोनानै दौखांना लाबाय, खानायखौ गोलाव नुनायलाय बियो सुनानै नायबाय। खानाया स्नि फुट गोलाव। बे एसेबां गोलाव खानाया बबेनिफ्राय फैखो? सदागरा सोरखौबा नुयो नामा सोरगिदिं नायथिंनो हमबाय। बे समानो सदागरनि मेगना बिफां सायाव गोल्लैबाय। बिथाड नुबायजे सासे जोंखोल-माखोल रुजुथावै समायना सासे सिख्लाया बिफां दालायाव ज’नानै खानाय खानगासिनो दं। सदागरा गोमोना सिख्लानिथिं नायनानै बुंहरबाय- “नों सोर? मोदाय ना मानसि, परि ना रायखसि, नों सोर बुं?” सिख्लाया बेनि सिगां जिउआव माब्लाबाबो मानसि नुफेराखैमोन, बिनिखायनो बियो गिनानै मा फिन होनो जेबो मोनैलाय बिमाखौ मेथाइ खनना लिंहरबाय-

“बार सिउ सिउ बारबोयो
सिला आइयाबो बिरबोयो।”

बेबादि लिंहरनाय लोगो लोगोनो सिलाया बबेनिफ्रायबा बिरबोनानै
फिसाजोनि सिगाडव बाफैनानै सोंबाय- “आइ नों आंखौ मानो लिंहरदों?”
अब्ला फिसाजोआ बिफां सिडव थानाय मानसिनिथिं आसि दिनथिहरबाय।
सिलाया सदागरखौ नुनानै गोसोजों गोसो सिरि-सिरि सानबाय, जिदु बे मानसिया
मोजां अब्ला बे मानसिनो फिसाजोखौ हाबा हरनो हायोब्ला मोजां जागोन।
बेखौनो साननानै सिलाया गाहायाव फैना सदागरनो फिसाजोनि गासैबो बाश्नाखौ
गुदिनिफ्राय बिजौसिम खिन्था जोबबाय। सदागरा सिलाखौ बुंबाय- “आंहा
गोबां रां-रुफा दं, आं सासे धोनि मानसि। नाथाय आंहा दा सास्नि बिसि दं,
जिदु नों बेफोरखौ जेबो बाजायाबासिनो नोंनि फिसाजोखौ आंनो हाबा होयो
अब्ला आं थारैनो बुंदोंजे बिखौ आं जोबोर आलो गोजोनै लाखिगोन, माब्लाबाबो
दुखु होआ।” सदागरनि बाश्नाखौ खोनानानै सिलाया जोबोर सानै-हयै फिसाजोखौ
सदागरनो हाबा हरनो राजि जाबाय आरो फिसाजोखौ जोबोर बुजाय-आजाय
बोख्लायना लाबोनानै सदागरनि आखाइयाव गथायफैबाय। सिलाया गाबै-गाबै
आखाइ ख’बज’बना सदागरखौ बुंबाय हिनजावसाखौ जेन दुखु दा हो आरो
फिसाजोखौबो बुंबाय- “आइ, आंखौ नोंनो नांगौ जायोब्ला फोरोंना होनाय
बादि लिंहरब्लानो आं नोंनि खाथियाव नुजाहैगोन।”

बिनि उनाव सदागरा सिलानि फिसाजोखौ न’आव लाबोना जोबोर
अननायनि गेजेरजों आलो गोजोनै लाखिबाय। नाथाय सदागरनि आगोलनि
सास्नि बिसिफोरा सिलानि फिसाजोनि महरखौ नुनानै साननो हमबाय, बेफोरबादि
महरगोसा सिख्ताखौ बिसि मोननानै बियो जोंखौ बावगारलांगोन आरो जोंखौ
सैया जांसिगोन। बेखौनो साननानै बिसोरो सिलानि फिसाजोखौ जंखायना,
एदावना आरो हिंसा खालामना गोसोआव सानफा-एफा दुखु होबायथानो हमबाय।

सानसेखालि सास्निबो ज'नानै सिलानि फिसाजोखौ बुंबाय- “नों न'खरनि मायनाव जानानै ज'बाय थागोन, जों नोंखौ नायसे नायनानै सडै खावै नोंखौ जाहोबाय थागोन ? थां नों दिनै जोंनो ओंखाम संना जाहोनांगो ।” सिलानि फिसाजोआ गावनि जिउआव माब्लाबाबो ओंखाम सफेराखै, बिनिखायनो बियो माबोरै ओंखाम संनांगौ मिथियैलाय जेबो राहा गैयै जानानै गाबै-गाबै बारि उनथिं थालिर बारियाव ज'नानै बिमाखौ गाबज्रिहरनो हमबाय-

“बार सिउ सिउ बारबोयो

सिला आइयाबो बिरबोयो ।”

बिदि लिंहरनाय लोगो-लोगोनो सिलायाबो सिगाडव नुजाफैबाय । “मा जाखो आइ ? आंखौ मानो लिंहरदों ?” बिमाया सोंनायलाय फिसाजोआ फिन होबाय- “आइ, बिसोर दिनै आंखौ ओंखाम संनो होदों, माबोरै ओंखाम संनांगौ आं रोड, ओंखाम सडब्ला फिसाइनो एरस'नना होनानै मा खालमहोयो बिनि गरन्थ गैया ।” बिमाया फिसाजोनि बाश्त्राखौ खोनानानै बुंबाय- “आइ नों गिनो नाड, माबोरै ओंखाम संनांगौ आं नोंनो फोरोंना होनि । मोनसे खान्थायाव खान्थासे दै होनानै बियाव गरसे माइरं गारनानै हो आरो मोनसे खान्थानि दैयाव दोसे मैगं गारना होनानै खान्था मोननैनि सिंआव मोनसे बनथ-अर सोना होनानै इसिनिफ्राय दसे बाइजोआव ज'नानै था, दसे उनाव नों नुगोन खान्थायाव मोदोमफ्रु ओंखाम आरो ओंखै मोननानै दं ।” बे सोलोखौ फिसाजोनो खिनथानानै सिलाया गोजानाव बिरलांबाय आरो फिसाजोआबो बिमाया खिन्थालांनायबादिनो मावबाय । ओंखाम जानो जनाय समाव सास्नि बिसिफोरा खांसि सिंआव हाखर जावनानै लादोंमोन । जेब्ला सिलानि फिसाजोआ ओंखाम होनानै थाडो, अब्ला बिसोरो ओंखामखौ हाखराव गारनानै आंहा ओंखाम जोबबाय, माबार लाबो, होननानै गले-गले ओंखाम बिहरो । बिदिनो बिसोरो सास्निबो जेसेबां खेब ओंखाम बियो एसेबांनो सिलानि फिसाजोआबो खान्थानिफ्राय ओंखाम लाबोनानै होफैबाय थायो । उनाव बिसोर जेनना लाजिनाय मोननानै सिखारलांनायसै ।

सानसेखालि बिदिनो बिसोर सिलानि फिसाजोखौ मोसौ गलिखौ सिबनानै दोननो थिनबाय । सिलानि फिसाजोआ गलि सिबनो हाबनानैनो बिमाखौ लिंहरबाय-

“बार सिउ सिउ बारबोयो
सिला आइयाबो बिरबोयो।”

फिसाजोआ बिदि लिंहरनायखौ खोनानानै बिमाया फिसाजोनि सिगाडव नुजाथिफैनानै बुंबाय- “आइ, मानो लिंहरखो?” फिसाजोआ बुंबाय- “आइ, बिसोर आंखौ गलि सिबनो थिनदों। गलिखौ माबोरै सिबनांगौ, बेखौनो सोंनो लिंहरदों।” बिमाया बुंबाय- “गलिखौ ओजों फारसेनिफ्राय ओजों फारसेसिम हासिब दोंसे बोदला लां, नों नुगोन गलि न’आ साखोन सिखोन जाबाय।” बिदि बुंनानै सिलाया बिरलानाय उनाव सिलानि फिसाजोआबो बेखौनो मावबाय आरो बै सानखालि गलिनआ सिगांनिखुइ बांसिन साखोन-सिखोन जानानै जोंखोल-माखोल जाबाय। सिलानि फिसाजोनि बेफोरबादि साखोन-सिखोन समायना खामानि दामानिफोरखौ नुनानै सदागरा बिखौ सिगांनिखुइ बांसिन मोजां मोननो हमबाय।

सैत्र दाननि उनाव बैसागु सफैनायलाय सदागरा सादाइन बिसिफोरखौबो लिंहरनानै साफ्रोमनोबो सेरबायै खुन रानना होनानै बुंबाय- “नोंसोरो आं बैसागुआव गाननो हानाय बादि, गस्ला, गामसा, फालि, जि-जोम दानानै हो। आरो गोसोआव लाखि सोरनि हिया साबसिन जायो बेखौ आं नायगोन। सास्नि बिसिफोरा हाखा-दावरा, गावबा-गाव खुनखौ लाबोनानै लुना, थुनना खन्दुं दिहुननानै जि दानो हमबाय, नाथाय सिलानि फिसाजोआ जेबो खालामनो रोडैलाय आख’-फाख’यै मा खालामगोन मा मागोन जानानै एरैनो जबाय थाबाय। बिहारिफोरा सानबाय - “बेखेबाव सिलानि फिसाजोआ खारग’आ। बियोथ’ जेबोखौनो रोड, बियो हौवानो माबोरै हि दानानै होयो नायनि थाथिखिखौ?” रहा गोयै जाना सिलानि फिसाजोआ बारि उनथिं थानानै बिमाखौ सिगांनिबादि हांख्राय हरनायलाय बिमाया फैनानै सिगांनिबादि फिसाजोखौ सोंबाय- “मा बाथ्रा फिसा? मानोथो लिंहरखो?” सदागरा हि दानो होनाय गासैबो बाथ्राखौ फिसाजोया बिमानो खिन्था जोबबाय, अब्ला सिलाया फिसाजोखौ बुंबाय- “आइ, नों जिंगा दासि, नों नोंनि फिसाइनो हि होनो हागोन। मोनब्रै औवानि हासुंआव मुथासेसो खुन सोनानै हासुंफोरनि खुगाखौ गोरायै सफा मुथेनानै दोन, बैसागुखालि जेब्ला नोंनि हौवाया हि बिगोन अब्ला

हासुं मोनब्रैखौ लाबोनानै हौवानो होफै।' बिदि बुंनानै सिलाया बिरलानाय उनाव फिसाजोआ मोनब्रै हासुं लाबोनानै मुथाब्रैसो खुन बिमाया खिन्थानायबादि सोनानै गोरा सफा मुथेनानै दोनबाय। बिहारिफोरा हाखा दावरा बादायलायना हि दादों आरो सिलानि फिसाजोआ जेबो मावाबासिनो खुनफोरखौ गारनानै दोनदों बेखौ नुनानै बिसोर गोसोजों गोसो जोबोर रंजानाय मोनबाय, बेखेबाव बान्दिया फानजारियाव नांबाय, सिलानि फिसाजोआ हि-जोम होनो हायाब्ला बे खेबाव सदागरा बिखौ एरैनो एगारखाया।

गोबां साननि उनाव सास्नि बिसिफोरा गावबा गावनि गामसा-गसला, हि-जोम गासैखौबो लाबोनानै फिसाइनि आखाइयाव होफैबाय आरो सिलानि फिसाजोया हिन सोलाय खालि हासुं मोनब्रैल' होफैबाय। बिहारिफोरा सिलानि फिसाजोया हासुं मोनब्रै होफैनायखौ नुनानै खुगा हमथुना बयबो खे-खे मिनिनो हमबाय। सदागराबो रागा जोंनानै मेगन गोजा खालामना सिलानि फिसाजोखौ सोंबाय- “आंनो बेफोरखौ मा होदों ? नों दानाय हिया बोरो ?” बियो बुंनबाय- “हासुं मोनब्रैखौ खेवना नाय।” सदागरा मोनफा मोनफायै हासुं मोनब्रैखौ बेखेवना नायबा नुबाय, जोबोर समायना-समायना मुगा गाबनि गामसा, गसला, हि-जोम ओंखारबोबाय आरो बिहारि हिनजावफोरनि रुजुनायाव बे हिया एरैबादि समायना, साबसिनमोनजे बिहारिफोरनि हिखौ सदागरा हिस्त्रिगिजि होननानै सानबाय। बिनिखायनो सदागरा, बिहारिफोरा होनाय हिफोरखौ गांफा-गांफा गारहरजोबनानै सिलानि फिसाजोया होनाय हिफोरखौसो गानबाय।

लासै-लासै बिहारिफोरा मिथिबायजे मासे सिला फैनानै बिखौ बाइदिसिना सोलो फोरोंना होफैयो। बिखौ मिथिनानै बिसोरो बयबो राइज्जायलायनानै सिलाखौ बुथारनो फाव खालामबाय। बियो मा मा बुंनानै सिलाखौ लिंहरो बिखौ बिसोरनि गेजेराव सासे थाखोमाना थाना, सोलोंना लानानै सानसेखालि मोसौ गलि सिडव हाबना सिलानि फिसाजोया लिंहरनाय बादि लिंहरनो हमबाय,

सिलायाबो फैनानै बिनि सिगाडव बाफैबाय। अब्लानो बियो नुवा नुस्लाबा सिलाखौ हाथाय अरखेना हासिबजों बुना सिलाखौ बुथारनानै गोबोरखि सिडव फबनानै दोनबाय। सिलानि फिसाजोआ बे बाथ्राखौ जेबो उदिसखौनो मोनासै। बिनि उनाव सिलानि फिसाजोया बिमाखौ खाराव मारावै गोबां बार गाबज्रिहरबाय, नाथाय बिमायालाय बहानिफ्रायथ फैबावनो? बिहारिफोरा माबा सोलो खालामनानै सिलाखौ बुथारबाय साननानै सिलानि फिसाजोया बुजिनो हानानै उप्ले-उप्ले गाबनो हमबाय।

बेनि साननैसो उनावनो सदागरा फालांगि खालामनो ओंखारलांबाय। थांनोसै समाव सदागरा सास्नि बिसिफोरखौ लिंहरना बुजायना गले-गले बुंबाय- “नोंसोर सिलानि फिसाजोखौ दुखु होनो नडा, बिखौ मोजाडै लाखि।”

सानसेखालि सासे फालांगिरिया खानजं, आरसि, सिन्दुर, सना, आसान, मदोमनाय थाव आरि फाननो होननानै सदागरनि गाथोनावनो नावखौ लाखिफैदोंमोन। सदागरनि बिसिफोरा गावसोरनि मेगननि सु, सिलानि फिसाजोखौ बै बेफारिनो फानहरनो सिरि-सिरि राइज्जायखोमानानै फालांगिरिनिफ्राय माखासे बेसाद बायना लानानै बैफोरनि बेसेन हिसाबै बिनो सासे समायना सिख्ला हरगोन होननानै बुंबाय। सिख्लानि महर मोखांखौ बिसोर एरैबादि बाख्यायनो हमबायजे फालांगिरिया ल'भ जानानै बेसादफोरखौ फाननानै सिख्लाखौ लानानै थांनो राजि जाबाय। ओजोंहाय सिलानि फिसाजोखौ बिहारिफोरा बुंबाय- “जोंनि गाथोनाव सासे फालांगिरिया जोबोर मोजां बेसादफोर फाननो लाबोनानै नाव लाखिफैदों। जों नायै-मायै बिनिफ्राय मोननैसो बेसाद बायना लाहैनि फै।” सिलानि फिसाजोआ बुंबाय- “आबमोन आंनो जेबो बेसाद नाडा। नोंसोर थां, आं थाडा। आंखौ बिथाडा बायजोआव जेरावबो थांनाडा होननानै बुलांखादों।” बिसोरो बिखौ बाइदि रोखोमै बुजायना नारा-नाथा हमथाबबाय थानायलाय बियो आसु-मासुयै बिसोरजों थांफाना दैमा गाथोन सहैबाय। बिसोरो मुवा

बेसाद नायनायनि असिलायै सिलानि फिसाजोखौ नावआव दैखांना होनायलाय,
फालांगिरिया गिबियाव बिसोरजों राइज्जायना दोननाय मथे हरखाबनो नावखौ
जावनानै सिलानि फिसाजोखौ लानानै थांबाय ।

फालांगिरिया सिलानि फिसाजोखौ लाना थांनानै गावनि न'आव लानानै
थांबाय । नआव बियो सिलानि फिसाजोखौ ना गोरान नेग्रा खालामहैबाय ।
फालांगिरिनि न'आ दैमा सेरावनो । सानसेखालि सिलानि फिसाजोया सान्दुं
गोसायाव जनानै ना गोरान नेबाय थानायाव दुखुजों मेथाइ खनबायनो हमबाय ।

“आइया आंखौ दैयाव फोजावहरबाय ।

सिला आइया आंखौ खनखांबाय ।

सदागरा आंखौ हाबा खालामबाय ।

स्नि बिहारिया आंखौ दुमनो फानहरबाय ।

दुमा आंखौ नागोरान नेग्रा खालामबाय ।”

सिलानि फिसाजोया ना गोरान नेबायाव थानायाव दुखुजों मेथाइ खनबाय
थानाय समावनो फारसेथिनिफ्राय सदागरा नावजों न'सिम दाउखोबोदोंमोन ।
गोजाननिफ्राय सदागरा सान्दुं गोसायाव बिदि खाराव मारावै मेथाइ खननायखौ
खोनानानै नाव लाखिनानै सिलानि फिसाजोनि खाथियाव थांनानै बिहा मा
जादों, मानो बिदि गोदाव-सोराव गाबदों होनना सोंनायाव सिलानि फिसाजोया
फारसेनिफ्राय गासैबो बाथ्राखौ सदागरनो खिन्थाबाय । अब्ला सदागरा गावनि
सिनायथिखौ होनानै बिखौ नाव सायाव दैखांना दुगैस्रां लोबस्रां गोदान द'खना,
हि-जोम गानहोनानै बिखौ लाना फैबाय । सदागरा नावआवनो सिलानि
फिसाजोखौ मोनसे बाकसुआव सोना दोननानै बियो हां लानो हानाय बादियै
बाकसुखौ मोनसे गब्लं खालामनानै होबाय । सदागरा न' मोननानै गावनि गुबुन-
गुबुन मुवा बेसादफोरजों लोगोसे बिथाडा बाकसुखौबो गावनि थाग्रा न'आव
सोनानै दोनबाय । सास्नि बिसिफोरखौ सिगाडव नुनानै सदागरा सोंबाय- “नोंसोर
गासैखौबो नुनो मोनदों, नाथाय सिलानि फिसाजोखौ मानो नुवाखै ?” बिसोरो
फिन होबाय- “बियो दिनै गोबां सान जाबाय, बिमानि न'आव आलासि जानो
थांनानै फैफिनाखै ।” बे बाथ्राखौ खोनानानै सदागरा बिसोरखौ बुंबाय- “आंनि

गोसोया फोथाइयाखै, नोंसोर बिखौ माबा मोनसे खालामदों। आदसा नोंसोर थार बाथ्रा बुंदोंना ना नंखाय बाथ्रा बुंदों आं नोंसोरखौ दा आनजाद नायगोन।” बिदि बुंनानै मोनसे गोथौ हाखर जावहोनानै बियाव जाबोर आरो सु होनानै दोसे आवा खुन्दुंखौ बे फारसेनिफ्राय बै फारसेसिम खाना होनानै बिसिफोरखौ बुंबाय- “जाय बे खुन्दुंसाजों मानखोलांनो हागोन, बिनो दाय गैयै होननानै फोरमान जागोन।” साफा साफायै बिसिफोरा आवा खुन्दुंनि साजों थांना खुन्दुंआ जनानै हाखराव गोग्लैना थैबाय, नाथाय स्निथिया थैयासै। बियो बै खुन्दुं साजों खनस्नि थांलाय फैलाय खालामबाय, थेवबो खुन्दुंआ जवासै, मानोना बियो थारैनो सिलानि फिसाजोखौ फानहरनाय बाथ्राखौ जेबोखौनो मिथियामोन। गुबुन बिहारिफोरा बे खामानिखौ मावनाय समाव बियो ओंखाम संबाय दंमोन।

बिनि उनाव सदागरा गावनि बै साद’ बिसिफोरखौ हाखराव हा होना फबनानै दोनबाय आरो सिलानि फिसाजोखौबो बाकसुनिफ्राय दिहुननानै लाबोबाय। बिनि उनाव सिलानि फिसाजो आरो स्निथि बिसिजों सदागरा आलो गोजोनै राइजो जानो हमबाय।

जोनि हि-जोमफोराबो गोसोम जाबाय, जोंबो जायखारबोबाय।



तुला आरो तेजा

सासे धोनि आबादारिया सानै बिसि दंमोन, गिदिरसिना हौवाजों अनजायै आरो सैजायै, (एलागि) उन्दैया हौवाजों अनजाग्रा, मोजां मोनजाग्रा(लागि)। बिसि गिदिरहा सासे हिन्जावसा आरो सासे हौवासा दं, मुड तेजा आरो कानाइ। नैथि बिसिया खालि सासेल हिन्जावसा दं, बिनि मुड तुला। तुलाया तेजानिखुइ बैसोआव गिदिरसिनमोन। बिसि उन्दैया गिदिर बिसिनि फिसाज्ला आरो फिसाजोनि गोसोआव जोबोर दुखु होयोमोन। हिन्जाव गिख' फिसायआबो लागिखौ गिनानै बिसोरखौ अननो हायामोन। बिसोरो मोजाडै जानो आरो गाननो मोनामोन। फुंआव तेजा आरो कानाइआ सोमनाय गोजां ओंखामखौनो थेब्रे जानानै मोसौ गुमनो ओंखारलाडे, नाथाय तुलाया बिमाजों एवफ्राम-सावफ्राम ओंखि संना जायो, मोजां गोदान हि-जोम गानै-जोमै जोबोर आलो गोजोनै थायो। फिसाइया हाल-खदाल जावनानै सानजौफु समाव न'आव फैफिनब्ला, लागि उन्दै बिसिया फिसाइनो, ओंखाम गुदुं, ओंखि गुदुं, बाइदि रोखोमनि भाजा एवफ्राम सावफ्राम जानो होनानै जोथोन लायो, नाथाय माब्लाबा एलागिया खुलुमथाबबायना गावनि गोबाय न'सायाव जानो लिंनो लांनानै, सोमनाय ओंखाम गोजां, ना सावनाय जानो होयो आरो फिसायआ लागिखौ गिनानै सिखावै सिरि-सिरि जायो आरो जोबोर गोजोननाय मोनो। मोगथाडवबो थारैनो हाल-खदाल जावना फैनानै बिनि सोमनाय ओंखाम गोजां, ना सावनाय जानानै जेसेबां गोजोननाय मोनो, लागिनि ओंखाम गुदुं, ओंखै गुदुं भाजा-पुरा, एवखां सावखांफोरखौ जानानै बिदि गोजोननाय मोना। लागिना नुबायजे लासै-लासै फिसाइया फोथारनिफ्राय फैना एलागिनि न'आव ओंखाम जानाया बांबोनो हमदों। बिनिखायनो बियो एलागिखौ फिसाइनि मेगननिफ्राय माबोरै गोजान खालामनो हागोन बे बाश्त्राखौनो सानबाय थानो हमबाय।

सानसेखालि लागिना एलागिखौ बिलोयाव ना गुरनो लिंलांबाय। लागिनि जेखायाव खांखाय, खुसिसया, नाथुर बाइदि नाफोर उथिबाय, नाथाय एलागिनि

जेखायाव खावै, सायनिस फिथिग्रि, लासोन, भाना बाइदि मोजां नाफोरा उथिबाय । बिदि जानायखौ नुनानै लाजिनानै एलागिनि सायाव लागिया मोथो-मोथो रागा जॉनो हमबाय । ना गुरखानानै सानैबो दुगैनो होननानै मोनसे गिदिर फुखिनि दालां सायाव गाखोबाय । लागिया एलागिखौ बुंबाय- “आब’ आंनि बिखुंनि जिनिरखौ मोजाडै हुनानै हो, हाब्रु आरो जिनिरजों बिखुड खथ्रे-खथ्रा जालायदों, आंनिया हुखानाय जाबा आं नॉनिखौबो हुनानै होगोन दे ।” लागिनि बाथ्राखौ खोनानानै एलागिया लागिनि बिखुंखौ हुनानै होखानायनि उनाव लागिया एलागिनि बिखुंखौ हुनो हमबाय, आरो हुबाय थानाय समावनो, खासेव जाहैथां होननानै मोन्थोर आवरायना एलागिखौ फुखिनि दैयाव नाख्तायहरबाय । बिनि उनाव एलागिनि जेखायखौ गाखेब-गुखेब सिफायजोबना हाग्रायाव गारहरना न’आव गिदिंबोफिनबाय । बे जाथाइखौ रावबो नुवासै, आरो रावबो मिथियासैबो । बिमाखौ जेरावबो नुयैलाय फिसाज्ला-फिसाजोया बिमादैखौ सोंबाय- “आदै, आदै जॉनि आइया बहा थांखो नुदोंना ?” बिमादैया बिसोरखौ जंखायनाय रावजों बुंबाय- “आं माबोरै मिथिनो ? नोंसोरनि आइया बहा थाडो, बहा मायो, बियो माबा आंनियाव सोंना थाडोनामा ?” फिसाइयाबो लागिखौ गिनानै एलागिखौ बारा नागिरिथिंबायासै । बियो सानबाय, बियो बहाबा माबा जानानै थैना थाबाय । फिसाज्ला-फिसाजोया बिमाखौ नागिरै-नागिरै जेरावबो मोनैलाय गाबखु-खुगु थाबाय, बै सानखालि बिसोर सिगांनि सानफोरबादिनो मोसौ गुमनो थांबाय, मानोना मोसौ गुमनो थाडबासिनो थायोब्ला लागिजों बिसोरो रायजानो आरो बुजानो गोनां जायो ।

बिदिनो बिसोरो गोसोनि दुखुजों गाबखु-खुगु मोसौ गुमबाय थानायावनो सानसेखालि सानदुं गोसायाव दै गांनायलाय बिसोर बै फुखि गिदिरावनो दै लॉनो थांबाय । सानजौफुथिर समाव फुखियाव रावबो गैया, निजोम सि-स्राय । थिग बे समावनो बिमा खासेवआ दै सिंनिफ्राय बोरियाव गाखोबोनानै बिसोरखौ राव होफैबाय- “आंनि फिसा स’ना, तेजा आरो कानाइ, नोमादैया आंखौ नाख्तायनानै खासेव जा होननानै मन्थ्र’ रायना आंखौ खासेव खालामना दोनलांदों । नोंसोरो रानलांदों, जेबो जायाखै जानांगौ । आं दैनि राजखुंनिफ्राय परमान बिनानै लाबोदों । नोंसोरो गांनै थास’ बिलाइ खाना लाबोनानै बे परमानखौ जा । नाथाय बे बाथ्राखौ नोंसोर रावनोबो दाखिनथा । नोमादैया मिथिबा बियो आंखौ

बुथारगोन। सानफ्रोमबो सानजौफुआव आं नोंसोरनो परमान जानो होगोन, नोंसोरो बिदिनो फैना जानानै थांफै।' बिमानि बाथ्राखौ खोनानानै सानैबो थास' बिलाइ खाना लाबोना परमानखौ जानानै मोसौ गुमखांना न'आव होलांबाय। बिसोर बिदिनो सानफ्रोमबो परमान जायै-जायै जोंखोल-माखोल जाखांबाय। बिमादैया बिसोरनि समायना महर मोखांखौ नुनानै सानबाय- आं बिसोरखौ मोजाडै जानोनो होआ, थेवबो बिसोरो सानफा-एफा जोंखोल-माखोलसिनसो जाबोदों। बिसोरनि मोखां देहानि गाबा गोथां स'नाबादि जाबोदों। आं तुलानो एसेबां जाहोयोसो जाहोयो बियो माथो बिसोरनिबादि जानो हाया। बिनि जाहोना मा? बिसोरो मोसौ गुमनो थानानै थारैनो बहाबा माबाफोर जायो। बिफोरखौनो साननानै बियो अखानायै तुलाखौबो बिसोरजों लोगोआव मोसौ गुमनो थांफाहोबाय, तेजा आरो कानाया बहा मा जायो नायबायथानोबो सिरि-सिरि फोरोंनानैबो होबाय। बै सानखालि तेजा कानाइआ जोबोर आख'-फाख'आव गोलैबाय, मानोना तुलाया तेजा आरो कानाइनि खिथुखौनो गारा। तेजाया खनसे सोलो खालामना तुलाखौ गोजाननिफ्राय मासे मोसौ होनानै लायनो थिननायलाय तुलाया मोसौखौ होनानै लायनो थांबाय। तुलाया जायखार लांनायलाय हरखाब खासेवआ ओंखारबोनानै बिसोर सानैनोबो जानो होनानै जायखार लांबाय, आरो बिसोरबो आथुर माथुरै जाखांना जानाय बिलाइफोरखौ गारहरबाय। थिग बे समावनो तुलाया गोजाननिफ्राय बिसोरखौ माबा जाबाय थानाय नुहुरनानै आथुर माथुरै खारबोना सोंबाय- "नोंसोरो मा जाखो? आं खुलुमदों आंनोबो इसे हर।" तुलानि आर'ज गाबनानै बुंनाय रावखौ एरायनो हायैलाय बिसोरो तुलाखौ बुंबाय- "जों जानाया आरोथ' गैलिया नों जानोबा बै बिलाइखौनो सोला, नाथाय बे बाथ्राखौ नों आइनो दा खिनथा, खिनथाब्ला जों नोंनो आरो माब्लाबाबो जानो होआ।" तुलाया बिलाइ गांनैखौ खनना लाबोनानै सोलानो हमबाय। बै सानखालि तुलाया न'आव फैफिनब्ला बिमाया तुलानि मोखांखौ गोमोन समफ्रें फिथाइबादि जाना फैनायखौ नुनानै बुजिबायजे बिबो बिसोरजों दिनै माबा मोनजाबाय। तुलाखौ बिमाया आथुर-माथुरै न'सिंआव लिंन लांनानै सोंबाय- "बिसोरजों लोगोसे नों मा जाखो, बुंनायसाय?" तुलाया बुंनो नागिरा। उनाव बिमाया बिनि मेगनाव बानलु सिफ्लेना होगोन होननानै सिगिनायलाय बियो गिनानै गासैबो बाथ्राखौ खिन्थाजोबबाय। बिमाया अब्ला

बुजि मोनबाय जे खासेव जाहैनाय बिहारियासो फिसाज्ला फिसाजोनो माबा मोनसे जाहोबाय थायो। बेखौनो साननानै बियो खासेवखौ बुथारनो फाव फान्दायबाय। बियो उन्दुग्रा बैसां सिंआव देगाव गोबाय माखासे दोननानै बिहा बेराम जादों होननानै उन्दुना थाबाय। फिसाइया बिखौ मा जादों सोंब्ला बियो उस-आस खालामना सानेरला-सानेरलि खालामनो हमबाय आरो अब्लानो बैसांनि देगावफोरा खेब-खुब बायनो हमो। फिसाया गले-गले सोंब्ला बियो बुंबाय- “उस, आं जोबोर गोसा लोमजादों। आंनि हारा-मुराफोरा जेन बायनो हमदों। उस, आंनि जिउआ थांनोसै।” बिसिनि अबस्थाखौ नुनानै फिसाइया जोबोर गिनाय मोनबाय, बियो मंगलमति बुरैखौ लिंना लाबोना बिसिनि बेरामा मा खालामबा हामगोन सोंनानै गोदान नायहोबाय। मंगलमतिखौ लागिया सिगांनो रां-रुफा होनानै फोरोंना दोनखादोंमोनजे- नोंखौ आंनि फिसाइया गोदान नायखानो लिंफैब्ला नों बुं जे फुखि गिदिराव थानाय खासेवखौ बुथारनानै जाहोबानो आंनि बेरामा हामगोन। मंगलमतियाबो लागिया फोरोंनानै दोनखानाय बादिनो गोदान नायनानै खिनथानायलाय फिसाइया गामिनि गासैबो राइजोफोरनो फुखिनि खासेवखौ हमनानै होनो थाखाय आर'ज गाबबाय। राइजोफोरा बाथ्रायाव राजि जानानै बयबो जे, जेखाय, फल' लानानै फुखियाव खासेव हमनो थांबाय। राइजोफोरा फैनायनि सिगांनो बे बाथ्राखौ गुमुर मोननानै फिसाजो-फिसाज्ला सानैबो सिरि-सिरि गाबै-गाबै बिमा खासेवनो बे रादाबखौ खिन्थाहैबाय, अब्ला बिसोरखौ बिमाया बुंबाय- “आं रावनिबो जे, जेखाय, फल'आव गाखोआ, बिसोरो जेब्ला आंखौ हमनो हायैनि मेंगिलना उथिलांफिनगोन, अब्ला नोंसोर गंसे गोबाय जेखाय लानानै फै, आरो आं बेयावनो उथिगोन। नाथाय आंखौ बुथारना जेब्ला आंनि बेदरखौ नोंसोरनो जानो होगोन, अब्ला नोंसोर जानो नाड, नोंसोरो बै सानखालि थाव-खारैजों ओंखाम जानानै था, आंनि सिगां आखाइ मुथि मोननैखौ नोंसोर खासेव गोदाग्रानिफ्राय लाना बे फुखिनि जिडाव फबनानै दोन, बेयावनो आं फांसे जबा बिबारनि बिफां जानानै थागोन। बिनो नोंसोरखौ दुखुआव सुंथागोन।” बिदि बुंनानै बिसोरखौ बुजायना बिमाया थिनहरफिनबाय।

खासेव हमनो साननानै गामिनि बयबो राइजोफोरा फुखियाव ओंखारबाय। फल', जेखाय, जे सारै-सारै राइजोफोरा फुखिनि दैखौ गुबुंले खालामबाय,

नाथाय रावबो खासेव हमनो हायासै। उनाव राइजोफोरा मेंग्लिनानै रुगुंआव उथिब्ला तेजा आरो कानाया गंसे गोबाय जेखाय लाना थानानै राइजोफोरखखौ बुंबाय- जों बे जेखायजोंनो खासेवखौ हमनो हागौ। राइजोफोरा बिसोरनि रावखौ खोनानानै मिनिखाख्लायना जंखायनाय रावै बुंबाय- “नै, गोदोना सेरबा गायखेर ओंखारनाय बावना, आदुवा सानैया खासेव हमोलायनो। दे हमनायसाय नायनि।” बिनि उनाव तेजाया जुगुरुब जुगुरुब खननै खनथामसो गुरबाय, एसेयावनो खासेवा जेखायाव उथिबाय। राइजोफोरा नुनानै जोबोर गोमोनाय मोनबाय।

ओजोंहाय लागिया जेब्लानो बै खासेवा हमजाबाय होननानै खोनायो अब्लानो मोदोमा मोजां मोनदों होननानै बैसानिफ्राय सिखारना ज'खांबाय। खासेवखौ सेख्लायवा लाबोना गोदाबाय थानाय समाव एलागिनि हौवासा- हिनजावसा सानैबो खासेव गोदाग्रानिआव सिगां-आखायमुथि मोननैखौ बिना लानानै सिरि-सिरि फुख्रि सेराव फबनानै दोनहैबाय। बयबो खासेव ओंखैजों ओंखाम जाबाय, नाथाय तेजा आरो कानाया खांसिनि सिडव हाखर जावना लानानै बेदरफोरखौ बेयाव फबना दोननानै थाव-खारै बिनालानानै बिजोंनो ओंखाम जाना फैफिनबाय।

बिसोरो फुख्रि सेराव जेराव बै आखाइ मुथि मोननैखौ फबनानै दोनदोंमोन, बै जायगायाव फांसे नारें जुमरा आरो फांसे ज'बा बिबारनि बिफां रजबाय। ज'बा बिबारनि बिफाड लासैनो गोसो बोखथाबनाय समायना ज'बा बिबारफोरजों बुंफबबाय आरो नारें बिफाडवबो माखासे समायना नारें फिथाइजों उसिफावबाय। तेजा आरो कानायाबो सानफ्रोमबो मोसौ गुमनो थानानै बै बिफां फानैन सिडवनो जिरायनानै बिमाजों खोथा-बाथ्रा राइज्लायबाय थायो।

सानसेखालि बै हादोरनिनो सासे राजाया दोला, मैदेर, गराइ लानानै बे लामार्जों फैबाय थानायावनो लामायाव माखासे जुमरा नारें फिथाइ नुनानै बिथाड जानो गोसो जाबाय आरो बारनैसो समायना ज'बा बिबार लानो लुबैनायलाय बिथाड गावनि मनथ्रिखौ बिबार आरो नारें फिथाइ लायनो थिनहरबाय। हौवासा- हिनजावसा सानैबो मनथ्रिखौ बुंबाय- “नारें आरो ज'बा बिबार फानैबो जोंनि। राजाया गावनो फैनानै बिफैयोबासो जों हरगोन।” मनथ्रिनि खुगानिफ्राय राजाया बाथ्राखौ खोनानै समायना हौवासा आरो हिनजावसानि मोखांखौ नुनानै राजाया

गावनो दलानिफ्राय ओंखारबोबाय । कानाया राजाखौ हान्थु खरायनानै खुलुमनानै बुंबाय- “महाराजाया आनि तेजा आब'खौ हाबा खालामना लाडेब्लासो जों महाराजानो नारें जुमरा आरो ज'बा बिबारखौ हरगोन ।” हिनजावसानि रुजुथावै समायना मोखांखौ नुनानै राजाया बावगोमाबाय, बियो बुंबाय- “जागोन दे, नोंनि बाथ्रा मतैनो जाथोंसै, आं नोंनि तेजा आब'खौ हाबा खालामनानै लांगोन, नाथाय दा बियो उनदै हिनजावसा, बियो गिदिर जाथों, गिदिर जायोब्ला थारैनो आं हाबा खालामनानै लांफैगोन ।” तेजाया मासे मैना दावनि फिसा फिसिदोंमोन, मोसौ गुमनाय समाव सानफ्रोमबो लोगोआव लाफाना एमफौ-एनला, गुमा हमना जाहोयो । कानाया फांसे दालिम फुलि आरो बै मैना दावखौ राजानो होनानै बुंबाय- “महाराजा, जानोबा नोंथाडा जोंबादि गोरिब मानसिखौ बावगारोआनो, बिनिखायनो बे दालिम फुलि आरो मैना दावखौ महाराजनो होबाय । महाराजाया लानानै थां, दालिम बिफांनि फिथाइया जेब्ला मोनगोन आरो मैना दावआ जेब्ला माथो रोंगोन, अब्ला महाराजाया तेजाखौ हाबा खालामनानै लांफैनांगोन ।” राजाया बे बाथ्रायाव राजि जानानै नारें जुमरा, ज'बा बिबार, दालिम फुलि, आरो मैना दावखौ लानानै गावनि नोगोराव गिदिंलांफिनबाय । गोजैआव बुंनायबादि बाथ्राखौ तेजा आरो कानायनि बिमाया राजाखौ बुंनो फोरेंना दोनखादोंमोन । बिनिखायनो कानायआ बिदि बुंनो हादोंमोन । राजाया दालिम फुलिखौ गावनि उन्दुग्रा न' खाथियावनो गायबाय आरो मैनाखौ मोनसे स'नानि फानजारि (फेन्ना)याव सोनानै न'नि खामसालियाव आलायना दोनबाय ।

बिदिनो साननैसो थांबाय । लासै लासै दालिम फुलियाबो गिदिर जाबोबाय । दालिमा बिबार बारबाय, बिबारा फिथाइ लाबाय आरो साननैसो उनाव दालिम फिथायाबो गिदिर जाबाय । ओजोंहाय तेजायाबो लायमोन सिख्ला जाबाय, मैना दावा थाख्लायबाय, बिनि साननैसो उनाव राव लाबाय । नाथाय थेवबो राजाया तेजानि बाथ्राखौ गोसोखाडसै । सानसेखालि बिदिनो जाखां-लोंखां राजाया खामसालियाव जिरायदों, बे समावनो बै मैना दावा राव होबाय-

“बिलाय सिरिना लान्था जाबाय

दालिमा मोनना सिरिलांबाय ।

मैनायाबो राव रोंबाय ।

राजायालाय माखौथो बावगोमाहाबखो ।

तेजा आब'आ सिख्ला जाबाय ।"

सोरथो मा बुंदों साननानै राजाया ओजों-ओजा नायथिं-नायथा खालामना जेबो नुयैलाय जैरै दंमोन बिदिनो ज'ना थाफिनबाय । बे समावनो मैना दावा आरोबाव राव होबावबाय:-

“दालिमा मोननानै सिरिलांबाय ।

तेजा आब'आ सिख्ला जाबाय ।

बिथां राजानि गोसोआव गैला ।"

बे खेबाव राजाया गोजौनि मेथाइखौ खोनानानै हरखाबनो तेजानि बाश्राया बिथांनि गोसोआव फैखांबाय । राजाया सिखारना नायहैबा नुबायजे दालिम बिफाडव दालिम फिथाइया मोनफुनानै दं । अब्लानो राजाया गानै-जोमै, हाथाय, थबसा, दुमफा, लावदुममोनखौ लानानै तेजाखौ हाबा खालामना लायनो थांबाय । नाथाय राजाया गावनि रानिनो बेनि सोमोनदै इसेबो खिन्थालाडसै । राजाया ओंखारलानायनि उनावसो रानिया गावनि बुरै जोथोनलाग्राखौ सोंबाय- “आब’, राजाया बहा थांखो नों मिथिगौना ?” बुरैया फिन होबाय- “मिथिगौथ’, राजाया मा मावो, बहा थाडो नोंसो जेबो धु मोना, जों मोनो । ओइ आजोलि आइ, राजाया नोंनि बिहारि लायनो थांदों, जों खोनानो मोनदों सासे धोनि आबादारिया तेजा मुडै सासे सिख्ला दं, राजाया बिखौनो लायनो थांदों ।” बुरै जोथोन लाग्रानि बाश्राखौ खोनानानै रानिया हं ब्रा-हं ब्रा गाबनो हमबाय । बुरैया रानिखौ बुजायनानै बुंबाय- “आइ नों गाबनो नाड, आं नोंनो मोनसे सोलो होनि खोनासं, नों आं बुंनयबादि खामानि माव । गाबोन जेब्ला राजाया तेजाखौ लानानै गाथोनाव नाव लाखिफैगोन, अब्ला नों बै गाथोनाव ज'ना थानानै बै गाथोनथिं ओंखारनो होनाड आरो बियो जेथिनो ओंखारनो नागिरगोन अब्लानो हेंथा हो । थेवबो जिदु ओंखारबोयो बिनिखायनो दिनैनो आरो मोनसे सोलो खालामना ला, न'नि दरखं मोखाडव थालिरफुलि गायना दोननानै गुदियाव दानना थालिर मोनैखौ एरैबादि गायनानै दोन जेन' तेजानि मोदोमनि हिया नांबानो फानैबो गोग्लैयो । न'नि दरजानि खानाय गान्थिखौ एरैबादि दाननानै दोन' जेन तेजाया दांबानो बियो गस्ल'लाडे । ज'ग्रा खामफ्लायनि आयथेंखौ एरैबादि सिफायना दोन जेन', तेजाया बिनि सायाव ज'नाय लोगो-लोगोनो बिनि आयथेंआ

बुरै आबैनि सल'

बायलाडे, उन्दुग्रा बैसांनि आर्थेखौबो बिदिनो सिफायनानै दोन जेन राजाया तेजाजों बैसाडव उन्दुनो नागिरब्लानो बायलाडे। बिदिनो जायोब्ला राजाया तेजाखौ लोक्षिसारा हिनजाव होननानै होखार हरगोन।”

बुरैनि सोलोखौ खोनानानै रानियाबो बेखौनो मावबाय। ओजोंहाय राजाया थांनानै तेजाखौ हाबा खालामहैबाय। तेजाया बिफाखौ खाराव मारावै एरै बुंनानै बेसादफोर बिबाय-

“आइनि दिननिनो जखायद’ जमा,
बिनिनो जखायथाम आंसो मोनो।
आइनि दिननिनो जखायद’ पेरा,
बिनिनो जखायथाम आंसो मोनो।
आइनि दिननिनो जखायद’ खुरै,
बिनिनो जखायथाम आंसो मोनो।
आइनि दिननिनो जखायद’ मोसौ,
बिनिनो जखायथाम आंसो मोनो।
आइनि दिननि जखायद’ मैसो,
बिनिनो जखायथाम आंसो मोनो।”

तेजाया बिदिनो खाराव-माराव गाबख’बाय थानायावनो बिमाया तेजाखौ लौरि दिन्थिना जंखायनानै बुंबाय- “नै हरनाया, आं नोंनो हिस्त्रि गिजि गांसेबो हरा।” बिनि उनाव राजाया तेजाखौ लानानै गावनि नोगोराव थांबाय। फैनोसै समाव गोसोनि दुखुजों तेजाया रावखौबो माथो होआबासिनो खालि गावनि फंबायखौल मेथाइ खननानै लिंनो लाबोफाबाय-

“आइनि दिननिनो सासेल फंबाय
बिबो आंजोंनो थांफायो।”

तेजाया उनथिंजाय नायफिनाबासिनो फैबायथानो हमबाय। जेब्ला तेजाया नायफिनाबासिनो ओंखारबोबाय, अब्लानो तेजाजों बिफानि नख’रनि गासैबो मुवा बेसादफोरा उन-उन फैफाजोबनो हमबाय। बिफाया सानबाय आरो मिसासै। अब्लानो बिफाया खाराव-माराव तेजाखौ गाबजिहरबाय-

“ओइ आंनि अनजालि तेजा
उनथिंजाय इसे नायखंख्रेलां

ओइ आनि गोरबोनि तेजा

उनथिंजाय इसे नायखंखेलां।”

बिफानि खाराव-माराव बुंहरनायखौ खोनानानै तेजाया इसे नायखंखेनायलाय, ब्रै बाहागोनि से बाहागो बेसाद बिफानि न’आव थालांबाय, आद्रा थाम बाहागोआ तेजाजों फैफाबाय। बिनिखायनो दिनैबो फिसाजो दिहुननानै हरोब्ला बियो बिमा-बिफानि फारसे उनफिननानै नायलाडे, नायलाडब्ला बिफानि न’नि गासैबो बेसादफोरालायनो बिजों लोगोसे थांफायो।

बुरैया गिबियावनो फोरोंनानै दोनखानाय बादिनो रानिया थांनानै नाव लाखिनाय गाथोनाव ज’नानै थाफैखाबाय। तेजानि नावा जेब्ला गाथोन सफैयो अब्ला रानिया राव होबाय-

“बेथिंजाय दा गाखो बाजारि तेजा

राजा दुगैग्रा गाथोनसो।”

बे रावखौ खोनानानै तेजाया गुबुन मोनसे गाथोनथिं उथिखांनो थांबाय, रानिआ आरोबाव बुंहरबाय-

“बेथिंजाय दागाखो बाजारि तेजा

राजानि माइरं सुग्रा गाथोनसो।”

बिदिनो तेजाया जेथिंनो उथिखांनो थाडे बेथिंनो रानियाबो हेंथा होनो हमबाय। बे समावनो राजाया सफैबाय। राजाखौ नुनानै तेजाया खाराव-मारावै बुंहरबाय-

“खोनासं खोनासं हादोरनि राजा,

रानि आब’आ बुंदों बाजारि तेजा।”

राजाया बुंबाय-

“बुंथोंदे, बुंथों बाजारि तेजा,

नों जागोन गुबै रानि, आंजागोन राजा।”

बिदि बुंनानै राजाया गावनि दुगैग्रा गाथोनथिंनो तेजाखौ दैखांनो लाबोबाय। फारसेथिं रानियाबो हाखा-दावरायै फैना न’आव हाबफैबाय। तेजाया न’नि दरखं मोखां सौफैना थालिर फुलि सिडव गसंनाय लोगो-लोगोनो तेजानि मोदोमनि हिन रुगुड नांनानै थालिर फुलि फांनैया गोग्लैगारबाय। बेखौनो नुनानै रानिया राव होबाय-

बुरै आबैनि सल'

“बहानिफ्राय फैखो बाजारि तेजा,
फैनानैनो सिफायबाय थालिरफुलि फांनैखौ।”

बिनि उनाव तेजाया न’आव हाबहैनाय लोगो-लोगोनो न’नि दरजानि
पोलायाव आखाइ नानानै पोलाया थेर-बेथेर जाबाय। रानिया बेयावनो बुंभावबाय-

“बहानिफ्राय फैखो बाजारि तेजा,
फैनानैनो सिफायबाय दरजानि पौला।”

बेनि उनाव तेजाया खामफ्लाय गिदिराव जनाय लोगो-लोगोनो
खामफ्लायनि आयथेंआ बायगारबाय, रानिआ अब्ला बुंहरबावबाय-

“बहानिफ्राय फैखो बाजारि तेजा,
फैनानैनो सिफायबाय खामफ्लाय गिदिरनि आयथें।”

हराव जेब्ला तेजाया बैसाडव उन्दुनो थाडो अब्ला सिगांफोरनिबादिनो
बैसांनि आर्थिंआ बायना गोग्लैबाय आरो बैसां बायना गोग्लैनाय सोदोबखौ
खोनानानै गिदिर रानिया बुंहरबाय-

“बहानिफ्राय फैखो बाजारि तेजा,
फैनानैनो सिफायबाय बैसांनि आयथें।”

बैफोर बथ्राखौ खोनानानै तेजाया गोसोआव जोबोर दुखु मोनना राजाखौ
खाराव-मारावै बुंबाय-

“खोनासं खोनासं राइजोनि बिफा राजा
रानि आब’आ बुंदों बाजारि तेजा।”

राजाया गोसोजों-गोसो बैफोरो रानिनिनो फाव फान्दायनाय होनना बुजि
मोननानै जेबो सानाबासिनो तेजाखौ बुंबाय-

“बुंथोंदे बुंथों बाजारि तेजा,
नों जागोन महाराणि आं जागोन महाराजा।”

बिनि उनाव तेजाया राजानि रानि जानानै राजानि न’खौ समायना
खालामबाय। फारसेथिं बिमादैया हिंसानि अरजों खामब्लावना मेगनाव उन्दुनाय
गैया, तेजायाजे राजानि रानि जाबाय आरो गावनि फिसाजो तुलाया जानो हायासै।
बिमादैया बिनिखायनो गोसोजों-गोसो मोनसे सोलो खालामनानै सानसेखालि
राजानि न’आव थांना राजानि सिगाडव तेजाखौ जोबोर अननाय दिनथिना
बुंबाय- “एसेबां सान जाबाय ग’थआ बिमा-बिफानि न’आव थांनो मोनाखै,

जानांगौ जोबोर हाबिला जानानै दं । बिफाया सान-हर आबादावनो गोसो होथाबना थायो, न'खरनि गुबुन बाश्त्राफोरनि जेबो खबर लाखिया । हिन्जावसाखौ नुयैनि आंनि गोसोआबो उसु-खुथु, खालौ-बिलौ मोनबाय दंमोन, बिनिखायनो आं गावनो बिखौ साननैसोनि थाखाय लानो फैदों ।" तेजा बिमादैनि बाश्त्राखौ खोनानानै राजाया तेजाखौ बिमादैजों न'आव हगारहरबाय । तेजाखौ लोगोआव लाना बिमादैया गावनि न'आव सफैबाय । तेजाया फैनाय समाव राजानि न'आव दाखोन्दा हि गारबोदोंमोन ।

तेजाखौ जदियबाबो बिमादैया जोबोर अनै-खानै जाहोबाय लोंहोबाय थादोंमोन थेवबो नाथाय सान-हर गावनि साननायखौ जाफुंहोनो बियो खाबु नागिरबाय थानो गाराखैमोन ।

सानसेखालि बिमानि फोरोंनायमथेनो तुलाया तेजाखौ बुंबाय- "आगै, नोंनो राजाया गाननो होनाय आसान, मनि, फुलखुरिफोरा जैरैबादि समायना, खनसे आंनो गाननायना नायनो होनोना ?"

तेजाया बाश्त्राखौ मोजां ओंथियै बुजिना लानानै बुंबाय- "गान, गान । गाननायनानै नाय, गाननायबालाय माथो जानो ।" बिदि बुंनानै तेजाया गावनि आखाइ खोमा गनथंनि गहेनाफोरखौ खुना तुलानो गानहोबाय । बे समावनो बिमादैया खाथियाव फैना तेजाखौ बुंबाय- "आइ नों ओजों फैलाय आं नोंनि खर' आव थेमा नायना खानायखौ मोजाडै खानना होनि ।" बिदि बुंनानै बिमादैया तेजाखौ फज'ना लाना थेमा नायनो हमबाय । थेमा नायबाय थानाय समावनो बिमादैया मोनसे लहानि गुजि लाना मोन्थोर आवरायना हरखाब तेजानि खर' गेजेराव बुना होनानै बुंबाय- "नों दावस्रि जा" लोगो-लोगोनो तेजाया दावस्रि जानानै न'नि उखुमाव बाहैबाय ।

बे जाथायनि अखानायै राजाया तेजाखौ दोलायाव लानानै थानो थाखाय मानसि थिनहरबाय । तेजानि बिमादैया तुलाखौनो तेजानि फालि-दखना, हि-जोम, गहेनाफोरखौ गानहोनानै थिग तेजाबादिनो साजायनानै राजानि न'आव फाथायहरबाय । तुलायाबो नुनायाव गोबां गुन तेजाबादिनोमोन, बिनिखायनो राजानि मेगनाव बेयो जेबो गोबां गोरोबै नुआसै, आरो जा इसे नुदोंमोन राजाया सानबायजे बिमानि न'आव बै साननैसोआव रंजा बाजायै, गोसो-खुसियै जायै लोडै थानो मोननानै तेजाया बिदि जादों । दावस्रि दावआबो राजानि दोला-

मानसिफोरजों बिरलांफानानै राजानि न' सहैना राजानि उखुमावनो बासा लाबाय ।

तेजाया बिफानि न'आव थांनाय समाव गांसे इन्दिनि हि ससे दाना आद्रायै गालांदोंमोन । तुलाया फैना दानिया बै हिखौ दानांगौ जाबाय । नाथाय तुलाया मोजाडै हि दानो रोड । सानसेखालि सालखुन्थायाव ज'ना तुलाया हि दानो हायैनि खुन्दुंफोरखौ बोगदिं-बोगदा बस'जोबनायखौ नुनानै दावस्रि दावआ बिरबोना हिसान थिलिनि उखुमाव बाफैना बुंनो हमबाय-

“बस'नाड बस'नाड आनि आद्रा हिसानखौ,

मोजाडै मोजां दैखांनो दोन ।”

राजायाबो बे समाव खाथियाव जनानै दंमोन । बे बाश्राखौ खोनानानै राजाया दावस्रियालाय माथो बुंदों जेबो साननानै मोनस्लाबैलाय सिरि-सिरि थाबाय ।

गुबुन सानसेखालि सानजौफुआव राजाया जाखां लोंखां तुलाजों ज'फाना पासा गेलेदोंमोन । बे समावनो दावस्रिया बिरबोना इसे सिगाडव बानानै बुंनो हमबाय-

“नों मानो आब्रा-बब्रा जाखो राजा ।

गेदेरफोर (बेवाय)जोंनो पासा गेलेदों ।”

राजाया गिबियाव दावस्रिनि थाख्लायनायखौ बारा गोसो होआबासिनो गोसो होथाबना पासा गेलेबाय । नाथाय दावस्रिया आरोबाव खनसे बिदिनो बुंबावबाय-

“नों मानो आब्रा-बब्रा जाखो राजा ।

गेदेरफोर (बेवाय)जोंनो पासा गेलेदों ।”

राजाया दावस्रिनि बाश्राखौ खोनानानै गोसोआवनो इसे सम सानहाबना नायबाय । राजाया लासैयै सिखारना सिंआव हाबलांबाय, ओंखारबोफिननानै फारसे आखाइयाव उखैनाय लारु आरो फारसेथिं मोनसे गांनाय लारु लानानै दावस्रिनि फारसे लानानै बुंबाय- “जिदु नों गुबुन सोरबासो, अब्ला बिरबोनानै आनि आखायनिफ्राय गांनाय लारुखौ लानानै थांगोन आरो जिदु आनि सोरबा आंगो मानसि नोंगौ, अब्ला नों आनि आखायावनो बानानै बे उखैनाय लारुखौ जाफै ।” राजानि बिदि बुंनायलाय, दावस्रिया बिरबोना राजानि आखायाव बाफैना उखैनाय लारुखौ जानो हमबाय । राजाया दावस्रिखौ अननानै खर'आव आखाइजों

बिलिरब्ला बिथांनि आसिआव माबा मोनसे खात्रां बेसाद मोनदांबाय, बिथाडा मोजाडै नायनानै नुबाय जे बियो मोनसे फिसा लहानि गुजि। राजाया बोनानै गुजिखौ दिहुननाय लोगो-लोगोनो दावस्रिया सोलायनानै तेजा जाबाय। राजाया तेजाखौ नुनानै गोमोबाय।

बिनि उनाव राजाया तेजानि खुगानिफ्राय गुदिनिफ्राय बिजौसिम तेजानि बिमादै आरो तुलानि सोमोन्दै गासैखौबो खिन्थाजोबबाय, आरो अब्लानो राजाया दानथारुखौ हुकुम होबायजे बियो तुलाखौ दानना बिनि बेदर, आखाइ, आथिं, खर' गासैखौबो मोनसे थेमायाव सोनानै आरो मोनसे हासुंआव थुसोना लाबोनानै राजानो होफैनांगौ।

राजानि हुकुम बादिनो खामानि जाबाय। राजाया सानै मानसिनि आखाइयाव बै थेमा मोननै आरो हासुंखौ तुला बिमानो न'आव दैथाय हरनानै मानसि सनैखौ फोरेंना हरखाबायजे बिसोरो बैयाव बुंनंगौजे राजाया खुरमानि न'सिम बे थेमायाव मै बेदर फाथाय हरदों आरो जाय थेमायाव तुलानि खर' आरो आखाइ-आथिं दं, बै थेमाखौ बिसोरो होआबासिनो बैसानखालि हराव लोगोआव लाखिना अखानायै बेरेफुं जायावनो दरखंमोखाडाव दोननानै फैफिनगोन।

राजानि मानसियाबो बिदिनो मावबाय। तेजानि बिमाया बेसादखौ मोनना रंजानायजों बोदोर जाना गाव-गावखौनो बुंनो हमबाय- “आंनि फिसाजोया थानानैनो आंनो अननायनि थफ्ला हरदों आरो बै सासेया एसेबां दिन जानानैबो थुखासेबो हराखैमोन।”

हराव तुलानि बिमा आरो नख'रनि गासैबो बेदर ओंख्रैजों हाबिला जोबजासे ओंख्राम जाबाय आरो हासुंनि थावखौ दिहुनना साथि फोजोंबाय। राजा नख'रनि मानसिफोरा बै हराव जेबो जाया लोडाबासिनो उन्दुनानै थाबाय। तुलानि बिमाया जानो थाखाय जोबोर खावलायदोंमोन। नाथाय बिसोरो जोबोर लोमजादों होननानै जेबो जायासै। ओजोंहाय हराव बयबो जानाय लोंनाय जोबखांनाय उनाव, मानसि सानैया उन्दुग्रा बैसांआवनो देंखो होनानै मेथाइ खननो महबाय-

“खुरमायानो संबाय, खुरमायानो जाबाय, खुरमायानो खुरमाखौ जाबाय।
खुरमानि थैजोंनो साथि फोजोंबाय, बिथाया जोंब्लाव-माब्लाव”

बुरै आबैनि सल'

सिंनिफ्राय तुला बिमाया बिसोरखौ सोंहरबाय- “नोंसोरो मा मेथाइ खनदों?” बिसोरो बुंबाय- “ऐइ आइ, लोमजानायनि खुबावनो जोंहा गियानानो गैया, खुगायाव माबा फैदों, माबा खनफ्लांदों।”

अखानायै फुंआव तुला बिमाया बैसांनिफ्राय सिखारना फैनानै नुबायजे राजानि मानसि सानैया सिखारलांबाय, आरो दरखं मोखाडव मोनसे टेमा गोग्लैना दं। बियो टेमाखौ खेवनानै नायबा सिंआव तुलानि खर' आरो आखाइ आर्थिंखौ सिनायमोननानै सिगां हराव जानाय बेदरफोरा मानिमोन बेखौ मोजाडै बुजि मोननानै होसिखाव होसिखाव गावनो हमबाय।



हाजानाय गनथंखौ खारै होनानै फांथे

सासे राजाया सास्नि राजखुंगुर दंमोन आरो राजखुंगुरफोरा साफ्रोमाबो साफायै राजखुंग्रि दंमोन । राजखुंग्रिफोरा सानफ्रोमबो बेलासियाव ओंखाम जानाय समसिम जयै सिथ्लायाव ज'ना खुन्दुं लुयो आरो गोसोनि बाथ्राफोरखौ राइज्जलाना मेंनायखौ होखारो । जेनथेरनि खेर-खेर गिदिनायजों लोगोसे बिसोरनि खुगानिफ्राय ओंखाम जानाय, मैगं जानाय, ना जानाय गासैबो बाथ्रायानो ओंखारलांजोबो ।

सौत्र दाना जोबलांबाय । दिनैनि दिना बारलांबा गाबोनिफ्राय बैसागु । मानसिनि बैसागु सानखालि दुगैस्रां लोबस्रां फैना सिथ्लायाव गसंफैनाय गावनि गथ' गथाफोरखौ आरो फिसाइखौ गावसोरनि आखाइजों दानाय गोदान हि गांसे होयाबा बिसोरहा जाया, आलासि, न'खरनि सोमोन्दो, न'खरनि खामानि मावग्राफोरनि बाथ्राखौथ' दा बुंसै । बिनिखायनो राजखुंग्रिफोरनि मोदोमाव थरआनो गैया, माबोरैथ' बिबार गोनां गामसा दानो, माबोरै मिहि खुन्दुंजों फालि दानो, माबोरै आर'नाय दानो, बेफोरखौ साननानैनो बिसोरनि मोदोमाव थर गैया । बिसोरो सान-सानसे हि दायो हर-थौजासे खुन्दुं मायदि होयो, खुन्दुं थुनो, मुस्रा सायो ।

दिनै सास्नि राजखुंग्रियानो गावबा गावनि जेनथेरखौ सिगाडव लानानै सोरबा गोलावै, सोरबा गुसुडै खुन्दुं थुनदों । बैसागोआ सफैथारबायानो बुंजासै । गिदिरसिना गेजेर सासेखौ बुंबाय- “रुकुनि बिमा नों बेखेबाव बैसागोनि सानबैसे सिगां आयमोननि न'आव थांगोन ? आं हले दमासि सानखालिसो थांगोन”, “आंहा गोबां जेथो, बेनि सिगां जोबनाय नडा, बिनि अनगायैबो गथ'-गथाय माखासे लानानै आयमोननि न'आवलाय सानबैसे थाहैनो, मोजां मोना माथो । नोंसोरो सानथाम सानब्रैसो सिगांनो थांनो हागोनदे, आं सिगाडव गथ'-गथायनि

बिमा जायैसमआव दस-बारदिन सिगांनो थांखायोमोन, दा आरो जोंहा बै दिना गैलिया, जोंनि बोथोरा थांबाय।" रुकुनि बिमाया बुंबाय- "नंगौथ' आब', आंहाबो एखे दखा, नोंनिखुइ इसेलसो खम। थेवबो साननैसो सिगां थांगोन। नों सानबैसे सिगां थांगोन गायदां बिमा?" गायदां बिमाया फिन होबाय- "आं सानथामसो सिगांनो थांगोन होननानै सानदों।" गायदां बिमानि उननि सासेया बुंबाय- "आं हले सानब्रै सानबासो सिगांनो थांगोन। आरो थालीयै मोदोम हामबासो फैगोन। गसाया दमासि गेजेराव जेन' जेबो खैफोद खालामाब्लानो मोजां।" "उस आंहा जिदु राजा फिसा थानायमोनब्ला। बियो मा एसे खुसिजों बिमायमोननि न'आव बैसागु जानो थांगौमोन। खाना गसाइया आंनि सायावसो मेगन गोग्लैबाय।" बे समावनो खादा बिमाया बुंहरबाय- "आं सानबा सिगां थांगोन।" उन्दै गेजेर सासेयाबो थाबनो बुंहरबाय- "आंबो सानबानि सिगांनो थांगोन, आरो बिमायमोननि न'आवनो खान्द्रानि खुगायाव ओंखाम होगोन।"

साफ्रोमबो बिदिनो खोथा-बाश्त्रा राइज्जलायगासिनो, नाथाय बायनिखुइबो उनदैसिना जेबो बुडाबासिनो खर' फाहायना खुनुदुं थुनबाय दं आरो गेजेर गेजेर गोलाव हांमा सुरहाबदों। बेखौ नुनानै गेजेर सासेया अनखांनाय रावजों बुंबाय- "जोंनि उनदै बिजावजालिखौ आंनो लोगोआव आयमोननि न'आव लांगोन दे।" बे बाश्त्राखौ खोनानानै उनदै बिजावजालिया बुंबाय- "नाडा आब', आं बेयावनो बिखुमजो आइया जा होयो, मैगंजोंनो एबा दुखुजोंनो जा, आं बेयावनो बैसागो जागोन, जेरावबो थाडा।" बे बाश्त्राखौ खोनानानै गिदिरसिना बुंबाय- "मानोथो थाडा जाखोनो आयहेरे, बिमा गैया, बिफा गैया, बिदा गैया, फंबाइ गैया, गैयाथ' गैयानो जोबोआनो गैया, जों साफ्रोमबो आइ-आफामोननि न'आव आलासि जानो थांगोन, नोंलाय हारसिं बेयाव थालांनोसैने? गसाइयानो जेल्ला नोंखौ बिदि मावरिया खालामदों, जोंलाय माथो खालामनो फिसा? दुखु खालामना मा जाबावनो? नोंखौ बेयाव हारसिं दोनलांनंगौबा जों जोबोर दुखु मोनगोन।"

गाबोननिफ्राय बैसागो, दिनै दमासि। लामा-सामाजों सौ-सौ मानसि फैदों, सौ-सौ थांदों, रावनिबो मोदोमाव थर गैया। न'बिगोमानि बिहामजो फिसाजो बिमानि न'आव जरा-जरा थांगासिनो दं। बे समावनो सासे गोजौ मानसि राजहावलियाव हाबनानै राजानि बिसिखौ माथो होनानै बुंबाय- “आइ (बिमानि बिसिगि) आं आंनि बिनानावखौ (आगै) लांनो फैदों।” रानिया गोमोना मेगन गिदिर खालामनानै सोंबाय- “सोरखौ?” बियो फिन होबाय- “नोंथांनि उनदैसिन फिसाजोखौ।” रानिया बुंबाय- “बिहाथ’ रावबो गैया ? नों आरो बहानिफ्राय ओंखारफैखो?” बियो बुंबाय - “नछ आइ, आंहा उनदैयाव आइ-आफाया थैलांबाय, आं बिनिफ्रायबो मुवा-बेसादफोरखौबो लाना थांनानै आमायमोननि गामियाव गोदानै न’ बारि-बागान आरो हाबा-हुखा खालामनानै बेयावनो थाबाय दं। गाबोनिफ्राय बैसागु, बिनिखायनो आं आंनि बिनानावखौ लांनो फैदों। बियो बहा दं?” रानिया फिन होबाय- “सिडावनो दं, दानो फैगोन। बाथ्राया जिदु थार अब्लाथ’ मोजाडानो जाबाय। गुबुन गासैबो बिहामजोफोरानो बिमा-बिफानि न'आव थांबाय। बे सासेया जेरावबो थांनो जायगा गैया होननानै आं दुखुसो मोनबाय दंमोन।”

बे समावनो न'सिंनिफ्राय उन्दै बिहामजोया ओंखारबोबाय। बिखुमजोया बिहामजोनो गासैबो बाथ्राखौ खिन्थाजोबल्ला बिहामजोया गोमोबाय। बियो जेरैखिजाया बिहा सोरबा बिदा दं होननानै मानिनानै लाया आरो बिजों थांफानोबो राजि जाया। नाथाय मानसिया बाइदिसिना फुस्लायनाय रावजों गोदै-गोदै अननाय रावजों बुंनानै उनथाराव बिखुमजोनि गोसोखौ जै खालामनो हानायसै। बिखुमजोआ बिहामजोखौ बिजों थांफानो खावलायनायलाय थांगोन थाड जा नानै गोसो गैयाबाबो उनाव थांफानायसै।

बिसोर सानैबो थाडै थाडै गोबाव सम थांनानयनि उनाव मोनसे हाग्रा गेजेराव हाबहैना मोनसे न’ मोनहैबाय। बै न'आव बियो उनदै बिहामजोखौ

सोनानै बुंबाय- “बियो आंनि न’ । गाबोन नोंजों आंनि हाबाया जागोन । दा नों बेयावनो जायै लोडै था ।” बियो सासे बुरैखौ लिंगहरनानै बुंबाय- “आइ नों बिखौ नाय, आं हाबानि मुवा बेसाद बुथुमनो थानि ।” बाश्राखौ बुंनानै बियो ओंखारलांबाय । राजखुंग्रिया दासो बुजिमोनबायजे बियो सिखावनि आखाइयाव गोग्लैबाय । गिनायजों बियो थानो हायैनि दामब्ले जसोबाय । बे समावनो सासे बुरै मानसि फैनानै बुंफैबाय- “सिखार आइ, गिनो नाड, दुखु दाखालाम । राजानि न’निखुइबो नों आंनि फिसानि न’आव मोजाडै सुख-सान्ति यै जायै-लोडै थानो हागोन । सिखारनानै खबनैसो ओंखाम जाफै, आं ओंखाम संनानै दोनदों ।” बुरैनि बाश्राखौ खोनानानै राजखुंग्रिया गोसोआव इसे बोलो लाबोनानै बुंबाय- “बुरै आइ, नों सोर ?” बुरैया फिन होबाय- “बियो आंनि फिसाज्ला । जों धोनि आरो मोजां जाथिनि मानसि । बियो गामि, नोगोरनिफ्राय धोन, सना-रुफा खावना लाबोनानै आंनि न’आव सोनानै दोनदों, नाथाय बियो दिनैसिमबो हाबा खालामाखै । दाखालैबावै बियो राजानि न’आव सिखाव खावनो थानोंमोन । बेयावनो बेरा गब्लंजों गावनि गनथंखौ सोहरनानै नोंसोर गासैबो राजखुंग्रिफोरनि खोथा-बाश्रा राइज्जायनायखौ खोनासंबाय दंमोन । बेयावनो नों माथो नोंहा रावबो गैया होननानै गाबदोंमोननो, बिनिखायनो बियो सोलो खालमनानै नोंखौ खावना लाबोदों । बियो नोंखौ हाबा खालामगोन । बियो दिनै गामियाव थानों, नोंनि हाबानि थाखाय मुवा बेसाद लायनो । गाबोन गिदिनानै फैफिनगोन । आइ, नों दुखु खालामनो नाड, नोंहा जोबोर सुखु-गोजोन जागोन ।” बिदि बुंन राजखुंग्रिखौ बुजायना ओंखाम जानो लाबोनानै होफैबाय । राजखुंग्रिया नाथाय ओंखामखौ आखाइजोंबो दाडसै । हराव राजखुंग्रिया बुरैजोंनो लोगोसे थाफाबाय । नाथाय जेब्ला सोराडो, बियो बुरैनि खाथिनिफ्राय सिरियै सिखारबोना बुरैखौ बैसाडवनो दोंसे दिरूंजों गोरायै खाथेना दोनबाय आरो गराइनि गलिनिफ्राय मासे गोखों गराइ खेवना लानानै बेयाव गाखोना फायदां दाब्राय बोबाय । राजखुंग्रिया

गरायाव गाखोना फैबायथानाय समाव लामा ससेयाव नुबायजे बै मानसिया फांसे बिफां सिडाव जगासिनो दं। बियो गोजाननिफ्राय राजखुंग्रिखौ नुहुरना, गराइयाव गाखोना राजानि सोरबा सानथ्रि फैदों सानानै जनायनिफ्राय सिखारना स्रोदयै हाग्रा गेजेराव हाबहैबाय। राजखुंग्रिया बै बिफां सिडाव सहैनानै नुबायजे बिफां गुदियाव माखासे बाखार लगायनाय सनानि बाइदि रोखोम गहेना गोग्लैना दं, बै मानसिया हाखा-दावरा सिखारना खारलांनयलाय मुवाफोरखौ लाना थानो हायासै। राजखुंग्रिया बै सनानि गहेनाफोरखौ खनथुमना गराइखौ गोख्रै दाब्रायना राजथावनियाव सफैबाय। राजखुंग्रिया जेब्ला बयनिबो सिगाडाव गासैबो बाथ्राखौ गुदिनिफ्राय बिजौसिम खिन्थाबाय, अब्ला बयबो गोमोजोबबाय।

मानसिया गावनि न'आव थाना राजखुंग्रिया खारखोमालांनयखौ नुना, बिमानि बान्दोखौ खेवना होनानै आरोबाव राजानि हावल्लिफारसे आगान सुरबोबाय। बेलासियाव उन्दै बिहामजोया बिखुमजोजों बाथ्रा राइज्जलायबाय थानाय समाव सिगांनि बादिनो सिखावा बेरानि गब्लंजों गनथंखौ सोनानै बाथ्राखौ खोनासंखोमाबाय दंमोन। सोलोगोरा राजखुंग्रिया बेखौ थरमोनना लासैयै सिखारना थानानै खुर गंसे आरो खारै खुरैसे लाबोना हरखाबनो थानानै खुरजों बिनि गनथं बिजौखौ हानानै बेराजों समान खालामना होबाय आरो आथुर-माथुरै खारैखौ लुना होनानै बाथ्रा फाव मोनसे बुंबाय-

“हाजानाय गनथंखौ खारै होना फांथे”

सिखावा आफालै, आइलै बुंन गाबख्रावना खारलांनयखौ खोनाना राजानि सानथ्रिफोरा खारलांना बिखौ हमनानै लाबोबाय। अब्ला बे सिखावानो राजखुंग्रिखौ थगायना लाना थादोंमोन होनना खिन्थानायलाय राजाया सिखावखौ जंआव होबाय।



तिखर आरो हायथु आब'

मोनसे गामियाव जरासे मावरिया सेंग्रा-सिख्ला दंमोन। सेंग्राणि मुडा तिखर आरो हिनजावसानि मुडा हायथु। सेंग्राया उनदैनिफ्रायनो जोबोर सोलोगोरामोन। बिनिखायनो गामिनि मानसिफोरा बिनि मुंखौ तिखर दोनदोंमोन आरो हिनजावसाया नुनायाव गुसुं-गाहाय नुनायलाय बिनि मुंखौ हायथु दोनदोंमोन। उनदैनिफ्रायनो बिसोरो मानसिफोरनि नख'र-नख'र बिबाय-गाबबाय जानानै जोबोर दुखुजों देरबोदों।

बयखौबो फिथा जानाय नुनानै सानसेखालि तिखरा फिथा जानो गोसो जानानै बुंबाय-

‘हायथु आब। आंहा फिथा जानो गोसो जादों।’

बिब'आ फिन होबाय, “ऐइ फंबाय, गोसो जाबायानो जेनिबा, फिथाखौ बहानिफ्राय मोनलायखो? गसाया जोंखौ गासैबो सुखु-गोजोननिफ्राय गोजान खालामदों, नडाबोला आइ-आफायाबो जों देरस्लाबैयावनो गारना थैनाडेना? खाना गसाइयाबो जोंनिफारसे खाना मेगनजोंसो नायहरो। जेनथेन मालायनाव बिबाय-गाबबाय ओंख्रैजों ओंख्रामजोंबाबो सेब जायो, फिथा जानोलाय माइब्रा माइखौ बहा मोननो? थावखौ बहा मोननो? गुरु मिथाइखौ बहा मोननो?”

बिब'नि बाथ्राखौ खोनानानै तिखरा दसे सम सानहाबना थानानै बुंबाय-“हायथु आब, नों आंनो इन्दिहि गांसे हर, आं ओंखारलानि, आं माइब्रा माइ लानानै फैनि।” बिदि बुंनानै तिखरा मोदोमाव इन्दिहि गांसे लानानै ओंखारलांबाय। न'खरसे मानसिनि सिथ्लायाव माइब्रा माइ नाबाय थानायखौ नुनानै तिखरा हाबलांनानै मारान सेरावनो जनानै राइज्जायनो हमबाय। बिगोमाया माइ जिगाबखौ जांख्रिनानै गारनो हमबाय, तिखरा बाइदिरोखोमै मिनिथाव बाथ्रा बुंनानै मिनिहोबाय थानो हमबाय। बे समावो तिखरा दै गांदों होननानै दै बिनायलाय बिगोमाया दै लायनो न' सिंआव हाबलांबाय। बे समावनो तिखरा माइ सायाव उलथां-फालथां उन्दुगलाबायनो हमबाय। मानसिया दै लाना फैनानै नुबायजे सेंग्राया माइ सायाव दामब्ला-दुमब्ला उन्दुसागिनो दं।

बियो सोंबाय- “ओइ तिखर नोंहा मा जाखो?” तिखरा खेंखाय खेंखाय फिन होबाय- “उस, आं उदै सानायावनो थानो हायाखै। मा खालामनो बहा थानो?” मानसिया तिखरनि उदैखौ नानानै होनो थाव लायनो होननानै न’सिंआव हाबलांबाय। बे समावनो तिखरा उस आं उदै सानाया हाथारलिया, बेयाव थानो हालिया, आं न’आव थानोसै, बाथ्राखौ बुंनानै बियो खारनो हमबाय। न’आव फैनानै बियो बिब’खौ बुंबाय -“बियो माइ नडा ने?” बियो हिखौ जांखिना माखासेमानि माइ दिहुननानै होबाय। माइखौ नुनानै बिब’आ जोबोर खुसि जाबाय। बियो बुंबाय- “माइखौ जेन’बा मोनबाय, नाथाय थावखौ बहा मोनलायखो?” “आदसा अब्ला आंनो गंसे थिंखिल हर।” बिदि बुंनानै बियो बिबनिफ्राय गंसे थिंखिल लानानै ओंखारलांबाय। थाडै-थाडै सासे मानसिनि न’खर सेराव दान्दिसे गसंना थानानै बिगोमाखौ बुंबाय -“आदा आंबो फेरेदग्रानि सायाव गाखोन दे? गिलिरा बांसिन जायोबासो बिदैया बांसिन ओंखारगोन।” बिगोमाया बुंबाय- “गाखोनो गोसो जादोंबोलालाय गाखो, जोंहाथ’ खहा गैया?” फेरेदग्रानि सायाव गाखोना तिखरा देंखो बोनानै मेथाइ खननो हमबाय-

“अखाफोर बैसागनि अखा हादैजों हनै

जोमै नायदाव नायदाव दावबोलायगौ हनै

जुलि लायै लायै ना खुरसा”

तिखरनि माथोया जोबोर गोदैमोन, बिनिखायनो फेरेदग्रानि बिगोमाया मेथाइखौ खोनासंनानै गोजोननाय मोनबाय। मेथाइ खनखांनाय उनाव तिखरा बुंबाय- “आदा आंनि गोदोनाया मेव-मेव मोनदों, गय खान्दिसे जानो मोननायमोनब्ला मोजां जागौमोन।” बिनि बाथ्राखौ खोनानानै न’ बिगोमाया गय लायनो न’सिंआव थांबाय, तिखरा लासैयै फेरेदग्रानिफ्राय ओंखारबोनानै हि सिंनिफ्राय थिंखिलखौ दिहुनना लाना थिंखिलासे थाव सोना लानानै ओंखारलांबाय। गिदिंबोनानै बिब’नो थावनि थिंखिलखौ होफैबाय। थाव नुना बिब’आ जोबोर खुसि जानानै बुंबाय- “दानिया थावखौ मोनबाय दे, नाथाय गुरु मिथिाइ नडाब्ला माजों जानो?” तिखरा गुरुमिथाइ नागिरनानै आरोबाव ओंखारलांबाय।

तिखरा थाडै-थाडै मोनसे खुसेर बारियाव माखासे मानसिफोरा खुसेर फेरेदबाय थानायखौ नुहैबाय, बियो मोनसे सोलो खालामनानै गामि खाथिनिनो इसे गोजानाव थानाय हाग्रायाव अर लगायनानै होबाय। जेइ अरनि सालायाव

बारआ नांबाय अरआ ब्लाव-ब्लाव जोंब्लावनो हमबाय। तिखरा फेफे-फुफु खारबोनानै खुसेर फेरेदबाय थानाय मानसिफोरखौ बुंबाय- “आदा, खैफोद जाबाय, बै नायनायसाय, नोंसोरनि गामियाव धम-धम अर जोंब्लावनो हमदों। नोंसोर दानो थांथार, नडाब्ला नोंसोरनि न’, बारि-बागाना खामनानै हांगार जासिगोन।” मानसिफोरा न’थिं नायहरनानै नुबाय अर नांनाय बाश्चाया नंमारगौ। खुसेर आरो खुसेर बिदैनि थिंख्लिखौ जायगायावनो दोननानै बिसोर बयबो न’ फारसे खारलानो हमबाय। तिखरा खाबु मोननानै बिनिफ्राय दोसे खुसेर लानानै हाखु-दाखुयै खारबोबाय।

खुसेर बिदैखौ मोननानै हायथु आब’आ जोबोर खुसि जानो हमबाय। बियो फिथा सावनो लाहार-फाहार खालामनानै थाबनो गोसोआव गोग्लैबाय जे न’आव बन गैया। अब्ला बिब’आ तिखरखौ बुंबाय -“तिखर जाबायथां दनिया, आसोलखौनो बावगारदों। न’आव बनआनो थसेबो गैया।” बिब’नि बाश्चाखौ खोनानानै तिखरा हाग्रायाव बन लायनो खारलांबाय। मोनसे जायफ्रा हाग्रा गेजेराव हाबनानै गोरान बन दानबाय थानाय समावनो मासे मोसाया खाथियाव फैनानै बुंफैबाय- “एइ नों सोर ? नों मानो सोड ह’आ राजा गैया- गैयानो बन दाननो हमदों ? बेयो आंनि बारि होननानै नों मिथिया ? आंनियाव सोड बासिनो नों बेयाव मानो बन दानदों ?”

तिखरा मोसाखौ नुना गिनानैबाबो गिनायखौ लाखोमाना लानानै गोसोखौ इसे दाद खालामनानै फिन होबाय- “अ’ह बेयो मोसा आदा ने ? नंगौथ’ आदा, बेयो नोंनि बारि होननानै मिथिगौ। आं सानबाय मा, अनसुला आदायालाय गावनि अनजालु फंबायनोनो बन थनैसोखौनो हराने ? आदा आं न’आव फिथा संनो लाहार-फाहार खालामदों। आं सानदोंमोन मा, बारियाव थांनानै बन लाबोनायजों लोगोसे मोसा आदाखौबो फिथा जानो लिंनानै फैनि।”

तिखरनि बाश्चाखौ खोनानानै मोसाया खुसिजों बुंबाय- “ए, नंगौनामा आगै ? लां-लां बेसेबां नांगौ लां। आंबो नोंसोरनियाव फिथा जानो थांगोन। नोंनि न’आव जायाबोलालाय सोरनि न’आवथ’ जानो ? हा, माब्लाथ’ थांनांगोन।” तिखरा गावनि न’थिं आसि दिनथिहरनानै बुंबाय- “बैथिंजाय जायसानखालि उखुन्दै खुनाय नुगोन बैसानखालिनो।” बेखौनो बुंनानै बियो बनखौ लानानै न’आव सफैबाय।

बुरै आबैनि सल'

बिनि उनाव बिब'आ फिथा संनानै होबाय, तिखरा उदै बुंजासे जाबाय ।
मोसाया नाथाय जेबो गुमुरखौनो मोनासै । अखानायै बिसोर सिथ्लायाव माखासे
गिसि जिगाबखौ अर लगायना होनानै जोबोर उखुन्दै ओंखार होना, बिब'खौ
थायथाम फिथा सावहोबाय । थायसे फिथाखौ लांगोना मोखाडव, थायसेखौ
दरखं मोखाडव आरो थायसेखौ थिंखिल खुगायाव दोननानै बिब'जों लोगोसे
सानैबो गोजौ बैसाडव गाखोनानै थाबाय । लांगोना मोखाडव दोननाय माइब्रा
माइरंनि, दरखं मोखाडव दोननाया थास'नि आरो थिंखिल खुगायाव दोनाया
सुनैनि फिथामोन । मोसाया तिखरनि न'थिं उखुन्दै नुहरनायलाय फिथा सावदों
साननानै जानो फैबाय । गिबियाव बियो लांगोना मोखांनि फिथाखौ मोनजानानै
जोबोर गोथाव मोनबाय आरो जाबावनो गोसो जानानै बियो दरखं मोखांसिम
फैना बेयाव थानाय फिथाखौबो जाबाय । बेखौ जानायाव बिनि गोदोनाया माननो
हमबाय । गोरना माननायाव थानो हायैनि बियो खारबोना थिंखिल सायाव थानाय
फिथाखौबो जाबाय नाथाय गोदोनायाव गाराय जाना खुदै मन'नो हायै जानानै
मोसाया थैनानै थाबाय ।



सम्पाबति

मोनसे जायगायाव सासे जोबोर दोहोनि मानसि दंमोन। बिथडा सानै बिसि दंमोन। गिदिरा समायना आरो उनदैया आबसु। समायनायाबो सासे फिसाजो आरो आबसुआबो सासे फिसाजो जादोंमोन। समायना बिसिनि बाश्राखौ लानानै फिसाइया उनदै बिसिखौ फिसाजोजों लोगोसे थानो थाखाय खालायसिमा बारियाव गंसे न'सा न' लुनानै होबाय। आबसुआ दुखु-कस्थजों गुबुननियाव बिबाय-बिबाय फिसाजोजों बै न'आवनो थानो हमबाय। बिनि फिसाजोनि मुडा सम्पाबति। सानसेखालि बिफाया सम्पाबतिखौ माइ गोमोन मोननायखौ नेनो कुहुम होबाय। सम्पाबतिया सानफ्रोमबो माइ गेजेराव थानाय बाद सायाव गाखोना सखा आरो दावफोरखौ होबाय थायो। बिदिनो गोबां सान थांबाय, सानसेखालि सम्पाबतिया बाद सायाव गाखोना मेथाइ खननो हमबाय-

“हुर सखा हुर

आंनि माइखौ जानो नाडा नोंनो सौराय होगोन।”

सम्पाबतिनि बाश्राखौ खोनानानै खाथिनि हाग्रानिफ्राय सोरबा फिन हरबाय:-

“माइबो जागोन सौरायबो जागोन।

सम्पाबतिखौ हाबा खालामनानैबो लांगोन।”

सम्पाबतिया बाश्राखौ खोनानानै बियो सोरगिदिं नायनानै रावबो मानसिखौ नुयैलाय गोमोनाय मोनबाय। बेलासियाव माइ नेखांना फैनानै सम्पाया बिमानो गाव खोनानाय गासैबो बाश्राखौ खिनथाबाय। अखानायै बिमाया सम्पाबतिनि बाश्राखौ सैथो नंमारगौना नडा मिथिनो थाखाय सम्पाजों लोगोसे माइ थिलियाव थांफाबाय आरो बिमाया सम्पाखौ सिगांनिबादि बुंनो थिनबाय-

“हुर सखा हुर

आंनि माइखौ जानो नाडा नोंनो सौराय होगोन।”

बेखौ खोनानानै सोरबा हाग्रानिफ्राय सिगांनिबादिनो फिन हरबाय-

“माइबो जागोन सौरायबो जागोन

सम्पाबतिखौबो हाबा खालामनाबो लांगोन ।”

बिमाया बे बाश्नाखौ खोनानानै गोमोबाय आरो खनसेबाव बिमाया सम्पाखौ सिगांनिबादि बुंनो होनायाव सम्पायाबो बुंबाय, आरोबाव हाग्रानिफ्राय सिगांनिबादिनो सोरबा फिनहरबाय । अब्ला बिमा-फिसा जोबोर गोमोनानै न’आव फैफिनबाय । आबसुआ फिसाइनो गासैबो बाश्नाखौ खिनथाबाय । फिसायआ, आबसु, सम्पा आरो गामिनि माखासे मानसिफोरखौ लानानै हाग्रायाव थांबाय । बिसोर सम्पाखौ सिगांनिबादि बुंनो होनायाव हाग्रानिफ्रायबो थिंग सिगांनिबादिनो फिननाय फैबाय । बयबो मानसिफोरा गोमो जोबबाय । थारैनो सोरथो बिदि बुंहरगासिनो दं, बेखौनो नायनो थाखाय बयबो राइजोफोरा हाग्रायाव हाबहैबाय नाथाय बिसोरो रावखौबो, जेबो नुवासै । बिनि उनाव सम्पा बिफाया हाग्रा फारसे नायहरनानै बुंहरबाय- जिदु थारैनो नोंनो सम्पाबतिखौ नांगौ, अब्ला नों जिखियानो जाया मानो जोंनि सिगाडाव नुजाफै । सैथो-सैथो थाम सैथो, सम्पाबतिखौ आं नोंनो हाबा हरगोन । बे बाश्नाखौ खोनानानै हाग्रा गेजेरनिफ्राय मासे जोबोर गिदिर अजगर जिबौ ओंखारबोबाय । जिबौखौ नुनानै गामिनि बयबो मानसिफोरानो फोरस्रा-फोरस्रि खारनो हमबाय । नाथाय सम्पा बिफाया खारनाय मानसिफोरखौ हेंथा होना बिसोरनो गोहो होना बयखौबो थुन्नायफिनबाय । बिनि उनाव बियो अजगरखौ लिनानै न’आव लाना थांबाय । आबसु आरो फिसाजो सम्पाया सानैबो गोबालायनानै गाबनो हमबाय, आबसुआ फिसाजो सम्पाखौ अजगरजों हाबा दाहो होननानै फिसाइखौ खाराव-माराव खावलायनो हमबाय, नाथाय समायनानि बाश्नाखौ लानानै फिसाइया बिनि बाश्नाखौ खोनासडाबासिनो गय, फाथै जानांगौ गासैखौबो होनानै सम्पाखौ अजगरजों हाबा होना बिसोर बिमा-फिसा सानैखौबो अजगरजों गुबुन मोनसे खथायाव थानो होबाय । बै सानखालि समायनाहा खुसिनि सिमा गैया । बियो सानबायजे दिनै सम्पा आरो बिमाखौ अजगरा मन’गोन । अजगरखौ सम्पाबतिजों मेनसे खथायावनो थानो होनाय जाबाय । सम्पायाबो बिखौ दिनै अजगरा मन’सिगोन सानना गसाइखौ आरज गाबना दुखु गोसोयै उन्दुना थाबाय । बिमाया अखानायै सोरांसौसियावनो, आथुर-माथुरै सिखारना सम्पाबतिनि खथायाव खारलाना नायहैबा नुबायजे सम्पाबतिनि मोदोम गंसे स’ना-रुफाजों बुंफबना दं, बिनि

मोदोमा जोंखोल-माखोल जादों नाथाय अजगरा बेयाव गैया । बिमाया सम्पाखौ फोजाबाय । बियो गावनि देहायाव स'ना रुफाजों बुंफबना थानायखौ नुनानै जोबोर खुसि जाबाय । ओजोंहाय सम्पा बिफाया समायनाजों जिबौ आरो सम्पाखौ नायनो होनानै फैना नुबायजे, सम्पाबतिनि मोदोमा स'ना-रुफाजों जोंखोल-माखोल जोंखलाबनो हमदों । बेखौ नुना सानैबो गोमोहाबबाय । सम्पाया बिदि स'ना-रुफा मोननायखौ नुनानै समायनाया हिंसा जानो हमबाय । अब्ला बियो गावनि फिसाजोनि थाखायबो बिदिनो मासे अजगर लाबोनो फिसाइखौ आरज गाबनो हमबाय । फिसाइयाबो बिसिनि बाश्नाखौ खोनानानै लोगोआव गामिनि माखासे मानसि लाना हाग्रायाव थांना मासे अजगर जिबौ हमनानै लाबोबाय । सिगांनिबादिनो गय, फाथै होनानै अजगरजों फिसाजोखौ हाबा होबाय । सम्पाबतिखौ जिबौजों उन्दुनो होनायबादिनो समायनायाबो फिसाजोखौ अजगरजों मोनसे खथायाव उन्दुनो होबाय । फिसाजोआ दिनै गोदान जोंफबनाय सना-रुफा गाननो मोनगोन बेखौ साननानै समायनाया दिनै खुसिनि सिमा गैया । खुसिजों बिमाया हराव उन्दुआबासिनो फिसाजोआ उन्दुनाय खथा खाथियावनो जनानै थाबाय । अजोंहाय अजगर जिबौआ समायनानि फिसाजोखौ आथिं थिंजायनिफ्राय मननो हमबाय । फिसाजोआ बिमाखौ नसिंनिफ्राय बुंहरबाय-

“आइ आंनि आथिडा मेव-मेव मोनदों ।”

बिमाया बाइजोनिफ्राय बुंहरबाय-

“आइ आंनि बिजामादैया खालफ्रि गानहोयो । लासै-लासै मनना जिबौआ जानजि सहैबाय, अब्ला फिसाजोआ बुंबाय-

“आइ जानजियाव मेव-मेव मोनदों ।”

बिमाया बुंबाय-

“आइ आंनि बिजामादैया दखना गानहोदों ।”

बिनि उनाव अजगरा मननानै जेब्ला बिखा मोनहैबाय अब्ला फिसाजोआ बुंहरबाय-

“आइ आंनि बिखाया मेव-मेव मोनदों ।”

बिमाया फिन होबाय-

“आइ आंनि बिजामादैया फालि गानहोदों ।”

बिनि उनाव अजगरा मन'ना गोरना मोनहैबा फिसाजोआ बुंहरबाय-

“आइ आंनि गोदोनाया मेव-मेव मोनदों।”

“आइ आंनि बिजामादैया सना-रुफा गानहोयो।”

लासै-लासै अजगरा मननानै खर' मोनहैनायलाय फिसाजोआ आरोबाव माथो हरनो हायासै। बिमाया सानबाय- आंनि फिसाया दासो सना-रुफा गाननो मोननानै गोजोनै उन्दुलांबाय। बेखौनो साननानै बिमायाबो गोसो खुसिजों उन्दुलांबाय। अखानायै फुंआव बिमाया सिखारना नायहैबा नुबायजे फिसाजोआ गैया, अजगरा मन'ना लेनदां उन्दुना दं। अब्ला बियो बाश्नाखौ बुजिमोनना खाराव-मारावै गाबनो हमबाय। गामिनि मानसिफोरा बिमा-बिफाखौ बुरखायना अजगरनि उदैखौ हाखावना फिसाजोखौ दिहुननानै सावबाय। बेनि उनाव बिसोर बिसि फिसाइ सानैबो आबसु आरो फिसाजो सम्पाखौ मोबायजोंबो नायनो हाया जाबाय। सान-हर बिमा-फिसा बिसोर सानैखौबो माबोरै बुथारनो हायो बेखौनो सानबाय थानो हमबाय। सानसेखालि हराव बिसोर सानैबो थुंग्रि लानानै बिमा-फिसाजो सानैखौबो दानस'नो फैबाय। थिग बे समावनो सम्पा फिसाइ अजगरआ हरखाब ओंखारबोनानै सानैखौबो मन'ना बिमा आरो सम्पाखौ सानैखौबो दैखांनो लानानै मोनसे हाग्रा गेजेरनि मोजां पाकका न'आव दोनहैबाय। अखानायै बिमा-फिसाजो सिखारना मोनसे सिनायमोनै गोदान जायगा नुनायलाय गिनानै गाबनो हमबाय। गाबनायखौ नुना जिबौआ बुंबाय- “बेयाव नोंसोरहा गिनांगौ गैया, आंसो नोंसोरखौ बेसिम लाबोदों।” बिदि बुंनानै बियो हर गेजेरनि गासैबो जाथाइखौ फोरमायना खिनथाबाय। बिनि बाश्नाखौ खोनानानै बिमा-फिसाजो जिबौखौ बाखनायना गोसो खुसियै बेयावनो थानो हमबाय। बे हाग्रा गेजेरावनो बिमा-फिसाजो आरो अजगरा आलो-गोजोनै जायै लोडैथानो हमबाय। बेयाव थानायावनो सानसेखालि हरखाब बिमाया जब्रायाव गोलैना थैना थाबाय। अजगर आरो फिसाजोआ गाबै-गाबै बिमाखौ गारहैबाय। बिनिनो साननैसो उनाव अजगरा मोनसे गोजान जायगायाव बेराइनो ओंखार लांबाय, सानसेखालि हरखाब सासे बुरै फैनानै बिसोरनि न'आव नुजाफैबाय। सम्पाबतिया गोबां सान मानसिनि मोखांखौनो नुवाखैमोन, बिनिखायनो बियो बुरैखौ बराइना लाबोनानै आथुर-माथुरै ज'नो होनानै बहानि मानसि, बहा फैदोंमोन सोंनो हमबाय। फिननायाव बुरैया बुंबाय- “आइ नों जाय अजगरखौ जिबौ फिसाइ महरै मोनदों, गुबैयै बियो सासे मोदाइसो। बियो सानफ्रोमबो हराव नोंखौ खेबना

नायै-नायै सारि मोनैबादि नुयोब्ला बियो जिबौनि बिगुरखौ सोलायना दोनना मोदायनि महर लाना सोरगोआव बिरलाडे आरो बियाव मोदायफोरजों बाथ्रा राइज्जाय हैबाय थायो। आइ जिदु नों अजगर मोदायखौ फिसाइ महरै मोननो लुबैयोब्ला दा हराव नों सारिमोनना थाना खेबना होबाबो जेबो थर मोनैबादि उन्दुलांनायनि फाव खालामना थाफ्ला। बियो नोंखौ मोजाडैनो उन्दुलांबाय साननानै जिबौनि बिगुरखौ सोलायना मोदायजों राइज्जायनो थांगोन, अब्ला नों सिखारना जिबौनि बिगुरखौ जुजायनि अराव सावनानै हो। बिगुरखौ होनाय लोगो-लोगोनो बियो मोदोमखौ आलौनानै थानो हायैनि मोदायफोरनि गेजेरनिफ्राय मोदायनि महरजोंनो नोंनि खाथियाव नुजाफैगोन। अब्ला नों हाखा-दावरायै गिसिब सिबना बिखौ उन्दुनो हो आरो बियो लासै-लासै उन्दुलांगोन। अखानायै फुडाव नों थाब सिखारना बै मोदोमगोनां हौवाखौ आलो-गोजोनै सिबिना जोथोन लानानै मालागानहो। बिथाडानो नोंनि अजगर फिसाइ।” सम्पाबतिया बुरैनि बाथ्रायाव खुसि जानानै बिखौ हाजासे सना-रुफा होनानै बिदाय हरबाय। हर गेजेराव थिग बुरैया बुंनायबादि फारि-फारि गासैखौबो खालामनायाव सासे मोदोमगोनां सेंग्रा ओंखारफैनाय नुनानै बिथांनि आथिंआव हमना खुलुमबाय। बिनि उनाव बिसोर आलो-गोजोनै राइजो जानानै दिनफोरखौ थांहोबाय। सानसेखालि फिसाइया बेराइनो ओंखारलांनाय समाव बै बुरैया बिसोरनि न’आव नुजाफैबावबाय। सम्पाबतिया बुरैखौ लिंन लाबोनानै जानो होना, मा खबर, बहानिफ्राय फैदों, मानो फैदों सोंनो हमबाय। बुरैया बे खेबाव साल खालामना बुंबाय- “आइ, नोंनि मोजांनि थाखाय आं फनैसो बाथ्रा खिन्थानो फैदों। नों गाबोन बिथांखौ नोंजों गंसे खांसियावनो ओंखाम जाफानो हो। बिथाड जेब्ला नोंजों ओंखाम जानो जगोन अब्ला नोंबो इसेबो लाजियाबासिनो बिथांजों जाफा। बिदि जायोब्ला बिथाड नोंखौ सिगांनिखुइ बांसिन अनगोन आरो नोंखौ गारनानै थानो हानाय नड। जाखां लोंखां सिखारबा बुंजे दिनै आं

ओंखाम जानाय समाव नोंथांनि खुगायाव माखासे गामि नुनायादि मोनदों, नोंथाडा अननानै आंनो गासैबो गामिखौ खुगा फुवारना मोजाडै खिनथा। बे बाथ्राखौ खोनानानै बिथाडा नोंखौ रागा जोंगोन आरो दैयाव ओंखारना बुंगोन नोंनो आंखौ नांगौना, बुहुमखौ नायनो नांगौ ? अब्ला नों बुहुमखौ नायनो होननानै बुं। अब्ला बिथाडा खुगा बेखेवना नोंनो गासैबो बुहुमखौनो दिनथिनानै दैयाव थल्ल'गोन- आंखौ आरो द' बोसोरनि उनावसो नुनो मोनगोन, होननानै बुंगोन नाथाय नों बे बाथ्राखौ इसेबो फोथायाबासिनो दैमा फाराव जबाय था, इसे उनाव नों नुगोनजे बिथाडा नोंनि खाथियाव गिदिंबोफिनबाय।" सम्पाबतिया बे बाथ्रायाव जोबोर खुसि जाबाय आरो सिगांनिबादि सना-रुफा होनानै बुरैखौ बिदाय होबाय। बुरैया गावनि फावफान्दायनाया जाकुंसिगोन साननानै गोसो खुसियै न'आव गिदिंलांफिनबाय। सम्पाबतिया बुरै बुंलांनायबादि अखानायै गंसे खांसियावनो फिसाइजों ओंखाम जाफानो जबाय। फिसाइया बुंबाय- "नोंनि आखल-आखुआ लासै-लासै गात्रि जाबोदों।" बाथ्राखौ बुंनानै बियो गंसे खांसियावो जाफाबाय। जाखां-लोंखां बुरैया बुंनो थिननायमथे बुंबाय- "नोंथांजों ओंखाम जानाय समाव आं नोंथांनि खुगा सिडाव गोबां गामि थानायबादि नुदों, नोंथांनि खुगाखौ सिनानै बेयाव मा दं अननानै आंनो खिनथानायसाय।" अब्ला फिसाइया सम्पाबतिखौ बुंबाय- "अब्लालाय नों आंखौ आरो नुनो मोननाय नंला।" सम्पाबतिया नाथाय राजि जायासै। बियो गले-गले हमथाबबाय थाबाय। बिथाडा सम्पाबतिखौ दैसेराव लाना थानानै बुंबाय-

“अनजालि सम्पाबति,

थार बाथ्राखौ बुं, बुहुमखौ नायनोना आंखौ नांगौ ?”

सम्पाबतिया बुंबाय-

“आथिडाव हमना खुलुमदों आफा, ओइ

नोंखौबो नांगौ बुहुमखौबो नायगोन।”

फिसाइया खुगाखौ सिनानै सम्पानो बुहुमखौ दिनथिनानै मोनसे सनानि गंखन होनानै बुंबाय- “अनजालि सम्पा, जाय बुरैनि बाथ्राखौ लानानै नों बे खामानिखौ मावबाय, बै बुरिया आंनि आइनि सासे बान्दि। आंनि आइया सासे राक्षसि। बिथाडा आंखौ गुबुन सासे सिख्लाखौ हाबा खालामनो थिननायाव आं

खालामाबासिनो नोंखौ हाबा खालामनायलाय, जाते बिथाडा नोंखौ आंनिफ्राय
गोजान खालामना लाना थानानै गुबुन जायगायाव जाहैनो हायो, बेखौ साननानैसो
बुरैया नोंखौ थगायदों। नोंखौ आइया जायोब्ला आं बै सिख्लाखौ हाबा खालामनो
गोनां जागोन। बिनिखायनो जा जाबाय जाबायसै, नोंनो आंनि सनानि गंखनखौ
होबाय। बे गंखनखौ मोजां जोथोनै लाखि। बेयो नोंनि आखाइयाव थायोब्ला
आइ नडा गुबुन राक्षस-राक्षसनि एबा हिंसाखुरिया जुनारफोराबो नोंखौ रावबो
जानो एबा जेबो इनाय खालामनो हाया। बे गंखनखौ नों मोदोमनिफ्राय गारोब्लानो
मिथिनानै लाखाजे नोंहा मोनसे गेदेर खैफोद जागोन आरो मोनसे बाश्ना खोनासंखा-
बे गंखननि गुननि बोलोयावनो नों आंखौ द' बोसोरनि उनाव आंनि राक्षसि
आइनि न'आवनो लोगो मोनफिनगोन। दा आं आंनि सदबांसा मथे आं फैबाय।
अरायबो सांग्रां जा जेन' गंखना गोमाया।' बिदि बुंनानै सम्पा फिसाइया दैयाव
थब्ल'बाय। सम्पाबतिया अब्लासो गासैबो बाश्नाखौ बुजिमोननानै गाबनो हमबाय।
उनाव बियो गावनि न'खौ गारनानै गंखनखौ बिखायाव गोबाना लानानै गाबै-
गाबै हाग्रा-हाग्रा गिदिंथिनो हमबाय। फिसाइनि बिमा राक्षसिया सम्पाखौ जानो
थाखाय बाइदि रोखोमै फाव खालामनो हमबाय, बाइदि रोखोमनि खाबु नागिरनो
हमबाय। नाथाय बै गंखननि गुननि थाखायनो रावबो सम्पानि खाथियावनो
साफिनो हायासै। बिदिनो दिनै सानसे गाबोन सानसे थाडै-थाडै द' बोसोराव
सफैबाय। सानसेखालि हरखाब सम्पाया फिसाइखौ नुहुरना खारलानानै फिसाइनि
आथिडाव हमना गाबनो हमबाय। फिसाइयाबो सम्पाखौ नुनानै खुसिजोंनो
गाबबाय आरो सानैबो जयै थानानै सुखु-गोजोनै राइजो जाना दिन थांहोनो
हमबाय।

ओजोंहाय राक्षसिया बिहामजोखौ न'आव फैनायखौ नुनानै जोबोर
रागा जोंबाय आरो बिहामजोखौ बियो जानो बाइदि रोखोमै खाबु नागिरनो
हमबाय। सम्पाबतिया फिसाइखौ खाथियाव मोननाय लोगो-लोगोनो बनि
आखाइनिफ्राय गंखनाबो गैया जाबाय। नाथाय फिसाज्ला थानायलाय राक्षसिया
बिहामजोखौ जानो हायासै। बिनिखायनो बियो गोसोजों-गोसो सिरि-सिरियै

बुरै आबैनि सल'

रावबो मिथियै बादियै गोजानाव थानाय फिसाइनो गांसे लाइजाम लिरनानै
हरबाय- आंनि गाहाइ सुथुरा थांदों, बुथारना जानानै, आंनोबो खावसे हर।
लाइजामखौ लिरनानै बियो सम्पाबतिखौ लिंहरना लाइजामखौ गावनि फिसाइनो
होनानै फैनो थिनबाय। सम्पाया बिखुमजोनि थिननाय मथेनो फिसाइनो
खिनथायाबासिनो लाइजामखौ हैनो होननानै ओंखारलांबाय। बे समावनो
फिसाइया गासैबो बाथ्राखौ बुजि मोननानै खारलांना उनथिंनिफ्राय सम्पाबतिखौ
गाबज्रिहरबाय-

“अनजालि सम्पा ओइ
एसेबां आथुरै थानो नाडा
दसे थाथनायसाय।”

सम्पाबतिया फिसाइनि बाथ्राखौ खोनानानै थाथबाय, फिसाइया सम्पानि
आखाइनिफ्राय लाइजामखौ फराइना नायनानै रागाजों जावलिया जानानै सम्पाखौ
न'आव लाबोफिनना बिमाखौ जेबो सोडा हसिया गोबौ थुंग्रिजों दाननानै सनै
खालामबाय। बिनि उनाव बिसोर सानैबो बै गासैबो न'बांफोरखौ आरो राक्षसनि
गामिखौ गारनानै गुबुन मोनसे जायगायाव नोगोर खालामना बेयावनो जायै-
लोडै आरो गोजोनै राइजो जानो हमबाय।



बावदा राजानि बिजिरनाय

मोनसे जायगायाव सासे फोरोंगुरुआ सासे फराइसाजों हादर नायनो होननानै ओंखारलांबाय। बिथांमोना थाडै-थाडै सासे राजानि मोनसे नोगोराव मोनहैबाय। बिथांमोना नुबायजे बै नोगोराव जोसा माइरंनि बेसेना सेरआव नै फैसा, आसु माइरंनि बेसेना नै आना, घिउनि बेसेना दैजों समान आरो थावनि बेसेना सेरआव थायसे। फोरोंगिरिया फराइसाखौ बुंबाय- जों बेयावनो थानायानो मोजां जागोन। बिदि बुंनानै बिथांमोना मोनसे न'आव थानो लाबाय।

सानसेखालि राजानि राजथावनि खाथिनिनो न'सुंसेनि न'आव सासे मानसिया सिन्दि जावनानै सिखाव खावदोंमोन। बियो सिखाव खावनानै ओंखारलांनो नागिरनाय समावनो सिखावा न'खर बिगोमाजों हमजानायलाय बिगोमाया बिखौ खानानै राजानि सिगाडव हाजिर खालामबाय। राजाया गावनि मन्थि आरो राजउलाफादनि सोद्रोमाफोरजों बिसार खालामनो ज'नानै जोबोर सानै-हयै मोनबायजे सिन्दिया गिदिर जायामोनब्ला सिखावा बैयाव हाबनो हानाय नडामोन। बेखौनो साननानै राजाया सिखावखौ सोंबाय- “ओइ सिखाव, सिन्दिखौ नों मानो गिदिर जावदोंमोन?” सिखावा फिन होबाय- “महाराजा नोंथाड आंखौ दानस'यो एबा बुथारो नाथाय बे बाथ्राया थारजे आंनि सिप्राड गिदिरमोन। बिनिखायनो बै सिप्रांजों जावनायलाय सिन्दिया गिदिर जादोंमोन।” बे फिननायखौ खोनानानै राजाया बुंबाय- “अह, नोंगौथ” सिखावनि मोदोमावलाय मा दाय ? खामारासो मानो सिप्रांखौ गिदिरै दानखो ? खामारखौ हमनानै लाबो।” बिखौ आखाइ आथिं खाखबना आंनि खाथियाव हाजिर खालामफै। राजानि हुकुमखौ खोनानानै सान्थिफोरा खामारखौ खाना लाबोनानै राजानि खाथियाव होफैबाय। राजाया सोंबाय- “ओइ, खामार, नों मानो सिप्रांखौ गिदिरै दादोंमोन ? नों जिदु सिप्रांखौ गिदिरहै दायामोनब्ला अब्ला बै सिखावा सिन्दिखौ गिदिरहै जावना न'सिंआव हाबना बेसादफोर सिखाव खावना लांनो हानाय नडामोन।” खामारा राजानि सिगाडव हान्थु खरायना बुंबाय- “महाराजा, सोंनानै दानसयोब्ला दानस' जाया, सोडबासिनो दानस'योब्लासो दानजागोन।”

राजाया बुंबाय- “जागोनदे, बुंनायसाय नोंहा मा बुंनो दं ? नझब्ता दिनै नोंखौ बोलि होगोन।” खामारा फिन होबाय- “महाराजा आं सिप्रांखौ दाबायथानाय समाव राजानि सासे रुवाथिया आंनि सिगांजों बाज्ल’-बाज्ल’ थाबायलांदोंमोन। बिखौ नुनानै आं नायहरनायावनो सिप्रांआव हाथिया खनसे बारा नांदोंमोन।” राजाया खामारनि बाश्राखौ खोनानानै बुंबाय- “बाश्राया नोंगौथ’, नोंहा जेबो दाय गैया, बै बान्दियाबा बै समाव बिनि सिगांजों बहा थांदोंमोन ? थां बिखौ हमनानै आंनि खाथियाव लाबो।” राजानि खुगाजों ओंखारनाय हुकुमखौ खोनानाय लोगो-लोगोनो सान्थिफोरा बान्दिखौ हमनानै लाबोबाय। राजाया बान्दिखौ सोंबाय- “ओइ हिनजाव, नों थारखौनो बुंदोंना ? खामारा सिप्रांखौ दाबाय थानाय समाव नों बिनि सिगांथिं मानो थांदोंमोन ?” बान्दिया आखाइ ख’बज’बनानै बुंबाय- “महाराजा, नोंथाडा आंखौ बुयो एबा दानस’यो थेवबो आं सैथोखौ बुंगोन, आइ रानिया बै समाव राजखुंगुरखौ जोनोम होदोंमोन, बिनिखायनो आं अजा लायनो बिथिं खारलांदोंमोन।” बाश्राखौ खोनानानै राजाया बुंबाय- “बाश्रायाथ’ नंगौआनो, नोंनि मोदोमाव जेबो दाय गैया, आंनि फिसानि मोदोमावसो दाय दं, बियो बै समावलाय मानो जोनोम जानांगौ ? आंनि फिसाखौ हमनानै लाबो।” राजानि हुकुमखौ खोनामारनो राजानि गोरलै फिसाज्लाखौ हमनानै लाबोबाय। राजाया राजखुंगुरखौ सोंबाय- “बुंनायसाय, नों बै समावसो मानो जोनोम जादोंमोन ?” गोरलै राजखुंगुरा बेनि जेबो फिन होनो हायैलाय सिरि-सिरि थानायखौ नुनानै राजाया राजखुंगुरखौ बोलि होनो हुकुम होनानै बुंबाय- “आंनि फिसायानो जाथों, आं राजा, आं दोहोरोमनि अबतार, आं माब्लाबाबो अन्याय खामानि मावनो हाया। बिनिखायनो न्याय बिसार खालामनानै नांगौथाय आंनि फिसाखौबाबो बोलि होगोन।” राजानि फिसाज्लाखौ बोलि होनो हुकुम होखांनायनि उनाव मन्थिया बाश्राखौ साननो हमबाय- “जोबोद गाज्रि बाश्रा जाबाय, मोनसे राहा खालामनानै खुदियाखौ बासायनायनि राहा खालामनांगोन।” बेखौनो सानना मन्थिया राजाखौ बुंबाय- “महाराजा बे गोरलै गथ’खौ बोलि होनो सेफसांआ खाबजाया, मोदोमै-मोखाडै गुफुं सासे गिदिर मानसि मोनब्लासो बोलि होनायाव मोजाडै खाब जागोन।” राजाया मन्थिनि बाश्राखौ खोनानानै हुकुम होबाय- “आंनि राइजोआव जायनो मोदोमै मोखाडै गुफुं गिदिर मानसि दं, बिखौ हमना लाबोनानै राजखुंगुरनि सोलाय बिखौ

बोलि होनांगौ ।” मन्थिया राइजोआव मोदोमै मोखाडै गुफुं सासे गिदिर मानसि नागिरनो सान्त्रिफोरखौ हुकुम होबाय ।

ओजोहाय फोरोंगिरि आरो बिथानि फराइसाया राजानि नोगोराव थानानै जोबोर इसेल' बेसेनाव जोसा माइरनि ओंखाम आरो घिउ जानानै मोदोमै मोखाडै-गिदिर जादोंमोन । बै सानखालि फोरोंगिरिया फारसेथिं ओंखारलांदोंमोन । थिग बे समावनो राजानि सान्त्रिफोरा फैनानै फराइसाखौ मोदोमै-मोखाडै गुफुं नुनायलाय बिखौ हमनानै लाना थांबाय । फोरोंगिरिया न'आव फैनानै गावनि फराइसाखौ नुयैलाय बहा थांदों होननानै सोंबा मिथिनो मोनबायजे राजानि सान्त्रिफोरा बिखौ बोलि होनो होननानै हमनानै लांदों । बे बाश्नाखौ खोनानानै फोरोंगिरिया राजानि राजथावनियाव ओंखारहैबाय । फोरोंगिरिया राजाखौ बोर सारस्रिनायलाय राजाया बिखौ सोर होननानै सोंबाय । फोरोंगिरिया बुंबाय- “आं सासे फोरोंगिरि, आखाइ नायनानै मानसिनि इयुनखौ बुंनो रोंगौ, फराइनानै नोंथानि गोदो-इयुन आरो आथिखालनि बाश्नाखौ बुंनो हागौ ।” राजाया गावनि आरो रानिनि आखाइखौ दिनथिनायाव, ग'नकआ माखासे गोसो गोजोनथाव बाश्ना बुंनानै बिसोरखौ गोजोन होबाय । बे समावनो राजाया बुंबाय- “गाबोन सासे मानसि बोलि होनाय जागोन, बिनि सोमोनदै नों मा बुंनो हागौ ?” बे बाश्नाखौ खोनानानै ग'नकआ गोबां सानै हयै बुंबाय- “उ महाराजा, बिनि खाफाला जोबोर मोजां । गाबोन बै समाव जाय मानसिखौ बोलि होनाय जागोन बै मानसियानो सोरगोआव थानानै सोरगोनि राजा जाहैगोन ।” राजाया बे बाश्नाखौ खोनानानै बाज्ल'खांनानै बुंबाय- “आं थानायावनो बहानि बुहाहा अमाबादि मानसिया सोरगोनि राजा जाहैनो ? बिदि आं जेब्लाबो जानो होनो हाया ।” बिदि बुंनानै राजाया गावनि मन्थिखौ लिंन लाबोना हुकुम होनानै बुंबाय- “बै बुहा मानसिखौ दानो हगारहर आरो गाबोन आंसो बोलियाव गाखोगोन । गुबुन रावबो गाखोनो मोना ।” जेरै बिथोन एरै खामानि । अखानायै जलगब बावदा राजाखौ बोलि होनाय जाबाय ।



पानेशै

मोनसे गामियाव सासे बुरै दंमोन। बिहा सासे अनजालु फिसाज्ला दंमोन। फिसाज्लाया सानसेखालि फाथैबारियाव फाथै खनधुमबाय थानाय समावनो हरखाबनो दैसे हांसो बिदै मोननानै बिमानो होफैबाय। बिमाया बिदैखौ आथालसायाव दैखांनानै दोनहैबाय। मोनसे समाव हांसो बिदैनिफ्राय मोदायजोबादि सासे समायना हिनजावसा जानानै आथाल सायाव सिरि-सिरि गाखोनानै थाबाय। बुरैया गामियाव बेरायनो थाडेब्ला हिन्जावसाया सानफ्रोमबो आथालनिफ्राय ओंखारबोनानै बुरैनि सोमनाय गोजां ओंखामखौ जाना माखासे गुदुं ओंखाम संना दोननानै सिरि-सिरि आथाल सायाव गाखोनानै थाहैफिनो। सानसेखालि बुरैनि गोसोआव मोनसे सोंनाय जाखांबाय- आं खान्थायाव सानफ्रोमबो ओंखाम सोमनाय दोनलाडे, नाथाय सोरथो सोमनाय ओंखामखौ जानानै गुदुं ओंखाम संना दोनलाडे? बुरैया सानसेखालि सोलो खालामनानै न'सुंसेनि मानसिफोरखौ गिदिर रावजों बुरहबाय- “दिनै आं गोजानआव बेरायनो थांगोन। नोंसोर आंनि न'खौ एसे नायहरदे।” बाथ्राखौ बुंनानै बुरैया दरजा खनायाव थाखोमानानै थाबाय। गुबुन सानफोरनिबादिनो हिनजावसायाबो बुरैया गुबुनाव ओंखारलांमारबाय सानना गोजौनिफ्राय ओंखारबोनानै सोमनाय ओंखाम गोजांखौ जाना माखासे गुदुं ओंखाम संना दोननानै, बेराजों सायाव गाखोलांनो हमबाय, बे समावनो बुरैया थाब्रोमनो हिनजावसानि आथिंआव हमफैबाय। बुरैया सोंबाय- “नों बहानि हिनजावसा? नों बेयाव मानो फैदों?” बुरैनि सोंनायाव बियो गावनि गुदि बिजौ गासैखौबो बिजिरनानै बुरैनो खिन्था जोबबाय। बै सानखालिनिफ्रायनो बियो बुरैनि न'आव बयबो नुनाय खोनानायबादियैनो थाबाय आरो बुरैया अननानै बिनि मुंखौ पानेशै दोनबाय, गुबुन मानसिफोरा हिनजावसानि सोमोनदै सोडेब्ला बुरैया “आंनि फिसाजो” होननानै बुडो।

बुरैनि फिसाज्लायाबो लासै-लासै सेंग्रा जाबोबाय। पानेशैखौ बियो हाबा खालामनो गोसो जाबाय, नाथाय बियो लाजिनानै बाथ्राखौ बिमानो खिन्थानो हायासै, बिनिखायनो बियो बोरनाय न'नि गोजौ बैसाडव गाखोना आन्दुनानै

थाहैबाय । ओजोंहाय बिमाया फिसाज्लाखौ नागिरना थावखि गिदिंलायबाय, थेवबो फिसाज्लाखौ मोनासै । उनाव बुरैया बोरनाय न'खौ सिबनो थांबोला बैसांनि गाहायाव गयनि साबा मोनसे गोग्लैना थानाय नुनानै गोजौआव नायदावब्ला बुरैया फिसाज्लाखौ आन्दुना थानाय नुहुरबाय । बुरैया फिसाज्लाखौ गाबज्रिहरबाय- “आफा ओइ, नोंनो आं जा नांगौ बेखौनो होगोन, नों ओंखारबो ।” अब्ला फिसाज्लाया बिमानो गाव पानेशैखौ हाबा खालामनो गोसो जानाय बाश्त्राखौ फोरमायबाय । बुरैया फिसाज्लानि बाश्त्राखौ नागारनो हायैलाय राजि जानानै, सिरि-सिरि पानेशैया मिथिया जासे हाबानि लाहार-फाहार खालामनो हमबाय । हाबानि सानखालि पानेशैया दैमा गाथोनाव सबाय हालदै देबाय दंमोन, बे समावनो गुबुन फारसेनिफ्राय सासे बिबायारि बुरै फैनानै पानेशैखौ बुंफैबाय- “आइ आंनोबो सबाय गरनैसो हर ।” बाश्त्राखौ बुंनानै बनि खाथियावनो दामब्ले ज'फैबाय । पानेशैया बुंबाय- “थां बहानि बुरै । आं आदानि हाबानि थाखाय सबाय हालदै देखुबबाय दं, आं माबोरै हरनो ?” “आदसा आइ नोंथ' नोंदानि हाबानि थाखाय सबाय हालदै देखुबबाय दं, नोंदानि खैनाया सोर बुंनायसाय ?” बुरैया सोंबाय । पानेशैया फिन होबाय- “आंथ' मिथिया, नों मिथिगौ नामा ? बुंनायसाय ।” पानेशैनि सोंनायखौ मोननानै बुरैया बुंबाय- “खैनायालाय सोर जाबावनो आइ, नोंजोंनो हाबा होनागिरदों ।” पानेशैया बाश्त्राखौ खोनाना गिनाय मोननानै बुरैखौ सोंबाय- “आइ आं दा मा खालामबावनो बुंनायसाय ?” बुरैया फिनबाय- “नों सिखा नाव गंसे ला आरो जेवरानि बैथा गंसे लानानै नोंसिनि न'नि उनथिंजाय थानाय गिदिर फुखियाव गेलेबाय थाहैथां । नोंखौ लिंहरब्ला नों माब्लाबाबो थांनो नाडा । हर जाब्ला फुखि जिंआवनो सोमब्लि बिफां गुदियाव हाबना थाखोमाना था ।” पानेशैनो सोलोखौ होनानै बुरैया थांफिनबाय । पानेशैया न'आव फैनानै सिखा नाव गंसे आरो जेवरानि बैथा गंसे लाना फुखियाव गेलेबाय थानो हमबाय । पानेशैखौ फैयै नुनायलाय बिमाया खाराव मारावै लिंहरनो हमबाय-

“पानेशै पानेशै आंनि फिसा पानेशै
आंनि गाथोनाव लाखिफै नाव
आखाइ फारनैजों मुथानैहै होलांगोन मुथाब्रै
गोदोनायावबो गानहोगोन गहेना

बुरै आबैनि सल'

गामबारि खामफ्लायाव जना जानो हागोन ओंखाम
रुवाथिया जोथोन लागोन ।”

पानेशैया बिमानो फिन हरबाय-

“आखाइ फारनैजों मुथानै लाया आं मुथाब्रै
नोंनि गाथोनाव लाखिया नाव
गामबारि खामफ्लायाव जना जाया आं ओंखाम
रुवाथियाबो लाया जोथोन ।”

बिदाया पानेशैखौ गाबज्रिहरबाय-

“पानेशै पानेशै आंनि आगै पानेशै
आंनि गाथोनाव लाखिफै नाव
आखाइ फारनैजों मुथानैहै होलांगोन मुथाब्रै,
गोदोनायावबो गानहोगोन गहेना
गामबारि खामफ्लायाव जना जानो हागोन ओंखाम
रुवाथिया जोथोन लागोन ।”

पानेशैया फिन हरबाय-

आदा, आदा, अ, आंनि आदा
नोंनि गाथोनाव लाखिया आं नाव
आखाइ फारनैजों मुथानै लाया आं मुथाब्रै
गोदोनायावबो गाना गहेना
गामबारि खामफ्लायाव जना जाया आं ओंखाम
रुवाथियाबो लाया जोथोन ।
सिगाडव नों अनजालु आदामोन
दा जाबाय फिसाय ।”

पानेशैखौ बाइदि रोखोमै लिंहरसेयावबो फैयैलाय, बिमा आरो बिदाया
दुखु दाहा लानानै न’आव फैफिनबाय । सानाव पानेशैया सिखा नाव आरो बैथा
लानानै बिदिनो गेलेथिडो, हराव बंफां मुरा सिडव हाबनानै थायो ।

सानसेखालि बिदाया बै बंफां मुरा सायाव ज’ना बोरसिजों ना बोनबाय
दंमोन । बोरसियाव गिदिर ना अराबासिनो खालि मावा ना मानैसोआसो अरहां-
माहां खालामबाय दंमोन । बेखौनो नुनानै पानेशैया मुरा सिंनिफ्राय राव हरबाय-

“जेबो नायानो अरा, अरो ना मावा।

आदाया ना बोनो बंफां मुरायाव जना।”

पानेशैया बिदिनो गले-गले बृंहरबाय दं। बिदाया बाश्राखौ गले-गले खोनानाँ सानबाय- “बेयावलाय माथ’ दं, बेखौनो साननानै बियो गंसे रुवा लाना बंफां मुराखौ थेर-बेथेर खालामबाय।” थिग बे समावनो बै बिबायारि बुरैया फैनानै थसे बन बिफैबाय। बियो रागा जोंखानानै बृंबाय- “बुरै नोंनो आंनि हाबाखौ सिफायबाय, दा आरो नों बन नागिरनानै फैदों, थां आं नोंनो बन हरा।” बुरैया दै सेरनि फुलुं हाफोराव रेजेदलाना थानाय बन थुखाफोरखौनो लानानै थांबाय। बुरैया बन थुखाखौ थुखैसां लोबसां नाफोरानग्रा बैसाडव दैखांनो दोनहैबाय, पानेशैया बै बन थुखायावनो हाबनानै दंमोन। बुरैया गुबुनाव ओंखारलाडेब्ला, पानेशैया खान्थानि ओंखाम सोमनायखौ जाना गुदुं ओंखाम संना दोनो। बेबादिनो गोबां सान बारलांबाय, सानसेखालि पानेशैया बुरैजों हमजाबाय। बिनि उनाव सानाव पानेशैया बुरैनि न’आव मासे हांसो जो जानानै थायो आरो हराव सिख्ला जानानै बुरैजों उन्दुफायो। सानसेखालि बिदाया बै बुरैनि सेख्लायावनो गावनि सेंग्रा लोगोफोरजों घिला गेलेबाय दंमोन। पानेशैयाबो बिसोरनि खाथियावनो हांसो जो जानानै गाब-गाब गाबबाय दंमोन। बिदाया घिलाखौ खुबैनाय लोगो-लोगोनो बियो खनखांनो लाना थांबाय। बिदाया सानबाय- “बे हांसोआथ’ इसेल’ नडा, बियो थारैनो हांसो नडा, गुबुन माबासो। बेखौनो साननानै बियो बोरनाय न’आव हाबहैबाय। बिमाया बिखौ मा जादों सोब्ला बियो बृंबाय- “बै बुरैनि न’आव मासे हांसो दं बेखौ आंनो नांगौ।” बिमाया बिबायारि बुरैजों गोबांखेब राइज्जाय होनलाय बै महरगोसा समायना हांसोजोखौ लाबोना फिसाज्जलानो होफैबाय। फिसाज्जलाया हांसोखौ जोबोर अनै बायै लाखिबाय आरो हराव गावजों गावनि बैसाडवनो फुथुनानै लाफायो। सानसेखालि बै बिबायारि बुरैया सेंग्रानिफ्राय गासैबो गुदि बिजौ खोनानानै बृंबाय- “फिसौ बियो हांसो नडा, नोंनि अनजालि पानेशैसो। दिनै नों मोनसे खामानि माव, हराव उन्दुलांफ्लानायनि फाव खालामनानै थाप्ला। नोंखौ हांसोआ खेबनानै हमगोन, नाथाय नों दा सिखार। नोंखौ उन्दुलांबाय साननानै बियो गावनि बिगुरखौ सोलायनानै बायजोआव ओंखारलांगोन अब्ला नों बिनि हांसोनि बिगुरखौ जुजायनि अरआव गारनानै हो। अब्ला बियो हाखा दावरा सिंआव

बुरै आबैनि सल'

खारबोना थर गैयै जागोन । अब्ला नों बिनि खर'आव थाव, दै, खारजि गोखौ
दासोम आरो गिसिबजों सिबना हो । बिदि खालामब्ला बिहा हुस फैफिनगोन ।''
बिदि बुंनानै बुरैया गिदिंलांफिनबाय । सेंग्राया हराव थिग बिबायारि बुरैया
बुंनायबादिनो मावबाय, उनाव नुबायजे हांसोनिफ्राय सासे मोदायजोबादि समायना
सिख्ला जागारबाय । बिनो बै पानेशै । बिनि उनाव बियो पानेशैखौ हाबा खालामना,
न-बां लुनानै सुखुयै राइजो जाबाय ।



बिजामादैनि सल'

सानसेखालि सासे मानसिया गावनि बिजामादैखौ बैसागो जानो लिनहरदोंमोन। बिजामादैया बिहाउनि हांखायनायखौ लाखिनो थाखाय बेसालि समाव बिहाउनि न'आव थांनो ओंखारबाय। बिहाउआ हारसिडै थांनो थिनदोंमोन, बिनिखायनो बियो लोगोआव रावखौबो लांफायाखिसै। नाथाय बियो ससे लामा थांनानै नुबायजे गावजों लोगोसे गावनि सायायाबो फैफादों। बियो साननो हमबायजे बिहाउसोआ आंखौ रावबो मानसिखौ लांफानो होआखै, आं जिदु दा सायाखौ लोगोआव लानानै बिहाउसोनि न'आव नुजाहैयो अब्ला बिहाउसोआ थारैनो आंखौ रागा जोंगोन। बेखौनो साननानै बियो सायाखौ बुंबाय- “ओइ, नों आंजों मानो फैदों ? मा नांगौ नोंनो ? बेनिफ्राय जायखारलां।” सायाया जेबो बुडैखौ नुनानै बियो आरो बुंभावबाय- “नों मानो जेबो बुड ? फालिखौ नांगौ ?” बिदि बुंनानै जेव्ला बियो इसे खर'खौ सोमावो अब्ला सायानि खर'आबो मावफाबाय। सायाखौ खर' सोमावनाय नुनानै बियो सानबायजे बिनो फालिखौ नांगौ। बिखौनो साननानै बियो फालिखौ बेयावनो गारना दोननानै आवगाय लांबाय। ससे लामा थांनानै बियो आरोबाव सायाखौ नुनो मोनबावबाय। बियो बे खेबाव गसलाखौ सायानो होबाय। बिबादिनो बियो गावनि गसला, गामसा गासैखौबो होनानै फोजोबबाय। लासै-लासै साना हाबबाय, सायाखौ नुयै जाबोबाय। अब्ला बियो सानबाय सायाया थांबाय। बियो कुखिखानामोन, बिनिखायनो बियो स'से थांनानैनो नुवा जाहैबाय। थिग बे समावनो बियो बिहाउनि मासे बोराइ मोसौ न'फारसे थांबाय थानाय नुबाय। बियो बोराइ मोसौनि लानजायाव हमनानै बिनि खिथु-खिथु थांफानो हमबाय। स'से लामा थांनायनि उनावनो बियो बिहाउनि न'आव सहैबाय। नाथाय बियो गावनि मोदोमाव गामसा गैयैन थाखाय बिखुमजोनि सिगाडव ओंखारथिनो लाजिनानै खालायसिमा बारिनि थुफ्रासे थालिर बिफां सिडावनो एब्रेना थाबाय। बिहाउआ बिजामादै फैगोन होननानै जोबोर हरथौजासे नेबाय दंमोन। उनाव फैथारै नुनायलाय नेयाबासिनो जायै-लोडै उन्दुना थाहैबाय। बिखुमजोआ ओंखाम

जाखांनाय खांसि खुरैनि खालाय दैखौ खोमसि-खोमलाव खालायसिमाबारियाव
गारहरब्ला बिजामादैनि खर' आव गोग्लैहैबाय । बिजामादैया उस-उस बुंनायाव
बिखुमजोआ साथि लाना नायहैब्ला बिजामादैखौ नुना लिनं लाबोना थुखैस्रां
लोबस्रां गोदान जिजोम गानहोस्रांनानै ओंखाम जानो होबाय । ओंखामजों लोगोसे
बिनो गुरु मिथाइ होदोंमोन । बियो गुरुखौ सिगाडव नुफेरैखाय बेफोरखौ
जाया होनना बुंबाय । अब्ला बिखुमजोआ बुंबाय- “इसे जानायसाय बे खुसेर
बिदैया जानो जोबोर मोजांदे ।” अब्ला बियो इसे जानायनानै जोबोद खद
मोनबाय । बियो सोंबाय- बे गुरुआ बहा दं ? बिखुमजोआ बुंबाय- “बैलाय,
गोजौनि थिंखिलयाव आलायनानै दोनदों ।” ओंखाम जाहोखां आरिखां फुथुनानै
बिखुमजोआबो उन्दुहैबाय । बिजामादैया उन्दुबाय नंगौ नाथाय बियो उन्दुलाडसै
बिनि गोसोआ खालि खुसेर बिदैनि फारसेल' थांबाय थाबाय । जेब्ला बिहाड-
बिखुमजोआ उन्दुलांजोबनायबादि मोनबाय अब्ला बियो लाउथि गंसे लानानै
थिंखिलखौ थुफ्लंना गाहायाव खुगाखौ आजावना जेसेबां हागौ खुसेर बिदैखौ
जानो हमबाय । गुरुखौ जाखांनानै नुबायजे बिदैया मोदोमाव गोग्लैना बिनि
मोदोमा आथा-आथा जाबाय । गानन्दु बानायनो थाखाय लाबोनानै दोनफैनाय
बियो माखासे तुला मोनदांबाय । बियो राहा गेथे जानानै बिनि सायावनो लुथुर-
फुथुर उन्दुनो हमबाय । बिनि उनाव बियो नुबाय जे मोदोम मोनसेया गासै
गुफुर खोमोन गोजा जाबाय । खाथियावनो मानैसो बोरमा खाना दोननाय दंमोन,
बिखौनो नुनानै बियो सिरि-सिरि बोरमानि गेजेराव हाबनानै हर हरसेखौ बेयावनो
थांहोनोसै साननानै हाबसोनानै थाबाय । बै सानखालि सिखावाबो बोरमा खावनो
फैदोंमोन । बिसोरो लामा-लामा सानबोदोंमोनजे जाय बोरमाया खोमोनाव
हमब्लानो खोमोना गुबोगोन बे बोरमाखौनो लांनो नांगोन, मानोना बिदि बोरमाया
मेजेम बांसिन थायो । बिसोरो फैनानैनो मानसिनि मोदोमाव आखाइ होननानै
नुबायजे बिनि खोमोना गुबोदों । बेखौनो नुनानै बेयो मेजेमगोनांसिन बोरमा
सानना खानानै गावसोरजों लाना थांफाबाय । बिसोरो थांनाय समाव मोनसे दैमा
बारदोंमोन । जेब्ला बिसोरो दैमानि गेजेर सहैबाय अब्ला मानसिनि खिथुआ
दैयाव नांनानै सिहैबाय । बियो सिखावफोरखौ बुंबाय-

“दैखां दैखां, सिखाव

आंनि खिथुआ सिबाय ।”

बुरै आबैनि सल'

अब्ला सिखावफोरा बोरमायानो माथो रायदों सानना गोमोनानै बोरमाखौ
दैयावनो गारनानै खारनो हमबाय। दैया बारा बुरजा नडैलाय बियो
गोदोलाडाबासिनो लासै-लासै फैनानै जिंआव जिरायफैबाय। बे समावनो
सोरांबायमोन। दैमा जिंआव बियो जबाय थानाय समावनो बिहाउ-बिखुमजोआ
नागिर-नागिर फैनानै बिखौ मोनफैबाय आरो न'सिम लानानै मोजाडै जाहो-
लोंहो गावनि न'सिम दोनहरबाय।



खुख्रिखाना

मोनसे गामियाव सासे मानसिया सानै महरगोसा फिसाजो दंमोन ।
फिसाजो गिदिरनि मुडा रुपेश्वरि आरो उनदैनि मुडा गुनेश्वरि । रुपेश्वरिखौ
हाबा हरनो सम जानायलाय बिफाया गामियाव राइज्जाय-होनज्जाय सेंग्रा नागिरनो
हमबाय, नाथाय फिसाजोनि जरा गोरोबनाय सेंग्रा नागिरना मोनासै । बिनिखायनो
मोनसे गोजान गामियाव सेंग्रा नागिरनानै थांनो ओंखारबाय । बे समावनो रुपेश्वरि
बिमाया फिसाइखौ बुंबाय- “नोंथाड गोजानाव बरगोदान नागिरना थांनो नाडा,
गोजानाव फिसाजोखौ हाबा हरा, खाथियाव हाबा हरोबासो आं फिसाजोखौ
नुबाय थागोन । गोजानाव हाबा हरोब्ला बहा नुनो ?” फिसाइया हिनजावनि
बाथ्राखौ नागारनो हाथारैनि गामिनिनो सासे सेंग्राजों फिसाजो रुपेश्वरिखौ हाबा
होबाय ।

रुपेश्वरिनि होवाया खुख्रिखानामोन, नाथाय बे बाथ्राखौ बियो रावबो
मिथियैबादि लाखोमादोंमोन । बिनिखायनो गामिनि गुबुन मानसिफोरजों लोगोसे
बिनि बिहाउ-बिखुमजोआबो बे बाथ्राखौ मिथियामोन ।

बिजामादैया बिहाउनि मोशौ मासे बिना लाबोनानै साननैसो हाल
एवफैदोंमोन । सानसेखालि बिखुमजोआ बिजामादैनि सिगाडाव मोसौखौ
नांफिनसिगौ होननानै बिहरफिनबाय । बै सानखालि मोसौआ न’आव
गिदिंबोफिननाया मोनाबिलि जादोंमोन । खुख्रिखाना बिजामादैया आख’-
फाख’आव गोग्लैबाय, दा माबोरै मोसौखौ लांनानै बिहाउनि न’आव हैबावनो ।
बियो दसे गोबाव सम सानै-हयै थि खालामबायजे- मोसौखौ बिहाउनि न’थिं
मोखां खालामना एगारना होनानै बिनि लानजायाव हमनानै आं थांफाबाय थानि,
बिदि खालामब्ला मोसौआ थारैनो गावनि सिनायखानाय न’आव हाबहैगोन ।
बियो साननायबादिनो मावबाय, मोसौआबो थांनानै गावनि गोजाम गुलियाव
हाबहैबाय आरो बिबो मोसौनि लानजायाव हमना थांफानानै बिहाउनि न’आव
सौहैबाय । बे समावनो बिजामादैखौ बिहाउआ नुनानै सोंबाय- “बैयो जावैसो
नडना ?” बिजामादैया फिन होबाय- “नोंथाड मोसौखौ बिहरनायलाय लाबोनानै

आं खाफैदों।” बिनि उनाव बिजामादैखौ ओंखारबोयै नुनायलाय बिहाउआ बुंहरबाय- “जावैसोआ ओंखारबोदो, बेयावलाय मा खालामबाय थाखो ? आखाइ-आथें सुना दान्दिसे जिरायना ओंखामखौनो जाफैदो। जायाबासिनो थानोसैना?” बिजामादैया फिन होबाय- “नड, आं नोंथानि गलियाव बेसेबां मोसौ दं बेखौसो सानबाय दं।” बिहाउआ बुंबाय- “ए, मोसौखौलाय मानोथो सानबाय थानो रानखेब-रानखेब मानैसोल’ मोसौ दं। बे बोसोराव माखासेमानि मोसौ सौखा बेरामाव गोम्लैना थैदों। बिदि बुंना न’सिंआव हाबलांना फिसाजो गुनेश्वरिखौ बुंबाय- “आइ, बालथिंआव दै लानानै थां, गुमैखौ लिंला लाबोना आथिं सुनो हो।”

फारसेथिं बिजामादैया न’आव थांफिननो होननानै लामा गाग्रोमबायदोंमोन, बे समावनो बिबोनांआ माथो हरबाय- “गुमै फै आथिं सुफै, नै आं दै लाबोदों।” बिगुमैया बिबोनांनि रावखौ खोनानानै माथो हरबाय- “आगैना ? फै आंखौ बराइना लांफै, नडब्ला आं एरैनो थाड, आंबादि बिगुमै नोंलाय बहाथो मोननो।” बाथ्राखौ खोनानानै गुरै गोसोनि गुनेश्वरिया बिगुमैखौ आखाइयाव हमना मोजाडै जोथोन खालामना लाबोना आथिं-आखाइ सुनो दै बालथिंखौ दिन्थिनानै होबाय। बे समावनो बिगुमैया बुंबाय- “नों आंनि आथिंखौ सुना होनांगौ, दिनैसो आं एसेबां गोबावनि उनाव फैदों, नोंसोर आंखौ इसेबो अनाने?” बिगुमैया थामसा खालामदों साननानै आथिं-आखाइ सुना होनानै आखाइयाव हमना लांनानै दाहारा गांसेयाव जिराइ होनना फज’ना दोनबाय।

बेबादिनो बिजामादैया दसे सम जना थानायनि उनाव ओंखाम जानो सम जाबाय। बिहाउआ ओंखाम जानो जबाय। बिखुमजोआ ओंखाम खुरना होनानै बिजामादैखौ नेबाय दं, बिजामादैखौ ओंखाम जानो लिंहरगासिनो नाथाय बियो सिखारलाड। खनले-खनले लिंहरबाय थानायलाय बिजामादैया बुंहरबाय- “आं दिनै जोबोर मेंनाय मोनदों सिखारनोनो गोसो जायाखै, नोंथांमोना आंखौ अनोब्ला ओंखामखौ आंनो बेयावनो लाबोदो।” बिजामादैनि रावखौ खोनानानै बिखुमजोआ बिजामादैनो ओंखामखौ लाबोनानै होफैबाय। ओंखामखौ होफैबायसो नाथाय बियो नुवासै, बियो नेबाय थाबाय। ओंखाम जायैखौ नुनानै गुनेश्वरिया बुंहरबाय- “ओंखामखौ जादो गुमै”, बिगुमैया फिन होबाय- “नों आंनि आखाइखौ ओंखामाव फोनांना होबासो आं जागोन, नडबा जाया, मानोना

नोंलाय आरोबाव सानबैसे बिफानि न'आव थाबावगोन, साननैसो उनावनो थांसिगोन, बिनिखायनो बे साननैसोआवनो नोंजों खामानि मावहोनानै लानि, अब्लासो नोंहा आंखौ गोसोआव थागोन।" बिगुमैनि खिलायनाय रावखौ खोनानानै गुनेश्वरिया बिनि आखाइखौ ओंखामाव लगायना होनायलाय बियो ओंखाम जानो हमबाय। बिनि उनाव बिबोनाडबो ओंखाम जानो न'सिंआव हाबलांबाय। दसे उनाव बिखुमजोआ ओंखारबोनानै नुबायजे बिजामादैया जानाय खांसियावनो माउजियाबो फारसेथिंजाय जाफागासिनो। बेखौ नुनानै बिखुमजोआ बिजामादैखौ बुंबाय- "आफा नों नुवाखै नामा? माउजिया नोंनि खांसिनि ओंखामखौ जागासिनो दं, मानो होना होआखै?" बिजामादैया फिन होबाय- "आइ, जाथोंदे, खालि मानसियाल' जाबा जागोनने? गुबुन जिब-जुनारफोराबो जानो नांगौ, माउजियाबो जाथों, आंबो जानि, बयबो जायै-लोडै फोजोबनि।" बिखुमजोआ बुंबाय- "नाड, नाड माउजिखौ होखार हर। नों इसेबो मुगैयाना?" बिदि बुंना बिखुमजोआ है-हा खालामना माउजिखौ होसोहरना उनाव फैबावब्ला बुना होखारहरनो थाखाय मोनसे बन खान्दा बिजामादैनि आखाइ खाथियाव होलांना न'सिंआव हाबलांबाय। न'सिंनिफ्राय बिखुमजोआ आरोबाव ना एवनाय आरो ओंखि बिदै लाबोनानै बिजामादैनि खांसियाव होफैब्ला बिजामादैया सानबाय आरोबाव माउजिया जाफैबावदों। बेखौनो साननानै बियो बन खान्दाजों बिखुमजोनि आखाइयाव बुनानै होबाय। आखाइयाव बुजानानै बिखुमजोआ जग्र'बना थाबाय। सानायजों खेंखायना बिखुमजोआ बुंबाय- "आफा नों थिगखौनो मावबाय दानियाबा, आंनि आखाइखौनो बुखेबथारबाय।" अब्ला बिजामादैया जोबोर लाजिनांथाव दायगोनां खामानि मावबाय साननानै बिखुमजोनि आथिंआव हमना बुंनो हमबाय- "आइ आं ओंखाम जानायावनो उन्दुलांसननानै माउजिनि बाथ्राखौनो सानबाय दंमोन बेयावनो माउजिया आरोबाव आंनि खांसिनि ओंखामखौ जाफैदों साननानै बुना होदोंमोन।" बिखुमजोआ बे बाथ्राखौ खोनानानै बिजामादैखौ निमाहा होनानै दुखु खालामनो नाड बुंना सिंआव हाबलांबाय, बिजामादैया ओंखाम खांसिनिफ्राय सिखारना गाग्रोम-गाग्रोम बाइजोआव आखाइ सुहैबाय। बे जाथाइनि उनाव बियो लाजि मोननानै न' सिंआव फैफिना बासिनो न'आव थांफिननो हमबाय। आगाननैसो थांनानैनो बियो लामा आन्दायना सेख्लानि सिगांआव थानाय खालायसिमा बारिथिं थांनो हमबाय। खालायसिमा

बुरै आबैनि सल'

बारिनि थासबिफां गेजेराव हाबहैनानै बियो साननो हमबाय- बेयो मोनसे गिदिर हाग्रा, बे हराव बे हाग्रानिफ्राय ओंखारलानानै न' सहैनाया आंनि थाखाय सिमांसो, बिनिखायनो हर हरसेखौ बेयावनो सिरि-सिरि थानानै गाबोन सोरांबानो रावबो नुयै समावनो बेनिफ्रायनो न' आव थांनांगोन। बियो बेखौनो साननानै सिरि-सिरि जबाय थानो हमबाय। ओजों फारसेथिं बिहाउ-बिखुमजोआ ओंखाम जाखानानै बिजामादैखौ नुयैलाय बियो न' आव थांबाय साननानै सिरि-सिरि थाबाय। बिनि दसे उनावनो बिखुमजोआ बिजामादैया जानाय खालाय दैफोरखौ खालायसिमा बारियाव गारहरबाय। खांसिनि खालाय दैफोरा गोजौ-गोजौ थास बिफांआव गोग्लैहैना बिजामादैनि मोदोमखौ सिग्लाब हैबाय। मोदोमाव बिदि दै गोग्लैनायलाय बिजामादैया सानबाय अखा हादों, बेखौनो साननानै बियो बुंबाय- “हे जोमै मोदाय, बे खुखिखानाखौ इसे नायफिनहरदो, आरो जेन अखा दाहा, दिनै गोसोआव जि दुखुमोनबाय आरोबाव दुखु दाहोबावसै।” मानसिनि रावखौ खोनानानै बिखुमजोआ साथि गंसे लाबोनानै नायफैब्ला नुबायजे बिजामादैया थिंग्लाब-थिंग्सि खालायसिमा बारिनि थास' बिफां सिडव ज'नानै दं। अब्ला बिखुमजोआ बिजामादैखौ खुखिखाना होनना मिथिनानै फिसाइ आरो फिसाजोखौ लिनं लाबोना थुखैयै-लोबै गोदान हि-जोम गानहोनानै बैसाडव फुथुनानै दोनबाय।



एमबुनि सल'

मोनसे गामियाव सानै बोराइ बुरै दंमोन । बिसोरहा फिसा-फिसौ गैयामोन
आरो जोबोर दुखियामोन । सानसेखालि गामिनि मानसिफोरा फालो-फालो ना
गुरनो ओंखारलानायखौ नुनानै बोराइ-बुरैयाबो मोदोम दुंखांबाय । बोराइया गंसे
गोबाय फल' आरो बुरैया गंसे गोबाय जेखाय लानानै मानसिफोरजों ना गुरनो
ओंखारलानाय । बिलोआव गामिनि मानसिफोरा ना गुरनानै ख'बायै-ख'बाय
ना मोनबाय । नाथाय बोराइ-बुरैया जोबोर गोबाव गुरनानैबो ना मावा मासेबो
मोनासै । उनाव बोराइया रागा जोंनानै बुरैजों नांलायना रागाखौ होखारनो हमबाय ।
बुरैया बोराइनि रायनायाव गोसोआव दुखु मोननानै गोबाय जेखायजोंनो आरोबाव
जुगुरुब-जुगुरुब गुरबावबाय, बिनि जेखायाव मासे एम्बु बंग्ला सिखांबाय ।
बुरैनि जेखायाव एम्बु बंग्ला सिखांनयखौ नुनानै बोराइया एम्बु बंग्लानि सयावनो
रागाखौ होखारनो साननानै ख'बायाव सोनानै न'आव लाबोबाय ।

न'आव सफैनानै बोराइया एम्बुखौ सिख्लायाव हगारनानै लावथि गंसेजों
बिनि खर'आव बुनो नागिरनायावनो एम्बुआ बुंबाय- “आबौ आंखौ बुथारनो
नाड, आं नोंसोरनि नआव दाहोना थागोन, नोंसोर जा मावनो थिनगोन बेखौनो
मावगोन ।” बोराइया फिन होबाय- “अह, बेयो जोंनाव दाहोना थानानै जोंखौ
स'नानि बैसाडवसो फुथुसिगोन माथो ? नों आंनि फोथाराव हाल एवनो खदाला
जावनो हागोन जानु ?” एम्बुआ बुंबाय- “मानो हाया जानो आबौ, आं हाल
एवगोन आरो खदाल जावगोन, नों आंखौ लाखिना नायनायसाय ।” एम्बुनि
बाथ्राखौ खोनानानै बुरैया बुंबाय- “लाखिनानै नायबानो जाबाय, बियो जोबोर
खबदंधार माथो ।” बोराइयाबो बेखौनो साननानै एम्बुखौ बुथाराबासिनो लाखिबाय ।
अखानायै फुंआवनो बोराइया एम्बुखौ बुंबाय- “फोथाराव मोसौ हालिखौ
लानानै थानायसाय, नों माबादि हाल एवो नायथारनि ।” बोराइनि थिननायखौ
मोननानै एम्बुआ मोसौ आरो नांगोलखौ लानानै फोथाराव हाल एवनो थांबाय ।
बै सानखालि एम्बुआ जोबोर गोबाव हाल एवखां दोनखां आलि (सिमा)
खोनो हमबाय ।

थिंग बे समावनो सासे राजाया नोगोराव बेराइनो फैनानै, मानसि-दुमसिजों, एम्बुआ हाल एवनानै आलि होनाय साजों गानानै आलिखौ थेरबेथेर खालामलांबाय। बेखौ नुनानै एम्बुआ रागाजों रायनो हमबाय। राजाया गावखौ रायबायथानाय खोनानानै सोरगिदिं नायोसो नायो, रावखौबो नुवा, सोरथ' बिखौ रायबाय दं, मोसौ हालिनि अनगायै बेयाव रावखौबो नुनो मोनासै। गले-गले रायबाय थानाय खोनानानै राजाया रागाजों सहायनो हायै मोनानानै खाथियाव थानाय मोसौ हालिखौनो लानानै थांबाय।

एम्बुआ राजानि खामानिखौ नुनानै लासैयै हाबुसिंनिफ्राय ओंखारबोनानै बोराइनि न'सिम गिदिंबोफिननानै बोराइ-बुरैनो गासैबो बाथ्राखौ मोजाडै-बेखेवना खिनथाबा बोराइ-बुरैया दुखु खालामनो हमबाय। एम्बुआ बुरैखौ बुंबाय- “आबै दुखु खालामनो नाड, नोंथाड आंनो मनासेसो सबाय बुथुमनानै हर, आं मोसौ हालिखौ लायफिननो थानि।” बुरैया सोंबाय- “नों सबाय बुथुमनानै मा खालामनो?” एम्बुआ बुंबाय- “आं जा खालामनांगौ खालामगोन, नोंथाड खालि आंनो बुथुमनानैल' हर, जेबो सिन्ता खालामनो नाड।” अब्ला बोराइया बुंबाय- “नों मोसौ लायनो थानो नाड फिसौ, राजाजों नांलाय-खमलाय खालामनानै नों जेबो खालामनो हाया, थैनोसो थानाय जागोन। आं मोसौखौ दाहाराव लाबोनानै जा हायो आबादखौ मावसिगोन।” नाथाय एम्बुआ बाथ्राखौ मानियासै, जिजायो जाथोंसै बेखौनो साननानै जेब्ला बुरैया मनासेसो सबाय बुथुमना एवना होरो अब्ला एम्बुआ बेखौनो लानानै ओंखारलांबाय। एम्बुआ जलंगायाव सबायफोरखौ लानानै जलंगानिफ्राय मुथासे दिहुननानै जायै-जायै लामा-लामा मेथाइ खनलांनो हमबाय-

“सबाय बुथुमनानै जायो

लामा लामा थाडे,

आंजों लोगोआव जाय फैयो

बिनोबो होयो।”

एम्बुनि बाथ्राखौ खोनानानै, सबाय मोनजानायनि खगआव गोबां सिंह, मोसा, लखा, बाइदि हाग्रानि जुनारफोरनि अनगायैबो मौ, बेरेफोराबो बिजों लोगो जाफैबाय। एम्बुआ बिसोरखौ ज' खालामनानै गासैनोबो मुथासे मुथासे सबाय रानना होनानै बिसोरनो गावनि गासैबो बाथ्राखौ फोरमायना होबाय,

बुरै आबैनि सल'

बिसोरो बाश्त्राखौ खोनानानै राजाजों दावहा नांनो एम्बुजों थांफाबाय। एम्बुआ गावनि गासैबो जुनारफोरखौ लाना हाद्रि गुफुं होलायना होखाव-होसि खालामना राजानि लांगोना मोखांनिफ्राय राजानो खिन्था हरबाय- “राजाया आंनि मोसौखौ हरफिननो ना आंजों दाउहा नांनो।” राजाया दाउहा नांगोन होनना बुंनायलाय राजानि सानथ्रि आरो एम्बुनि सानथ्रिफोरनि गेजेराव दाउहा जानो हमबाय। दाउहायाव राजानि सान्त्रहायै सानथ्रि थैनायजों लोगोसे सानै फिसाज्लाबो थैनायनि उनाव राजाया राहागोथे जानानै मोसौ हालिखौ लानानै एम्बुनि आर्थिंआव हमना खुलुमफैबाय। राजाया एम्बुनि गोरनायाव आर'नाय होनानै आर'ज गाबना बुंबाय- “जिदु एम्बुआ बे खेबनि थाखाय निमाहा होयो अब्ला एम्बुनो आंनि खावसे राइजो होनायजों लोगोसे आंनि फिसाजोखौबो हाबा होगोन।” बे बाश्त्राखौ खोनानानै एम्बुआ राजाखौ निमाहा होबाय आरो राजानि फिसाजोखौ हाबा खालामना राजानि बिजामादै जानानै, राजानि न'आवनो थानानै बोराइ-बुरैखौबो गावजों राजउलाफादआव लाना थांनानै जोबोर आलो-गोजोनै राइजो जानो हमनायसै।



आफा (बिफानि बिसिगि)नि सल'

सानै जोबोर अनज्जायग्रा बिसुखे दंमोन । सासेया थैनोसै समाव गावनि फिसाज्जाखौ बिसुखेनो गथायनानै बुंबाय- “सुखे आनि फिसाज्जाखौ आं नोंनो गथायबाय, नों बिखौ फेदैरै फोलावै गिदिर-गोलाव खालामना मानसि खालामदो ।” फिसाज्जाखौबो बियो बुंबाय- “सुखेनि आखाइयाव आं नोंखौ गथायबाय, सुखेया नोंखौ जा मावनो थिनो बेखौनो माव, जेरै सोलिनो थिनो बिदिनो सोलि, जेबो बाथ्रायावनो सुखेनि बाथ्राखौ खानाय दोंसेनिबो समान लोरसोर दाखालाम, माबा मोनसे मावनो गोनां जायोब्ला सुखेनो खिन्थानानैसो माव ।”

बिफाया थैलांबाय । फिसाज्जायाबो बिफा थिनलांनाय बादिनो सोलिगासिनो । सानसेखालि बिनि बिसिया सासे हौवासा जोनोम जानायाव बियो बिफानो (बिफानि बिसिगिनो) रादाबखौ खिनथा हैबाय । बिफाया बिखौ बुंबाय- “नोंनि न'नि उनथिं जाय फ'बग्रा हाखर दं गथ'खौ लांना दानो बेयाव फ'बनानै दोनहै । बियो बिफानि बाथ्रायाव गोमोबाय । नाथाय बिफानि बोसोनखौ गोसोखांनानै जेबो बुडाबासिनो गथ'खौ लांना न'नि उनथिंजाय फ'बनानै दोनहैबाय । बेनि बोसोरसे उनाव बिहा आरोबाव सासे गथ' जोनोम जाबावबाय, नाथाय बिफाया बिखौबो सिगांनिबादिनो फ'बनानै दोननो होनायलाय गोसोआव दावदाब लानानैबाबो गथ'खौ फबनानै दोनहैबाय । बिनिनो देरबोसोरसो उनाव बिनि बिसिया सासे हिन्जावसा जोनोम होबाय । बेखेबाव बियो सानबाय आफाया आरो सिगांनिबादि हिनजावसाखौ फबनानै दोननो होनाय नंला । नाथाय बिफाया बिखौ बे हिनजावसा गथ'खौबो सिगांनि फ'बग्रा हाखरआवनो फ'बनानै दोनहैनो थिननायाव गोमोहाबनाय मोनबाय । बियो राहागोथे जानानै गोसोनि दुखुखौ फिसिना लाखिनानैबाबो, बिफानि बोसोन मथेनो गथ'खौ फ'बनानै दोनहैबाय । बिनिनो बोरसेसो उनाव बिनि बिसिया सासे हौवासा गथ' जोनोम होबावबाय । बे खेबाव बियो सानबाय, खाफालाव जा दं बेनो जाथोंसै, बे खेबाव आफाया गथ'खौ फ'बनानै दोनहैनो होयोब्लाबो आं बिनि बाथ्राखौ खोनासंला । बेखौनो

साननानै बियो गथ' जोनोम जानाय रादाबखौ बिफानो होयोब्ला बिफाया बुंबाय-
 “फिसा, नों बे गथ'खौ थुखैस्रां लोबस्रां लाहैथां। नाथाय आं नोंनो मोनसे बाथ्रा
 बुंनि, नों नोंनि सिगांनि गथ'-गथायफोरखौ जेराव फबनानै दोनदोंमोन दिनै
 हराव बै जायगायाव फ'ल गंसे बिनि सायाव साना दोननानै नेबाय था।”
 बिफानि बाथ्रा मथेनो बियो न'आव थांनानै गथ'खौ थुखैस्रां लोबस्रां लाबाय
 आरो हराव बिफाया बुंनाय बादिनो फ'बनाय जायगायाव फ'ल गंसे साना
 खाथियावनो ज'नानै नेबाय थाबाय।

हर गेजेर जाबाय, थिग बे समावनो गिदिर हौवासाया हाखर सिंनिफ्रायनो
 फंबायखौ राव हरबाय- “फंबायलै, आं थानो हायासै। थानो मोननायमोनब्ला
 बिखौ थियायैनो जंआव होगौमोन। उस, बेसेराया मोजाडैनो गबाय।” बेखेबाव
 गेजेर फिसाज्लाया माथो होबाय- “आदालै, आं थानो मोननायमोनब्ला बिखौ
 गोदोनायाव दिरंजों आलायगौमोन। बिनि बिफाया जोंनि बेदरखौ जाबाय।”
 बिनि उनाव हिनजावसाया राव हरबाय- “आदामोन, जिदु आं माबोरैबा थानो
 मोननायमोनब्ला अब्ला बिखौ खांखायबादि जायै-जायै फंफ्ला खालामनानैसो
 गारगौमोन, मा खालामनो आदामोन, गोसोनि बाथ्राया गोसोआवनो थालांबाय।”

बैफोर खोथा-बाथ्राफोरखौ खोनासंनानै मानसिया अब्लासो मोजाडै
 बुजिमोनबायजे बिफाया बिखौ बेसेबां गिदिर हेफाजाब होखो। अब्लासो बिफानि
 सायाव बिहा गोखों फोथायनाय फैबाय।

बेनिनो साननैसो उनाव बिहा माइ फाननो जानायलाय बियो बिफानियाव
 सोंबाय- “आफा, आं माइखौ फाननो सानदों।” बिफाया बिखौ सोंबाय-
 “बेसेना बेसेबां?” बियो फिन होबाय- “थायसेयाव 12 फुरा”, बिफाया बुंबाय-
 “दानो फानथ'नो नाड।”

आरो साननैसो उनाव बियो बिफानि न'आव थांनानै बिफाखौ सोंबाय-
 आफा माइनि बेसेना खमायबायसो। दा मा खालामबावनो? लासै-लासैनो
 खिजानि बांसिनसो खमायगोन। बिफाया बुंबाय- “बेसेबां फुरायै खमायखो?”
 बियो बुंबाय- “दा नैजि फुरा जाबाय।” बिफाया बुंबाय- “थां दानिया फानहैदो।”
 बिफानि बाथ्रामथेनो थायसेयाव 20 फुरायै माइ फानना मोननाय रांखौ लांनानै
 बिफानो दिन्थिफैबाय। अब्ला बिफाया बिखौ बुंबाय- “मोजाडनो जाबायदे,
 दानिया नों बे रांजों स'ना बायना लाबोनानै सनारिनि जोहै मोनसे लारु बानायहै।”

बुरै आबैनि सल'

बिफानि बाथ्रामथेनो बियो स'नानि लारु बानायना लाबोना बिफानो होफैबाय ।
अब्ला बिफाया बिखौ बुंबाय- “बे लारुखौ नों दैमायाव लांना गारहैथां ।” बियो
बिफानि बाथ्राखौ खोनानानै गोसोआव दुखु, दावद'ब लानानैबाबो दैमायाव
स'नानि लारुखौ गारहैबाय ।

मासमोनसेसो उनाव दुम सासेया मासे रौ ना फाननो बोराइनि फिसाज्जानि
न'आव लाबोदोंमोन । बियो रौ नाखौ लाना हास'बानो बिनि उदैनिफ्राय बै
सनानि लारुआ ओंखार बोबाय । बियो बिफानो लारुखौ दिन्थिब्ला बिफाया
बुंबाय- “बेसो नोंनि बेसाद । थां बेखौ मोजाडै दोनहैथां । नों गिबियाव जानोहागौ
आंखौ नोंनि सुथुर होननानैसो सानदोंमोन । दा आं मोननैबो बाथ्राजों नोंखौ
फोथायहोनो हानानै गसाइनि आथिंआव हमना खुलुमदों । थां फिसा, दोहोरोमखौ
सिगाडव लानानै इसोरनि सायाव फोथायनाय लाखिनानै मावनोगोनां खामानि-
दामानिखौ मावना सुखु गोजोनै राइजो जाहैथां । जेबो सिन्ता दाखालाम । गसाइया
अराइबो नोंनि मोजां खालामथों ।”



लटकन

मोनसे हादराव लटकन मुंनि सासे जोबोर दुखिया बामोन दंमोन । बामोननि बिसिया बलबला आखुनि मानसिमोन । फिसाइया रां-रुफा, थाखा-फैसा खालामना लाबोनो हायैनि थाखाय बियो सानफ्रोमबो फिसाइखौ बखिबाय थायोमोन । बिसिजों राइजाबाय थानायनि सानसेखालि बामोनआ गोसोआव जोबोर दुखु मोनबाय । बियो सानबाय- “आं न’निफ्राय ओंखार लांनोसै । रां-रुफा थप्लासे खालामना लाबोनो हायाबोला आं आरो न’आव फैफिनला ।” बेखौनो बरसायनानै बियो फुडवोनो न’निफ्राय ओंखारलांबाय ।

बामोना थानायावनो थानायावनो सानजौफु जाबाय । अब्लासिमहालागै बिनि उदैयाव एंखुर गरसेबो हाबाखै । गांनाय-उखैनायजों बामोना थोर-थोर मोनलायबाय । थिग बे समावनो लामा सेराव गंसे मिथायनि ग’ला नुहुरनानै बामोना खाथिसिम सिगांलांबाय । सानजौफुनि ओंखाम जाखां-लोंखां ग’ला बिगोमाया गावनि डाइन बोसोरनि फिसाज्लाखौ ग’लायाव मिथाय नेनो दोननानै गाव गुबुन फारसेथिनि खथायाव जिरायहैदोंमोन । बामोना ग’ला सेराव गसंहैब्ला गथ’आ सोंबाय- “नोंनो मा नांगौ ? नोंनि मुड मा ?” बामोना फिन होबाय- “आं मिथाय जानो फैदों, आंनि मुड थामफै ।” बिदि बुंनानै बामोना मिथायखौ गबनो खुगायाव सोबाय । बामोनि आखलखौ नुनानै गथ’आ बिफाखौ गाबज्रिहरनो हमबाय- “आफा, आफा, थामफैया मिथाइखौ जाबाय ।” बिफाया जिलमिल उन्दुलांफुदोंमोन, फिसाज्लाया गावनि उन्दुनायाव हेंथा होनायखौ नुनानै रागाजों बुंहरबाय- “थामफैया मिथाय जादोंबोला जाथों, नों आंखौ दिगदार खालामनो नाड ।” बे बाश्राखौ खोनानानै बामोना गथ’फिसाखौ लासैयै बुंबाय- “खोनाबायना दानिया ? नोंनि नोमफाया आंखौ मिथाय जानो होदों ।” बिदि बुंनानै बामोना मिथायखौ गबा-गब जानानै फोजोब-जोबनो हमबाय । गथ’आ नायनानै थानो हाथारैनि आरोबाव बिफाखौ गाबख्रावहरबावबाय । आफा थामफैया मिथायखौ जाजोबबाय- बे खेबाव बिफाया होदाव हरनानै बुंबाय- “फोजोबबा फोजोबथोंदे, नों गाबख्राव हरबाय थानो नाड ।” बिफाया बाश्राखौ मोजाडैबुजियाखै साननानै

बिफानो बाभ्राखौ मोजाडै बुजायना खिन्थानो न'सिंआव खारलांबाय आरो बे सुजुगआवनो बामोना मिथाय ग'लादारनि बाक्सुखौ बेयावनो गोलैना थानायखौ नुनानै जखायबा रुपा दिहुनना लानानै खारलांबाय। फिसाज्लाया बिफाखौ फोजानानै मिथाय जानाय बाभ्राखौ मोजाडै बुजायना होनायाव बिफाया बायजोआव ओंखारबोनानै नुफैबायजे बिनि मिथाइया इसेबो गैला, थामफैया गासैखौबो जाजोबबाय। बियो फिसाज्लाखौ जोबोर रागा जोंब्ला फिसाज्लाया बुंबाय- “आं दखं नोंनो सिगांनिफ्रायनो थामफैया मिथाइ जादों होननानै खिन्थाहरदोंमोन, नोंसो जाथोंदे होननानै बुंदोंमोन।” बिफाया अब्ला बुंबाय- “नों बुंदोंमोन थामफैया जादों होननानै, मानसिया जादों होननानै नों मानो बुंदिया।” फिसाज्लाया फिन होबाय- “बियो गावनि मुंखौ आंनो थामफै होननानै खिन्थादोंमोन।” बिफाया मानसिखौ ब'बे फारसेथिं थांखो फिसाज्लानियाव सोंनानै गावनि गरायाव गाखोनानै मानसिखौ बैफारसेथिं होसोलांबाय।

बामोना मिथाइ जाखांना आथुर-माथुरै खारलांना मेंनानै लामा सेरनि फांसे बिफां सिडव जिरायदोंमोन। थिग बे समावनो हाग्रानिफ्राय मासे अमा ओंखारबोनानै बामोनखौ होसोनो हमबाय। बामोना आथुर-माथुर सिखारना बिफांनि सोरगिदिं गिदिंना खारनो हमबाय आरो अमायाबो खारफानो हमबाय। बिदिनो बिफांनि सोरगिदिं गिदिंबाय थानाय समाव बामोना खनसे अमानि लानजायाव थाब्रोम हमबाय। बामोना अमानि लानजायाव हमना थिग फिदिंबाय थानायावनो बियो ग'लानिफ्राय लाबोनाय रुफानि फैसाफोरा गामसानिफ्राय गना बिफांनि सोरगिदिं आलाय-सिलाय गोग्लैनो हमबाय। नाथाय बामोना अमानि लानजायखौ एगारनो हाया जाबाय मानोना एगारबानो अमाया बिखौ अरगोन। फारसेथिं मिथाइ ग'लादारा गराइयाव गाखोनानै थिग बेखिनि जायगासिम सफैनानै नुबायजे सासे मानसिया मासे अमानि लानजायाव हमना फांसे बिफांनि सोरगिदिं गिदिंगासिनो दं। बियो बैखिनियावनो गराइखौ लाखिनानै गराइनि बिखुंनिफ्राय ओंखारना बामोनखौ सोंबाय- “आदा, नों अमानि लानजायाव हमनानै अमाखौ मानो बिदि फिदिंबाय थादों?” अब्ला बामोना फिन होबाय- “नोंनि बाभ्राखौ फिन होनो आंहा सम गैया। नों बे थाखाफोरखौ नुवाखै नामा?” बियो फिनबाय- “नुदों”। बामोना बुंबाय- “अमाखौ बेफोरबादि फिदिडोब्ला बियो फाखोफ्रोमावबो बेफोरबादि रुफानि थाखा जोनोम होयो, बिनिखायनो

आं फिदिंगासिनो ।” ग’लादारा सानबाय आंहा दिनै गोबां रां ख’हा जादों, जिदु बिदिनो माखासे रां खामायना लानो हायो अब्ला मोजाडनो जागोन । बिदि साननानै बियो बामोनखौ बुंबाय- “आदा, आंखौबो फाखोनैसो फिदिनो होनोना ? आंबो दिनै मोनसे गिदिर खैफोदआव गोग्लैदों । आंनोबो अमाखौ फाखोनैसो फिदिनानै रुफानि थाखा थायनैसो खामायनानै लानो खाबु होयो अब्ला नोंथाड आंनि जोबोर गिदिर बान्जायनाय जागोन । सासे थगायसुला सिखावा दिनै आंखौ थगायना आंनिफ्राय माखासेमानि थाखा खावनानै लांदों ।” बिनि बाश्नाखौ खोनानानै बामोना बुंबाय- “नों दुखुथिया दावबायारि, नोंखौ हेफाजाब होयोब्ला आंहा पुन्यआनो जागोन, जागोनदे न’ फिदिं ।” बिदि बुंनानै बियो ग’लादारखौ अमाया गिदिंबाय थानायावनो लानजायाव हमनो होनानै, गाव एगारना होनानै हाखा- दावरा रुफानि थाखाफोरखौ खनखांन लानानै ग’लादारनि गरायाव गाखोनानै बेनिफ्राय जायखारलांबाय । ओजोंहाय ग’लादारा अमानि लानजायखौ एगारनो हायैनि फिदिंबाय थानो हमबाय, मानोना लानजायाव हमनायखौ एगारबानो अमाया बिखौ अरथारगोन ।

बामोना गोजान लामा थानानै मोनाबिलि समाव मोनसे गामिनि न’खरसेयाव आलासि जाहैबाय । हराव बियो बेयावनो जायै-लोडै-उन्दुना थानानै दावला गिसिबनायनि सिगांनो सिखारना गावनि गरायखौ जेराव खाथाबनानै दोनदोंमोन बियाव गराइन खुगा सिडव थानाय गांसो सिंआव थायजि रुफानि रां सोना दोनना आरोबाव उन्दुना थाफैफिनबाय । अखानायै मोजाडै सोरांनाय लोगो-लोगोनो न’ बिगोमाया सिखारबाय । आलासि बामोनाबो आथुर-माथुर सिखारना न’बिगोमानो दिन्थिनानै गरायनि खुगा सिडवनि हाग्राखौ जांखिना थामजि रुफानि मुद्रा दिहुननानै लाबाय । नबिगोमाया नुनानै जोबोर गोमोबाय, मा खोथा, मा बाश्ना, मा बेबस्था मोजाडै सोंब्ला बियो बुंबाय- “बे गराया जानानै आद्रा थानाय हाग्रानिफ्राय आं सानफ्रोममबो जि रां रुफानि मुद्रा मोनो, आरो आं बेजोंनो थानानै थायो ।” बामोननि बाश्नाखौ खोनानानै न’बिगोमाया लभ जाबाय । बियो गराइखौ बामोननिफ्राय बायनानै लानो थाखाय जोबोर खेस-खेस हमथाबबाय थानो हमबाय । दाम-दर खालामनानै बियो दजौ रां रुफानि मुद्राजों बामोननिफ्राय गराइखौ बायनानै लानो ओंखारबाय । बामोना गिबियाव फाना-होआ होननानै उनाव लासैयै बुंबाय- “नों एगारथाराबाथ’ आं

फानखा थारनांगोन। आदसा, आरो बाजि रां होदेरबावदो आरो आं न'आव थांनो थाखाय नॉनि गराइखौ हर।' न'बिगोमाया बिनि बाथ्रायाव राजि जानानै द'जौ बाजिरां आरो गावनि गराइखौ बामोननो होबाय आरो बामोनाबो माखार-माखारै थाफ्ला बोनना रुफानि थाखा माखासेखौ लानानै न'बिगोमानि गराइजों न'फारसे आगान सुरलांबाय। गिबियाव बामोना जायलामाजों थांदोंमोन बै लामाजोंनो गिदिंबोफिननायाव बियो बै बिफां सिडाव मिथाइ ग'लादारा माथो होबाय- “नों आंखौ मोजाडैनो थगायबाय, नाथाय अमानि लानजायाव हमना गिदिंनानै आं लोरबां जालायलांबाय।” बामोना फिन होबाय- “आदा आं नोंखौ थगायाखै, नों जिदु आंनि बाथ्रामथे सानै-सानै अमाखौ फिदिडो अब्ला नुगोन थारै 100 रां रुफानि मुद्रा मोनगोन।” बामोना नुदोंमोनजे अमाया गिदिं-गिदिं लासै-लासै लोरबां जाबोदों आरो जौसेबार गिदिंबावनांगौबानो बियो थैगोन, बिनिखायनो बियो बे सोलोखौ होबाय। बामोना ग'लादारखौ बिदि बुंनानै गोख्रै गराइ दाब्रायलांबाय। ग'लादारा इसे हां गोलाव लाम्पाना बोलो मोननानै दसे सम फिदिंनाय उनावनो अमाया गोगलैना थैना थाबाय। बिनि उनाव ग'लादारा अमानि आखाइनिफ्राय रैखा मोनबाय साननानै न'फारसे आगान सुरबोबाय। बामोना न' सफैनानै बिसिनि आखाइयाव रुफानि रांफोरखौ होनानै बुंबाय- “न, बे रुफानि रांफोरखौ दोनहैथां।” रुफानि रांफोरखौ नुनानै बामोन बिसिया जोबोर खुसि जाबाय।



मायनाव हिनजाव

सैथो जुगआव सानै बोराइ बुरै दंमोन। बिसोरहा सास्नि फिसाज्ला दंमोन। सास्नि फिसाज्लानोबो सास्नि बिहामजो लाबोबाय। गिदिरसिन बिहामजोआ सासे होवासा जोनोम जाबाय। बै सास्नि बिहामजोनि गेजेराव उन्दैसिन बिहामजोआ जोबोर मायनाव हिनजावमोन। बोराइ-बुरैया थैनोसै समाव बिसोर गासैखौबो उन्दैसिन बिहामजोनि बाथ्रा मथे सोलिनो हुकुम होबाय। बिनि उनाव बोराइ-बुरैनि बोसोन बादिनो बिसोर सोलिनो हमबाय। उन्दैथार बिहामजोआ बिसोरखौ बबेनिफ्रायबा फैब्ला आखाइ गोजा फैनाय नुयोब्ला रागा जोडो, बिनिखायनो बिसोर खाथियाव जा मोनदों बेखौनो लानानै फैयो। सानसेखालि सासेया लामायाव मासे सेवनाय जिबौ नुनानै सानबाय- “बिहामजोआ सानफ्रोमबो आखायगोजा थाडोबा रागा जोडो, दिनै बे जिबौ गोथैखौनो लांनायनिथ’ नायनि मा होनो।” बेखौनो साननानै बियो जिबौ गोथैखौ लाबोना लांगोना मोखांनि बेरायाव दोननानै बिहामजोखौ बुंहैबाय- “बैयाव माबा मोनसे बेसाद दोनदों, लाबोनानै दोन, आं दुगै हैंनि।” बिहामजोआ थानानै नुबायजे मासे गोथै जिबौसो बेयाव दं आरो बेयावनो थामफैया बिदै दैदों। बेखौनो नुनानै बियो न’सिंआव हाबनानै बिहामजो गिदिरखौ बुंबाय- “जिबौ गोथैखौ लाबोनानै आंनो दिनथिफैदों, जेबो नड दे।” बिदि बुंखानानै बायजोआव ओंखारबोफिननानै नायफैफिनबा नुबायजे गोथौ जिबौ दोननाय जायगायाव मोनसे थफ्ला गोग्लैना दं। आरो थफ्लाया जिनानै स’नानि आसान, फुलखुनि, नेकलेज, गंखन बाइदि बाइदि देलायग्रा मुवा नुजाना दं। बियो खारलांना थफ्लाखौ लाबोना न’सिंआव हाबबोना बिहामजो गिदिरखौ बुंबाय- “नायनायसाय नै, नोंथाडा जिबौ गोथैखौ आंनि खाथियाव रागा जोंनानैसो लाबोदोंमोन, नाथाय बिनि जायगायाव नै बे देलायग्रा मुवाफोरा बबेनिफ्राय फैखो ? आं नोंथांमोनखौ आखाइगोजा न’आव फैनो हाखो होयोब्ला नोंथांमोना आंखौ गाज्जि मोनो, दानिया नाय।” दैमा जिडव सासे राजानि फिसाजोआ दुगैनो दैआव ओंखारनाय समाव बोरियावनो बियो देलायग्रा मुवाफोरखौ खुनानै थफ्ला बोनना दोनदोंमोन, बे

थप्लाखौ सिलाया साबथिना लाबोनानै बेयाव जेबो जाग्रा मुवा मोनैलाय, सिलाया जिबौ गोथैखौ नुनानै थप्लाखौ बेयावनो दोननानै गोथैखौ लाना थांबाय ।

बेनि उनाव सानसेखालि गेजेर बिहामजोआ गोबोर गोरान थप्ला खाना लाना फैनानै बिखौ खामसालिनि उखुमाव एथेबना दोननानै उन्दै बिहामजोखौ बुंबाय- “बैयाव मोनसे बेसाद दं, लाबोनानै दोनफै ।” बियो खेवना नायबा नुबायजे बियो गोरखि गोरानसो । आदसा जेबो नडदे, बेखौनो हासुंआव सोना दोननो साननानै बिहामजोआ बिखौनो सोनानै दोनबाय । फुरा बोसोरबासो उनाव सासे राजाया फिसाजोनि रुगिया बेरामनि मुलि हिसाबै बाबोसोरनि गोरान गोबोरखि नागिरथिंबाय । नाथाय जेरावबो मोनैलाय फोसावबाय- जायनो आंनो बेफोरबादि गोबोरखि लाबोनानै होफैगोन बिनोनो स'ना, रुफा खादानै होनाय जागोन । बे बाश्राखौ नोगोर, सहराव दल दामनानै फोसावना होनाय जाबाय, हरखाबनो बिहामजोया बै हासुंआव सोनानै दोननाय गोबोरखि गोराननि बाश्राया गोसोआव फैबाय । बियो बे गोबोरखिखौ राजानिसिम दैथाय हरबा राजाया बिहामजोनो खादानै स'ना-रुफा बानथा हरबाय ।

सानसेखालि बिहामजो उन्दैखौ सासे बिबायारि फकिरा मन्थ्रजों खावनानै लांबाय । बिनि उनाव बै नख'रनि मानसिफोरा बेरामजों साफा-साफा थैलानो हमबाय, मोसौ, मैसो, बोरमा, मैदेर सेरखाय बेरखाय जाना थैजोबबाय । खालि बिहामजो गिदिरनि फिसाज्लायाल' थांनानै थाबाय । बिबो न'आव थावरिनो हायैनि हादर हाला बेरायथिं बेरायथिं मोनसे हाग्रा गेजेरनि दैमा गाथोनाव सानसेखालि बिमादैखौ लोगो मोनहैबाय । बिसोरो नुज्जायनाय लोगो-लोगोनो सानैबो सिनाय ज्जायबाय । बियादैया बुंबाय- “न'बांनि बाश्राखौ बुंनो जेबो गैला, खालि आं ल'सै ।” बिमादैया गाबै-गाबै बुंबाय- “आंखौ फकिरा गारा, खारखोमा लांबाबो फोथैगोन, बियो जोबोर मन्थ्र रोंगौ । आं फकिरखौ बुंनाय खोनादों बिनि जिवा लायनो ब्रह्मानि खाथियाव थानाय दावस्रिनि मोदोमावसो दं, नों जिदु दावस्रिखौ बुथारनो हायो अब्लासो आं थांनो हागोन ।” बे बाश्राखौ खोनानानै बियादैया ब्रह्मानि खाथियाव गाबै-गाबै आरज गाबनायाव ब्रह्माया गोजोनना बिनो फिसाजोखौ हाबा होबाय । उसुरगायाव बियो गोबां मुवा-बेसाद मोनबोबाय । उनाव बियो बुंबाय- “आंनो दावस्रिखौबो हर ।” आरज खालामनायलाय ब्रह्माया बिनो दावस्रिखौबो हरफाबाय । बियो दावस्रिखौ

बुरै आबैनि सल'

मोननानै खनसेलागैनो गोरना सेरथेना बुथारबाय आरो फकिराबो जेराव दंमोन
बेयावनो थैबाय। अब्ला बिमादैया बुजिमोनबायजे दावस्रिया थैबाय। बिनि
उनाव बियो ब्रह्मानि फिसाजो आरो गावनि बिमादैजों साथामबो ज-जाना
मोनसे नख'र दाबाय आरो ब्रह्मानि बोर सारस्रिनाय मोननानै साननैसोनि गेजेरावनो
सिगांनिबादिनो न'-बां, मानसि-दुमसि, मुवा-बेसाद, दोहोन-दौलदजों ग्रोम-
ग्रोम राइजो जानो हमबाय।



सानै सोलोगोरा

सानसेखालि सासे गोगोम सेंग्राया बानसे खाथि लानानै हायजें होनना फाननो सोलो खालामबाय आरो बिदिनो बै सानखालिनो गुबुन मोनसे जायगानि सासे गोगोम सेंग्रायाबो बानसे भोमलटि बेगरखौ लाबोना जाथि-जालुक होनना हाथायाव फाननो थाखाय लाहार-फाहार खालामनानै हाथायफारसे आगान सुरबोबाय। जाथि जालुकनि बेफारि आरो हायजेंनि बेफारि सानैबो लामायाव लोगो मोनलायबाय। सोरो मा फाननो लाबोदों सानैबो सोंलायना मिथिलायनायनि उनाव जाथि जालुक बेफारिया बुंबाय- “एइ, आदा आंनि बारियाव बे बाराव जाथि जालुकजोंनो उसिफावनानै दं, दिनै बेखौनो बानसे लानानै फैदों। खावसेसो बेसेन मोनबानो होलांसिगोन आं, सोरथो सानजुफु थिरसिम नेबाय थानो।” बिनि बाथ्राखौ खोनानानै हायजें बेफारिया सानबाय, “बिनो आंनि खाथिखौ होलानानै बिनि जाथिजालुकखौ लाना थानो हायोब्ला मोजाडानो जागोन।” बेखौनो साननानै बियो बुंबाय- “मा खालामनो फंबाय, आंहाबो बेनो जादों, आंनि बारियाव बेखेबाव हायजेडा उसिफावथारदों। बिनिखायनो आंबो दिनै बानसे लानानै फैदों, थाब फाननानै थांफिननो हायोबा मोजां जायो। बेलासेसिम नेबाय थास्लाय-स्लाय आंबो खावसेसो बेसेन मोनबानो होलांसिगोन होननानै सानदों।” बिनि बाथ्राखौ खोनानानै जाथिजालुक बेफारिया सानबाय- “आंनि भमलतिनि बेगर बिबानखौ बिनो होनानै बिनि हायजें बिबानखौ लानानै थानो हायोबोला मोजांआनो जागोन।” बेखौनो साननानै बियो बुंबाय- “आंनि न’आवबो हायजें गैया, इसेसो आंबो लांनांगोन दे।” बिनि बाथ्राखौ खोनानानै हायजें बेफारिया बुंबाय- “आंनि न’आवबो जाथि जालुक गैया, आंबो इसेसो जालुक लांनो होनानै सानदों।” सानैबो बेफोरबादि खोथा-बाथ्रा राइज्जलायनायनि उनाव जाथि जालुक बेफारिया बुंबाय, “आदा, नों जिदु हायजें बिबानखौ खावसे बेसेनावनो होनो ओंखारदों, आंबो जाथि जालुकनि बिबानखौ खावसे बेसेनावनो होनो सानदों, अब्बालाय जों सानैबो सोलायलायनो हायो माथो।” बिदि बुंनानै हायजें बेफारिया जाथि जालुकनि बिबान आरो जालुकनि बेफारिया

हायजें बिबानखौ लानानै सानैबो साफा-फारफा जायखार लांना ससे थानानै सानैबो सानैखौबो नुयै जानाय समाव सानैबो फोरस्रा-फोरस्रि खारलांबाय ।

सानैबो सानैखौबो थगायबाय साननानै गोसोजों गोसो खुसि जानानै सानैबो न'आव सौहैबाय । न'आव सौहैना सानैबो बेखेवना नायनानै नुबायजे, सानैबो समान, रावबो रावखौबो बोलो हायाखै । बे जाथाइनि गोबां सान उनाव सानसेखालि हरखाब आरोबाव बै जायगायावनो सानैबो लोगो मोनलायबाय । जाथि जालुकनि बिगोमाया खाथ्रिनि बिगोमाखौ सोंबाय- “आदा, बै सानखालिनि जाथि जालुकखौ माबोरै मोनखो ?” खाथ्रि बिबाननि बिगोमाया बुंबाय- “हायजें बिबानखौ जेरै मोनदों बेबादिनो ।” बेबादि बाथ्रा राइज्जायनानै सानैबो सानैखौबो बाख्यायना बुंबाय- “जों सानैबो लोगो नांबायानोथ’, फै जों बिसुखेखौनो खालायनि ।” सानैबो बिसुखे खाना गुबुनखौ थगायना रां-रुफा खामायनो साननानै बिसोर सानैबो गुबुन दाबसेयाव ओंखारलांबाय । थाडै-थाडै सानैबो सासे बामोनि न'आव सहैबाय । बिसोरो बामोनखौ बुंबाय- “जों खामानि-दामानि नागिरनानै फैदों ।” बिसोरनि बाथ्राखौ खोनानानै बामोना सानैखौबो गावनि न'आवनो खामानि मावग्रा खालामनानै लाखिबाय । जाथि जालुकनि बेफारिखौ बामोना गावनि जारसि गायखौ नेनो बिबान होबाय आरो हायजें बेफारिखौ थुलुंसि बिफाडव दै होनो बिबान होबाय । बामोनि गाया जोबोर दुथां आरो सिखावजो, बिखौ जाथि जालुक बेफारिया दान्दिसेबो एगारनानै होनो हाया । दसे एगारनानै होयोब्लानो बियो खारलांना मालायनि बारियाव हाबहैना माइ-माइरं, मैगं-थाइगं जाहैयो । थुलुंसि बिफाडबो एरैबादि जोनजालजे बिनि गुरियाव जेसेबांनो दै लुनानै होआमानो बै दैया थायसेयावनो गैया जायो । सासेया मोसौगाय नेनानै आरो सासेयाबो थुलुंसियाव दै लुनानै हाबाथुरि जाबाय । सानैबो सानफा थाल्ला खामानि मावनानै जिरायनो मोना जाबाय । बिनिखायनो सानैबो गोसोजों गोसो सानबायजे बिसोरो गावबा गावनि खामानिखौ सोलाय लायना थगायगोन । बेखौनो साननानै सानसेखालि लावखारा दै होफैग्राखौ सोंबाय- “सुखे, नोंनि खामानिया माबोरै, आं हले आंनि खामानिखौ जोबोर मोजां मोनदों । मोसौखौ हाग्रायाव होना हरो आरो आं गोसो खुसियै बिफां सायायाव उन्दुबाय थायो । बेलासि जायोबा मोसौखौ होना लाबोनानै गलियाव खानानै दोनो ।” बिनि बाथ्राखौ खोनानानै दै होग्रायाबो बुंबाय- “आंनि खामानिखौथ’ जेबोखौनो नडा

होननानै बुंजायो। सानसेनि गेजेराव लथासे एबा लथानै दै लाबोनानै होफैबानो जायो आरो सानसेया ज'नोना उन्दुनो बेयो नोंनि बाथ्रासै।' सानैबो गावबा-गावनि बाथ्राखौ खोनानानै लावखारा दै होग्रानि खामानिखौ आरो दै होग्राया लावखारनि खामानिखौ मावनो लुबैना अखानायै सानैबो खामानिखौ सोलाय-सोल' खालामनानै लाबाय। बेलासि समाव जेब्ला सानैबो लोगो मोनलायबाय अब्ला लावखारा दै होग्राखौ सोंबाय- "खामानिखौ माबोरै मोनखो सुखे?" दै होग्राया फिन होबाय- "नों जेरै मोनदों।" बिनि उनाव सानैबो सानैखौबो बाख्यायना राइज्जायबायजे थुलुंसि बिफां गुदियाव एसेबां दै होनाय जायो बै दैफोरा थायसेयावनो गैया जाना बहा थाडो बेखौ नायनांगौ जाबाय। बेखौनो साननानै सानैबो हराव जेब्ला बामोना उन्दुलाडो बिसोरो खदाल गंसे लानानै थुलुंसि बिफांखौ जावना दैखांना नायबा नुबायजे बिनि सिडव बा फुट गोथौ मोनसे गिदिर हाखर दं। जाथि जालुक बेफारिया हायजें बेफारिखौ बुंबाय- "सुखे, नों हाबनानै नायहैनायसाय गुदुडव मा दं।" ओंखारलांना नुबायजे हाखर सिडव गोबां दो रुफा दं। जालुक बेफारिया हाबनानै नायब्ला नुबायजे गुदुडव थायनैसो दैहुआव रां-रुफा दं। बियो हाखा दावरा हाखरनिफ्राय सिखारबोना बाथ्राखौ बिनो खिन्थाबाय, सानैबो अब्लानो गावसोरनि हिसिमा गानैखौ गानै गिदिर मना सुथाबबाय। हायजें बेफारिया जाथि जालुक बेफारिखौ बुंबाय- "सुखे नों मोनसे मना लानानै हाखर सिंआव ओंखारलां आरो मनायाव रुफाखौ सोनानै आंनो दैखांना हर। बिनि उनाव बे गांसे मनाखौबो आं गारनानै हरगोन आरो बेयावबो नों रुफाखौ सोनानै दैखांना हर।" बिदिनो सावराइलायनानै जालुक बेफारिया मनासे रुफा हाखर सिंनिफ्राय दैखांना हरनाय उनाव हायजें बेफारिया बिखौ दैखांना लाबोनानै बै गांसे मनाखौबो हाखराव गारनानै हरबाय। जालुक बेफारिया सानबाय जिदु बे मनाखौबो बियो दैखांना लानानै गाव हारसिडै रुफाखौ लानो साननानै आं हाखरनिफ्राय सिखारनायनि सिगांनो हाखा-दावरायै हा फबनानै होयो अब्लाथ' बाथ्राया बोरैबा जागोन। बेखौनो साननानै जालुक बेफारिया सोलो खालामना उननि मनायाव इसे रुफा सोना मनायाव गावनो हाबना बिसुखेखौ बुंहरबाय- "सुखे बे मनाखौ नों बोनानै देखांहर, जोबोर गिलिद जादों, आं हारसिडैहानाय नड।" बे बाथ्राखौ खोनानानै हायजें बेफारिया मनाखौ बोनानै दैखांबाय आरो जालुक बेफारिया साननायबादिनो मावमारबाय।

हाखर सिडवन्नो जालुक बेफारिखौ फबनानै दोननो साननानै बियो हाखा-
दावरायै हाखराव हा गारना होबाय आरो बियो हाखराव फबजाबाय साननानै
मना मोननैखौबो बाननानै न'फारसे आगान सुरबोबाय । बिबाना जोबोर गिलिद ।
बिनिखायनो बियो इसे जिरायस्रानो साननानै लामा दखरसेनि फारसे बिफां
सिडव बिबानखौ दोनथ'नानै जिरायबाय । जोबोर मेंनाय दुखु मोननायनि थाखाय
बियो दै गांखांबाय, बिनिखायनो बियो बिबानखौ बेयावनो दोननानै लामा
जिंनि मोनसे फुखियाव दै लोंनो ओंखारलांबाय । बियो जेब्ला फुखियाव दै
लोंनो ओंखारलाडे, अब्ला जालुक बेफारिया म'ना सिंनिफ्राय लासैयै ओंखारबोना
बिबानखौ लाना आथुरै खारलांबाय । बियो दै लोंखांनो फैफिनबा नुबायजे
बिबाना गैया । अब्ला बियो बुजिबायजे बिखौ बिनि बिसुखेया सोलोजों
थगायबाय । “बियो सानाखैमोनजे जालुकबेफारिया हिसिमानि मना सिडव
हाबनानै आनि फाफ्लियाव गाखोनानै फैगोन ।” बिदि सानना गोलाव हांमा
सुरना दुखु दाहा लानानै बियो न'आव सौहैबाय ।

गोबां साननि उनाव सानसेखालि सानैबो बिसुखेया लामायाव लोगो
मोनलायबाय । जाथि जालुक बेफारिया बिसुखेखौ नुनानै बुंबाय- “सुखे, नों
आंखौ मोजां हाखरआवनो फबना गारबोदोंमोन ?” बिसुखेया फिन होबाय-
“हे दोनलै, नों आनि फाफ्लियावबो गाखोबोबाय आरो रुफाखौबो लाना
थांजोबबाय ।” बिदिनो सानैजों राइज्जलाय लायनानै दसे उनाव जोबोर आंगो
लोगो जाफिनबाय । हायजें बेफारिया बावगारनो हायाखैमोनजे जालुक बेफारिया
बिनि फाफ्लियाव गाखोबोदोंमोन । बिनि सानैसो उनावनो हायजें बेफारिया
सानसेखालि सोलो खालामना बिसिखौ बुंबाय- “आं उन्दुग्रा बैसाडवनो उन्दुबाय
थानि, नों आनि मोखां गनथं हि गांसे खोबना होना जनानै गाबबाय था आरो
सासे मानसि थिनहरनानै सुखेनो आं थैनाय रादाबखौ हर । बियो जेब्ला फैगोन
अब्ला बिखौ बुंजे थैनोसै समाव नोंखौ बुंलांदों आंखौ जेन गुबुना दाडबासिनो
खालि आनि आंगो सुखेआल' दांग्रयो आरो सुखेयासो फाफ्लियाव दैखांनो
गोथैबारियाव सावनो लाना थाडे ।” बिनि बिसियाबो बियो बुंनायबादि गासैखौबो
मावबाय । जाथि जालुक बेफारियाबो बिसुखेनि गासैबो बाथ्राखौ खोनानानै
गासैबो बाथ्राया नंखाय होनना बुजि मोनबाय आरो ओरैनो मोदै रथ'-रथ'
गाबफलानानै बिसुखेनि बिसिखौ बुंबाय- “आनि सुखेया थैलांबाय जेब्ला जोंहा

बुरै आबैनि सल'

गासैबो लाथिख' जाबाय । बे न', बै बारि-बागान बेफोरखौ सोर जागोन जोंनो मानो नांबावगौ ? बेफोरखौ नुबाय थायोब्ला सुखेखौसो गोसोखांना जोंनि गोसोआव दाव-दाव अर जोंगोन ।" बिदि बुंनानै बियो खायसे बेसेन गोसा बिफांफोरखौ गप-गप दाननानै लांदां खालामबाय । बिनि उनाव थैनाय बिसुखेनि खाथियाव फैनानै बिसिखौ बुंबाय- "आं हारसिं आंनि सुखेखौ दैखांनो बोलो हनाय नडा, बिनिखायनो सनै दानसनानै ओजों स'से हजों स'से खालामना बाननानै गोथैसालियाव लांनि । बिदि बुंनानै बियो एरैनो सिखाखौ फिदिं-फिदिं दाननो नागिरनायावनो हायजें बेफारिया गिनानै दुफुं जखांगारबाय । अब्ला बिसिगि सानैबो मिनिनो हमबाय । हायजें बेफारिया बुंनो हमबाय- "सुखे, जाबाय आरो नांला । आं नोंनि फाफ्लियाव गाखोनो हायासै । लाभनि गेजेराव आंनि बारिनि बेसेन गोनां बिफां लायफाडसो थांबाय, आंनिखुइ नोंनि सोलोआनो बांसिन ।"



काज्वनि

सासे बोराइया सास्नि फिसाज्ला दंमोन। बोराइया फिसाफोरनि सुखु-गोजोनखौनो नुनो मोनासै। फिसाज्लाफोरा गावबा गावनि आथिडव सगंनायनि सिगांनो बोराया थैलांगारबाय। बुरैया साद', फिसाज्लाफोरनो हाबा खालामना होनानै इसे सुखु गोजोन मोखां नुदोंमोन, नाथाय बुरैयाबो बे समावनो थैलांगारबाय। बिमा थैलांनाय उनावबो सास्नि बिदा-फंबायाबो गोरोबलायनानै राइजो जाना दंमोन। बिसोरनि गेजेराव उन्दैसिन फिसाज्लाया नुनायाव जोबोर समायना आरो खोथा-बाथ्रायावबो मोजांमोन, बिनिखायनो साद' बिदामोनाबो बिखौ जोबोर अनसोगारोमोन। बिदामोना गावबा गावनि बिसिफोरखौ दोहोन-सम्पतिनि बिगोमा खालामाबासिनो सोलोगोरा फंबायखौसो नखरनि बिगोमा खालामदोंमोन, बिनिखायनो बिबाजैमोना बिखौ गोसोजों गोसो नायनो हायामोन। उन्दैसिन बिबोनाडा माबा मोनसे बेसाद दिहुनना हराब्ला बिबाजैमोना हिमि गिजि गांसेबो रावनोबो हरनो हायामोन। जिदुबाबो बिबाजैमोना बिखौ नायनो हाथारामोन थेवबो फिसाइफोरखौ गिनानै माब्लाबाबो बिनि फंसेबो बाथ्राखौनो लोर-सोर खालामनो हायामोन।

बिदिनो साननैसो थांनायनि उनाव सानसेखालि सासे बिबायारि बुरैया माइरं बिनो बिसोरनि न'आव फैबाय। उन्दै बिबोनाडा बै समाव न'आव गैयैलाय बिबाजैमोना बिबायारि बुरैनो माइरं मुथासे होनो हायैलाय बुंबाय- “बुरै आइ, जोंनि बिबोनां उन्दै बाबुआ बहाबा ओंखारलांदो, बियो फैयाब्ला माइरंखौ नोंनो सोर हरनो? जोंथ' हरनो हाया, बिसो गासैबो मुवा-बेसादनि बिगोमा।” बे बाथ्राखौ खोनानानै बुरैया बुंबाय- “ओइ आइ, नोंलाय मा बाथ्रा बुंदों? नोंसोरबादि बिहामजो न'आव दं, नोंसोरबादि बिहामजोआ न'खरनि बिगोमा जायाबासिनो

सासे सेंग्रा गथ'खौसो नख'रनि मुवा बेसादनि बिगोमा खलामदों ? बेफोरबादि बरथिया बाथ्रा आं जेरावबो खोनाफेराखै ।" बिसोरो बुरैखौ बुंबाय- "नंगोथ' आइ, नाथाय नों नुवाबाबो खोनायाबाबो जों थुख्रासे बननिबो बिगोमा नड, मा खालामनो । बिदामोना उन्दै बिबोनांखौसो बिगोमा खालामदों ।" बुरैया बिसोरनि गोसोनि दुखुखौ बुजिमोननानै बुंबाय- "नोंसोरलाय बबे दैखरनि एमबुफोर हाय । बिखौ बिगोमानिफ्राय बोख्लायनानै नोंसोर बिगोमा जायामानो ?" बिसोर बुंबाय- "माबोरै सिफायनो बुरै आइ ?" बुरैया बुंबाय- "आंनि सोलोखौ लायोब्ला दिनैनो बोख्लायनो हागोन ।" बिसोरो बुरैनि बाथ्राखौ खोनानानै जोबोर गोसो होनानै बुरैनि खाथियाव फैनानै बाथ्राखौ सोंनायलाय, बुरैया सिखारना थानानै मोनसे खानथ'खा सु लाबोना बेखौ मन्थ्र जारिना बिसोरनि अखाइयाव होना बुंबाय- "दिनै नोंसोरनि बिबोनाड फैयोब्ला नोंसोरनि गेजेराव सोरबा सासेया बिखौ खाथियाव लिंन लाबोना बिनि खरआव थेमा नायनो होनना फज'ना लानानै, थेमा नायबाय थानाय समावनो हरखाब बे खान्थ'खा सुखौ बिनि खोमा गुदुंआव सोना होनानै सैमा जानानै ओंखारलां बुडेब्ला बियो सैमा जाना न'निफ्राय ओंखारलांगोन आरो नोंसोर नख'रनि हिन्जाव जानानै नख'रनि मुवा-बेसादनि बिगोमा जानानै सुखु-गोजोनै राइजो जानो हागोन ।" बेखौनो बुंबानै बुरैया गिदिंलांफिनबाय । जेब्ला बिसोरनि उन्दै बिबोनाड फैयो बिसोरो बुरैया खिनथालांनाय मथै बिखौ थेमा नायनानै होनो होनना फज'ना लानानै बिनि खोमायाव खानथ'खा सुखौ सोना होनानै सैमा खालामबाय । बियो मासे बांग्रा सैमा जानानै गोसोनि दुखुजों न'निफ्राय ओंखारलांबाय । बेलासि समाव बिदामोना फैनानै फंबायखौ नुयैलाय बयनियावबो सोंबायबायबाय- "उन्दै बाबुआ बहा थांखो ?" बिसिफोरखौ सोंब्ला बिसोर फिननायाव बुंबाय- "जों जेबो मिथिया" बेनि उनाव बिदामोना फंबायखौ सेरखाय बेरखाय नागिरना मोनैलाय खाफाल हमना दुखु खालामबाय थानो हमबाय ।

उन्दैसिन फंबाया सैमा जानानै गोबां हादर गिदिडै गिदिडै उनाव मोनसे नोगोराव ओंखारहैबाय। बै नोगोराव मोनसे नख'र दंमोन, बिसोरहा रावबो गथ' गथायथ' गैखायानो, एमंखि रावबो जाथि खुरमाबो गैयामोन। खालि हौवा आरो हिनजावल'मो। हौवाया सानाव जायै लोडै गुबुनाव खामानि दामानि मावनो ओंखारलाडो आरो बिसिया न'आव हारसिडै हिसानाव हि दाना, खामानि मावना न'-बांखौ नायबाय थायो। सैमाया थाडै-थाडै बिसोरनि न'आव सहैबाय। बहानिफ्रायबा मासे सैमा बांग्रा बिसोरनि न'आव फैनायखौ नुनानै फिसा फिसौ गैजायै न'खरा अननानै सैमानो ओंखाम मुथासे जानो होबाय आरो होखारला होखारलि खालामाबासिनो गावसोरजोंनो न'आव थाफानो जायगा होबाय। सैमायाबो बिसोरनि अननायखौ मोननानै बिसोरजोंनो थाफानो हमबाय।

नख'र बिगोमाया सानफ्रोमबो हि दायो आरो सैमायाबो खाथियावनो उन्दुना थाफायो। सानसेखालि बिनि आखायनिफ्राय खनसे माखुआ गलांबाय, बियो सैमानि फारसे नायना जंखायनाय रावै बुंबाय- “नों आंनो माखुखौ दैखांना हरनो हागोनना? पापिथिया माखुआबो गले गले आंनि आखाइनिफ्राय गोलैबाय थादों, आंलाय बेसेबां ओंखारलांनो? माखुखौ आंनो दैखांना हरनायसाय फिसा, नांगौबा आंहा फिसाजो जोनोम जाब्ला आं नोंनोना हाबा हरगोन।” मानसिनि बाथ्राखौ खोनानानै सैमाया माखुखौ खनखांना हरबाय। मानसिया गोमोनानै सानबाय- “आयु! बेथ' इसेल' सैमा नडा। बियो मानसिनिखुइबो गुनिसिन। आंनि बाथ्राखौ बियो माबोरै बुजिखो? आंहा फिसाजो गैया, थानायमोनब्लाबो बेफोरबादि सैमानो हाबा हरमारब्लाबो जेबो ख'हा जायामोन।”

बे बाथ्राखौ बुंनायनि साननैसो उनाव बिहा गसाइनि अननायाव सासे फिसाजो जोनोम जाबाय। बिफाया अननानै गथ'नि मुंखौ काञ्चन लाखिबाय। सानफा एफायै काञ्चना देर-देरखोन देरबोनो हमबाय। बियो आखलै-आखुयै, महरै-मोखाडै, जोंखोल-माखोल समयना जाबाय। सैमायाबो सानफा एफायै गावनि आखल आखुनि जोहै बिगोमानि गोसो गोरबोआव हाबलांनो हमबाय। काञ्चनखौ हाबा हरनो सम जाबाय। सानसेखालि बिसिया फिसायनो बै माखु गोलैनाय बाथ्राखौ खिन्थानानै बुंबाय- “आंहा फिसाजो जायोब्ला, आं सैमानो

हाबा हरगोन होनानै बुंदोंमोन । बिनि थाखायसो जानोबोहागौ आंहा फिसाजो
जोनोम जाबाय, नडबा आंनि गोरबोआव फिसा-फिसौ जानायनि जेबो गरन्थ
गैयामोन । बिनिखायनो आं आंनि खोथा मथेनो बिनो हाबा होनो होनानै
सानदों, नों मा बुडे ?” फिसाया जोबोर सादा-सिदा आरो धोरामसुलामोन ।
बियो फिननायाव बुंबाय- “जिदु नों बिनि सिगाडव बिदिनो बुंमारदोंमोनब्ला,
अब्ला थारैनो नोंनि बाथ्राखौ लाखिनांगोन । नडब्ला जोंहा फाफ जागोन । आरो
थार बाथ्राखौ बुंनो थाडेब्ला जों बेफोरबादि सैमा गिबियाव जेरावबो नुवाखै ।
बियो मानसिनिखुइबो गियानिसिन । बिनिखायनो आंनि गोसोआबो थिनो जों
बिनो हाबा होनायानो मोजां जागोन ।” बिदि बुंनानै बिफाया फिसाजोखौ लिंन
लाबोनानै गावसोरनि गोसोनि बाथ्राखौ फोरमायबाय, फिसाजोआ फिननायाव
बुंबाय- “नोंसोरनि बाथ्राखौ मानिनानै नोंसोरनि साननायबादि खामानि मावनायानो
आंनि धोरोम । आइया सैमानो आंखौ हाबा हरनो होनानै खिरा लादों, बे
खिराखौ आं लाखिगोन ।” फिसाजोनि बाथ्राखौ खोनानानै बिमा-बिफाया खुसिजों
बिखौ सैमानो हाबा होनानै सानैखौबो मोजाडै जाहो-लोंहो गावनि न’आवनो
लाखिबाय ।

कान्चनिया जोबोर जोथोन लानानै जाहो-लोंहो गावनि फिसाइ सैमाखौ
सिबिनो हमबाय । सानसेबो बिनि गोसोआव दुखु फैयासै । बिसिया सैमानि
मोदोमखौ साफा-सुफा खालामना दुगैस्रां-लोबस्रां साफा खालामना होयो, नाथाय
दसे उनाव सैमाया आरोबाव हायाव उन्दुना हाद्रि-बाला फोनफबनानै लायो ।
सानसेखालि कान्चनि बिमाया कान्चनिखौ बुंबाय- “आइ नायनायसाय, नोंनि
फिसाइया हाद्रि-बाला नांफबनानै माबोरै गोसोम जाफबनानै दं । थां बिखौ
दैमायाव लांनो मोजाडै थुखैस्रां लोबस्रां खालामनाय लाना फै ।” बिमानि बाथ्राखौ
खोनानानै कान्चनिया फिसायखौ लाना थांनो दैमायाव थब्लहोना मोजाडै-मोदोमखौ
हुनानै आखाइ, आथिं, मेगन-खोमाखौ एला-ऐला साफा खालामनानै होबाय ।

खनसे बियो सैमानि खोमाखौ साफा खालामनायाव माबोरैबा खाब्रां मोनदांबाय, बियो मोजाडै नायना नुबायजे बिनि खोमायाव मोनसे सु हाबनानै दं। सुखौ नुनानै कान्चनिया बखना लाबोबाय। हरखाब कान्चनिया नुबाय सैमानि महरा सोलायना सैमानिफ्राय थै-अर गोनां स'ना गाबनि सासे समायना सेंग्रा जाबाय। फिसाइया सैमानिफ्राय सासे समायना सेंग्रा मानसिनि महर सोलायनायलाय कान्चनिया खुसिजों सिमा गैया जाबाय। अब्ला फिसाइया बिनो गुदिनिफ्राय बिजौसिम गासैबो बाथ्राखौ खेवफोरनानै खिनथाबाय अब्ला काज्चनिया बुंबाय- “आं जिदु नोंखौ न'आव बिदिनो लानानै थाडो अब्ला आइ आफा आरो जोंनि न'सुंसेनि बयबो सानगोनजे आं सैमाखौ बुथारना बहानिबा सासे सेंग्राखौ लींनानै लादों, बेयो आंनि थाखाय जोबोर लाजिनांथाव बाथ्रा जागोन आरो थार बाथ्राखौ खिन्थायोब्लाबो रावबो आंनि बाथ्राखौ फोथायनाय नड। बिनिखायनो नोंनि खोमायाव सुखौ सोना होनानै नोंखौ सैमा खालामनानै न'आव लाना थानि।”

न' मोनहैनानै बयनिबो सिगाडव नोंनि खोमायाव थाव फुनना होनाय समाव जेन' हरखाब नोंनि बे सुखौ नुनानै बेयो मा होननानै दिहुनानै लाबोगोन आरो अब्लानो नों मानसि जाफिनगोन। आरो बिदि खालामब्ला रावबो जेबो बुंनाय नड। फिसाइखौ बिदि बुंनानै कान्चनिया आरोबाव बै सुखौ फिसाइनि खोमायाव सिगांनिबादि सोनानै फिसाइखौ सैमा खालामनानै न'सिम लानानै फैबाय। न' सफैनानै कान्चनिया बिमाखौ बुंबाय- “आइ, आं बिथांखौ थुखैनानै लाबोबाय। दा इसे थाव फुननानै होनांगौना? बिमाया फिन होबाय- “हो आइ”, बिमाया बिदि बुंनायलाय काज्चनिया थाव लाबोना फुननाय फावैनो सैमानि खोमायाव थानाय सुखौ दिन्थिनानै बुंबाय- “आइ, आइ नैबेखौ नायफैलाय, एफाग्राब गिदिर सुवा खोमायाव माबोरै हाबनानै दं।” बिमाया बुंबाय- “हाबनोथ' हागौ आइ, बियो जेराव मेरावनो उन्दुला बायो, सुखौ दिहुनना हो।” बिमाया बिदि बुंनायाव कान्चनिया सुखौ दिहुनना होबाय आरो

लोगो लोगोनो बियो सैमानिफ्राय सोलायना सासे समायना सेंग्राणि महर लाबाय ।
बे जाथाइखौ नुनानै बिमा-बिफा आरो न'सुंसेनि मानसिफोरा गोमो जोबबाय,
आरो बिखौ मा बाश्रा मा खोथा सोंनायाव बियो गासैबो बाश्राणि गुदि खोथा
खिनथा जोबबाय । बयबो गोमोनायजों लोगोसे खुसि जाबाय, कान्चनि आरो
बिमा-बिफाया गोसोनि खुसिजों रंजानानै जोबोर आलो-गोजोनै राइजो जाबाय ।

सैमानिफ्राय महरसोलायना मानसि जादों, बे बाश्राखौ राइजोनि सोरगिदिं
गोसारदलानायलाय राजाया बाश्राखौ खोनानानै काञ्चनि फिसाइखौ लिंना लानानै
मा खोथा, मा बाश्रा बियो गासैबो थार बाश्राखौ राजानो खिन्थाबाय । राजाया
गोजोननाय मोनना बिथानो गराइ नेग्रा बिबानखौ होबाय ।

बेनि खुगा-बैनि खुगा लासै-लासै राजानि खोमायावबो गोम्लैहैबाय जे
गराइ गलि नेग्रा बिबानगिरिनि बिसिया सासे जोबोर समायना गुनि-गियानि
जोंखोल माखोल हिनजाव दं । राजाया सानबायजे बिदि हिनजाव राजानिसो
रानि जानो समायो, बिनिखायनो बिखौ लाबोनानै आं रानि खालामनि । बेखौनो
साननानै राजाया गावनि गराइनि बिबानगिरिखौ लिंना लाबोना बुंबायजे बियो
बिसिखौ राजानि रंजाथिलियाव दैथायहरनांगौ । बियो राजानि बाश्रायाव राजि
जायासै । राजाया गले-गले बुंनानैबो गराइनि बिबानगिरिखौ जैरैखिजाया राजि
जाहोनो हायैनि बिखौ जोबथेसालियाव जोबनानै दोनबाय । फिसाइखौ जोबना
दोननानै राजाया काञ्चनिखौ गावनि बिसि जानो थाखाय बुजायनो नाजाबाय,
नाथाय बियो राजानि जेबो बाश्रायावनो राजि जायासै । राजाया गावनो नाजासेयावबो
फेलें गोसोजों गिदिंफिननाय समाव बियो साननो हमबायजे फिसाइया थांना
थासान्दि कान्चनिया आंनि रानि जानोबो राजि नड, बिनिखायनो फिसाइखौ
सिथारनानै लामाखौ बोस्राना लानांगोन । बेखौनो साननानै राजाया काञ्चनि
फिसाइखौ जंआव होनो हुकुम होबाय ।

राजानि लांगोना मोखाडवनो फिसाइखौ जंआव होबाय । नाथाय
कान्चनिया अब्लाबो बे बाश्राखौ जेबो खौरांखौनो मोनासै, बियो रंजा खुसियै
न'आव हि दागासिनो दं । बे समावनो मासे दावखा दन्दाया जंआव होनाय
कान्चनि फिसाइनि मोदोमनिफ्राय थै लोंनानै खुगा, आथिं गोजा जाफबना
कान्चनिनि खाथियाव बाफैना बाब्राबखांना बुंबाय-

“काञ्चनि, काञ्चनि, दानांला काञ्चनि, हि दानायखौ ज्राब दोनथदो ।
लांगोना मोखाडववो राजाया जंआव होदों थु नायनो थानि थु ।”

बे बाथ्राखौ खोनानानै काञ्चनिया दाउखानिथिं नायहरब्ला बिनि गोजा
गुनथुथ्रिखौ नुनानै बियो गोजांमिउ मोनखांबाय । बियो दाउखाखौ सोंबाय-

“ओइ, दाउखा दन्दा, मा जानानै नों गुनथुथ्रिखौ गोजा खालामखो ?”
बियो फिनबाय-

“आब’ काञ्चनि, आं दाउखा दन्दा, जानलामानला जानानै आं गुनथुथ्रिखौ
गोजा खालामा ।

दरखं मोखाडव राजाया फिसाइखौ जंआव होबाय, थैजों आंनि गुनथुथ्रिया
गोजा जाबाय ।”

बे बाथ्राखौ खोनानाय लोगो-लोगोनो काञ्चनिया हि दानायखौ ज्राब
दोननानै सिन्दुर फोथा फोनना दखना खारागुनद्रि गानना, स’ना-रुफा गाननानै
माइ गेजेरजों लामा खालामना राजानि लांगोना फारसे खारलानो हमबाय । ओजोंहाय
साउदाडा काञ्चनि फिसाइखौ बिनि आथिं थिंजायनिफ्राय मोनसे गिदिर
बनगान्दिजों सेबलांबाय थानायावनो फिसाइया गोजाननिफ्रायनो काञ्चनिखौ
खारबोनाय नुनानै खाराव-मारावै बुंहरबाय-

“दाफै दाफै, दाफै काञ्चनि,

माइ बिलाइया बौगोन

आंहा जा जानांगौ जाथों

नों न’आव थांफिन ।”

काञ्चनिया खारबोबाय थानायावनो फिसाइनि बाथ्राखौ खोनानानै फिन
होबाय-

“माइ बिलाइया बौवोबा बौथों,

खेरखेराया आं ।

सोरगोआव नोंजोंनो थांफागोन,
थाया थांना आं दुखुथिया जिउजों।”

बिदि बुंनानै कान्चनिया फिसाइनि खाथियाव सहैना फिसाइखौ गोलाव
जाना खुलुमनानै फिसाइजोंनो जंआव गावनि खरखौबो सोनानै होबाय। बिखौ
हेंथा होनो रावबो साहस खालामासै। दसे उनावनो सानैनिबो जिउआ संसारखौ
गारना गसाइनि खाथियाव सौहैबाय।

राजाया बे रादाबखौ खोनानै दुखु खालामनो हमबाय-

“कान्चनिखौ थांगोन होनना मिथिनायमोनब्ला,
जखायबा सान्थि होगौमोन।

“कान्चनिखौ थांगोन होनना मिथिनायमोनब्ला,
गराइजों, दलाजों थिनहरगौमोन।

कान्चनिखौ थांगोन होनना मिथिनायमोनब्ला
फिसाइखौ आं जंआव होआमोन।”

दुखुआ सुंनानयनि उनाव राजाया कान्चनि आरो बिनि फिसाइखौ दैमा
जिडव सावनो थाखाय सांथिखौ हुकुम होनानै बुंबाय- दैमानि फारसेथिं कान्चनि
आरो गुबुन फारसेथिं फिसाइखौ साव। कान्चनिखौ चन्दन, सरल, ऊवै, धुव-
धुना, धिउ हो। फिसाइखौ सालाय बन, गोरान खालाय बिलाइफोरजों साव।

राजानि हुकुम मथैनो मन्थिया खामानि मावबाय। सानैनिबो सहआव
ब्लाव-ब्लाव अर जोंदों, थिग बे समावो नुबायजे सानैनिबो बननि अरबिजौआ
गोजौथिं गोलाव जाबोना दैमा गेजेराव नांजाबना मोनसे जाबाय। बयबो बे
बाथ्राखौ खोनानानै गोमोबाय। राजायाबो उनाव मनथ्रिनि खुगानिफ्राय बे बाथ्राखौ
खोनाना गोमोनानै सानैनिबो सावनाय जायगायाव फांफा-फांफा बिफां गायनो
हुकुम होनानै बुंबाय- कान्चनिनि जायगायाव आहत (फाख्रि)बिफां आरो
फिसाइनि जायगायाव फांसे फाख्रि लानजाय बिफां गायना हो।

बोसोरनैसो उनाव नुनो मोनबायजे दैमानि फारनैथिंनिबो फांनै बिफां
दालाय बिलाइजों गिदिर जाना देरबोनानै थिग दैमा गेजेराव फांसे बिफां जाना
देरलानो हमदों।



थायगिर राजखुंग्रि

सासे राजाया सानै रानि दंमोन । बिथांमोनहा सानैहाबो गोरबोआव दंमोन ।
सानसेखालि सानैबो रानिया गथ' जोनोम होबाय । गिदिर रानिया सासे हौवासा
आरो उन्दै रानिआ थायसे थाइगिर फिथाइ जोनोम होबाय । उन्दै रानिआ गावहा
थाइगिर फिथाइसो जोनोम जाबाय साननानै गोसोनि दुखुजों थाइगिर फिथाइखौ
खालायसिमा बारियाव गारहरबाय । नाथाय नुबायजे, सानफ्रोमबो रानिआ खामानि
मावनाय आरो उन्दुनाय समाव बै थाइगिर फिथाइया दुद्रुना फैनानै रानिनि
खाथियाव सौफैयो । रानिया बिखौ रागाजों गारहरोब्लाबो बियो दुद्रुना आरोबाव
रानिनि खाथियाव फैफिनो । सानसेखालि बै थाइगिर फिथाइया सानजौफु समाव
रावबो मानसि दुमसि गैयै समाव दुद्रुना थानानै दैमा गाथोनाव सौहैना बेयाव
दान्दिसे जिरायना दंमोन । बै समाव राजानि सासे राजखुंगुरा मोनसे नुसयै
जायगायाव जनानै बोरसि बोनबाय दंमोन । राजखुंगुरा बे थाइगिर फिथाइखौ
दसे नायबाय थानाय उनाव नुबायजे सासे महरगोसा हिन्जावसा थाइगिर
फिथाइनिफ्राय ओंखारनानै दुगैयै-लोबै, बिनि रुजुथावै जोंखोल देहा आरो
खानायखौ सान्दुंआव लामनानै आरोबाव थाइगिर फिथाइयाव हाबनानै दुद्रु-दुद्रु
बिमानि न'सिम थांफिनबाय । राजानि फिसाज्लाया राजखुंग्रिनि देहानि जोंथि
महर मोखांआव गावखौनो बावगोमाना बिखौ मोननो जावलिया जाना बोदोर-
न'आव हाबना थाहैबाय । ओजोंहाय राजखुंगुरनि बिमा-बिफाया फिसाज्लाखौ
जेरावबो नागिरनानै उनाव बोदोर न'आवसो उन्दुनानै थानाय मोनहैबाय । मा
जादों होनना राजखुंगुरखौ सोंब्ला राजखुंगुरा फिनबायजे “आमखा राजानि
न'आव थाइसे दुद्रुनानै थाबायग्रा थाइगिर फिथाइ दं । बै थाइगिर फिथाइजों
लोगोसे आंखौ हाबा होनांगौ ।” राजा रानिआ गिबियाव बिखौ मिनिथाव जाथावथारै

खामानि होननानै राजखुंगुरखौ बुजायनो हमबाय, नाथाय राजखुंगुरा बिसोरनि बुजायनायखौ खोनासडासै। राजायाबो राजखुंगुरनि बाश्नाखौ एरायनो हायैनि थाइगिर बिफानिसिम बे खौरांखौ हरनानै थाइगिर फिथाइजों गावनि फिसाज्ला राजखुंगुरजों हाबा होनो होननानै मोनसे बिथांखि हरबाय। थाइगिर फिथाइ जोनोम होग्रा रानिया बे बाश्नाखौ खोनानानै गाबै-गाबै बुंनो हमबाय- “नोंसोर आंखौ मानो बिदि लाजिफोनांदों।” नाथाय जोबथारनायाव बिथाइ एरायनो हायैयाव राजानि थांखियाव राजि जानानै थाइगिर फिथाइखौ थुखैयै-लोबै राजखुंगुरजों लोगोसे हाबा होबाय। जोबोर रंजा बाजायै राजखुंगुरा थाइगिर खुंग्रिखौ हाबा खालामनानै दोलायाव दिखांनो गावनि न'आव लाना थांबाय।

राजानि फिसाज्ला राजखुंगुरा हाबानि उनाव थाइगिर खुंग्रिजों मोनसे खथायावनो सानैबो थाबाय। हरआव राजखुंगुरनो जानो थाखाय जा आदार हरो बिनिनो खावसे राजखुंगुरा जायो आरो खावसे दोननानै उन्दुनानै थायो। राजखुंगुरा उन्दुलाडोब्ला थाइगिर फिथाइनिफ्राय थाइगिर खुंग्रिया ओंखारबोनानै बै ओंखाम ओंखिफोरखौ जानानै आरोबाव थाइगिर फिथाइ सिडाव हाबनानै थाहैफिनो। सानफ्रोमबो राजखुंगुरा सिखारना बै आद्रा दोननाय ओंखामखौ नुयैयाव जोबोर गोमोनाय मोनबाय। राजखुंगुरा बे गासैबो बाश्नानि जाहोनखौ मिथिमोनैयाव दुखु गोसो लानानै आमोन-जिमोनै जबाय थायो। सानसेखालि सासे बिबायारि बुरै राजखुंगुरनि खाथियाव माइरं बिनो फैबाय। बुरैया राजखुंगुरखौ आमोन-जिमोन जिंगा सिबानानै जबाय थानायखौ नुनानै सोंबाय- “फिसा, नों मानो जोबोर दुखु गोसोयै जबाय दं ? नों हाबा खालामबाय, नाथाय बहाथो बोरो जोंलाय माथो नोंनि खैनाखौनो नुवाखैसै ?” बुरैनि बाश्नाखौ खोनानानै राजखुंगुरा बिनो गुरिनिफ्राय बिजौसिम गासैबो बाश्नाखौ खिनथाब्ला बुरैया बुंबाय- “फिसा, थाइगिर फिथाइनि सिंआवनो नोंनि राजखुंग्रिया दं, नों मोनसे खामानि माव, उन्दुग्रा खथायाव नों जुजायनि अर सावनानै दोन आरो गायखेर दाखा, आथिया थालिखौ सिप्लेना

गलायनानै मोनसे खुरैयाव खाथियावनो दोन। नों बैसांआव गोग्लैना एरैनो उन्दुलांफलानायनि फाव खालामना गन्थंजों गरदबाय था। नोंखौ उन्दुलांदों साननानै जेब्ला बै थाइगिर फिथाइनिफ्राय राजखुंग्रिया ओंखारनानै ओंखाम जानो ज'गोन अब्ला नों हरखाब सिखारना बै थाइगिर फिथाइखौ जुजायनि अरआव गारसोमनानै हो। अब्ला नों नुगोनजे राजखुंग्रिया लथबनो हायाव गोग्लैलांबाय। अब्ला नों माबार माबारै खुरैनिफ्राय गायखेर दाखा आरो आथिया थालिखौ लाबोनानै बिनि खरआव दासोमना हो, अब्लानो बियो गियान मोनखांनानै सिखारफिनगोन। बुरैनि बाश्चाखौ खोनानानै राजखुंगुरा खुसिजों बिनो बान्था होनानै एगारहरबाय, आरो बे हरावनो बै बुरैया बुंनाय बाश्चा मतैनो राजखुंगुरा थाइगिरखुंग्रिखौ मोननो हानायसै।

राजखुंगुरनि बिमा-बिफाया अखानायै बे जाथाइखौ खोनानानै आरो बिहामजोखौ नुनानै गोसोआव जोबोद रंजानाय मोनबाय। बियाय-बियानि (जामाय-जामायजों) राजा-रानिनोबो बे खुसिनि खौरांखौ खिन्थाहरनाय जाबाय। बिथांमोनाबो गोसोआव रंजानाय मोनबाय आरो राजखुंगुर आरो थायगिर खुंग्रिखौ आरोबाव जोबोर गाजा-गोमजा, रंजा खुसियै हाबा होफिनबाय।



सासे बिबार नेग्रा आरो फांसे बिबार बिफां

सासे बिबार नेग्रा दंमोन। बियो जोबोर जोथोनै बिबार गायदोंमोन। बियो बै बिबारफोरखौ सानफ्रोमबो एसेबां जोथोन लायो, नाथाय थेवबो बारसेबो बिबार बारा। बिनिखायनो बियो दुखुजों सानसेखालि बिबारखौ सोंबाय- “ओ बिबार, ओ बिबार, नों मानो बिबार बारा?”

बिफांआ फिनबाय-

“आंजे बारनांगौ, मोसौआ अब्ला आंनि बिजौखौ मानो जायो?”

अब्ला बिबार नेग्राया मोसौनि खाथियाव थांनानै सोंबाय-

“अह, मोसौ, अह, मोसौ, नों मानो बिबार बिजौखौ जायो?”

मोसौ- “लावखाराजे मोसौ नाया, आं मानो जाया?”

बिबार नेग्रा- “ओह लाउखार, ओह लाउखार, नों मानो मोसौ नाया?”

लाउखार- “ओंखाम संग्रायाजे आंनो ओंखाम होआ, आं मानो नायनो?”

नेग्रा- “ओह, ओंखाम संग्रा, ओह ओंखाम संग्रा, नों मानो ओंखाम होआ?”

ओंखाम संग्रा- “बन दानग्राया जे बन होफैया, आं मानो होनो?”

नेग्रा- “ओह बन दानग्रा, ओह बन दानग्रा, नों मानो बन होफैया?”

बन दानग्रा- “खामाराजे रुवा हरा आं मानो होफैनो?”

नेग्रा- “अह खामार, अह खामार, नों रुवा मानो हरा?”

खामार- “हांगार हरग्रायाजे हांगार हरा, आं माबोरै हरनो?”

नेग्रा- “अह, हांगार हरग्रा, अह हांगार हरग्रा, नों मानो हांगार हरा?”

हांगार हरग्रा- “आंजे हांगार हरनांगौ जोमैया मानो सोगोमो?”

नेग्रा- “ओह जोमै, ओह जोमै, नों मानो अखा हरो?”

जोमै- “एम्बुआजे अखा लिंहरो आं मानो हाया?”

नेग्रा- “ओह एम्बु, ओह एम्बु, नों मानो अखा लिंहरो?”

एम्बु- “आबै-आबौनि नेमखान्थिखौ आं मानो गारनो?”



नोमलिया फिसा

सानै बोराइ-बुरै दंमोन। बोराइ बैसोआव बिसोरहा सासे फिसाज्ला जोनोम जाबाय। बोराइया सिन्ता खालामै खालामै फिसाज्लानि मुंखौ मा दोननो नागिरनानै मोनासै, बिनिखायनो गनगजों नायनानै दोननो साननानै सासे गनगनि न'आव थांबाय। गनगआ बोराइजों राइज्लाय-होनज्लाय, बिनि बोराइ बैसोआव जानाय आरो नोमलिया फिसाज्ला जानायखाय बिनि मुंखौ नोमल दोनबाय।

बोराइया गनगनो फालि गांसे आरो गामसा गांसे होना मुंखौ लानानै न'आव गिदिंबोफिनबाय। लामाजों फैबाय थानाय समाव बोराइया मुंखौ बोरैबा बावगारनो हागौ साननानै 'नोमल', 'नोमल' होननानै आवरायबोबाय थाबाय। फैनायावनो फैनायावनो लासै-लासै बिहा गोरोन्थि जानानै 'नोमल'नि जायगायाव 'नेमेल', 'नेमेल' आवरायबोनो हमबाय। बियो थांनाय समाव मोनसे दैमा सेरजों थांदोंमोन। बै दैमायाव सासे सदागरा नाव खाबाय दंमोन। बोराइया फैयै-फैयै सदागरनि नावनि खाथि-खाथि सफैब्ला सदागरा गावनि नावखौ एगारनो नावरियाफोरखौ हुकुम होबाय। नावरियाफोरा नावनि खुन्थियाफोरखौ फुनानै नावखौ जावनो लानाय समावनो 'नेमेल नेमेल' होननानै आवरायलांबाय थानाय बोराइनि रावखौ खोनानानै सदागरखौ सोरबा सासेया बुंबाय- “आफा, बहानिबा सासे बोराइ जोंखौ नाव एगारनो हाखो होदों।” नावरियाफोरनि बाथ्राखौ खोनानानै सदागरा बोराइखौ लिंना लांहोनानै बियो मानो नाव जावनो हाखो (हेंथा) होदों बोराइखौ सोंबाय। बोराइया सदागरनि बाथ्राखौ खोनानानै फिन होयोब्ला बाथ्रा राइज्लायनायावनो जिदु मुंखौ बावगारो बेखौनो साननानै बोराइया जेबो फिन होआबासिनो खालि 'नेमेल', 'नेमेल' बुंबाय थानो हमबाय। सदागरा रागा जोंखांबाय, बियो साननो हमबाय- “इस राम बेयाव दिनै एसेबां सान थांबाय, दिनै दिन-बार नायनानै नावखौ एगारनो हुकुम होबाय, बे बहानि पापिथिया बोराइया फैनानै आंनि जात्राखौ हेंथा होफैदों। एइ बेखौ हम।” बिदि बुंनानै सदागरा नावरियाफोरखौ लगायना होनानै बोराइखौ मोजाडैनो फनैसो

होहोबाय । बुजानानै बोराइया 'नेमेल'खौ बावगारना 'जानाय नड', 'जानाय नड' होननानै बुंनो हमबाय । बोराइया बिदिनो 'जानाय नड' बुंनानै थांगासिनो दं, थिग बे समावनो लामाजों मोजाडै साखोन-सिखोन हि गाननानै फैबाय थानाय मानसि सासे लोगो मोनबाय । मानसिया बोराइन 'जानाय नड' बाथ्राखौ खोनानानै साखोन-सिखोन देलायना हि गानबोनायखायनो बोराइया बिखौ बिदि बुंनानै मिनिदों । बेखौनो साननानै बियो बिनि आखाइयाव थानाय लावथिजों बोराइखौ मोजाडैनो फंनैसो बाहोबाय । बोराइया लावथिजों बुजानानै 'जानाय नड'नि जायगायाव 'बैनिखुइबो बिसो बांसिन' होननानै बुंलांबाय थानो हमबाय । बे समावनो बोराइन सिगांजों सानै गोदोना गिदिर मानसि थांगासिनो दंमोन, बिसोरो सानबाय बोराइया बिसोरनि गिदिर गोदोनाखौ नुनानै बिसोरखौ मिनिदों । बेखौनो साननानै बिसोरो रागा जोंनानै बोराइखौ फंनैसो सौसिन-सौसिन लोरला खालामबाय । सौजानानै बोराइया जेनथेन मानबाय-मानबाय न'आव सौहैबाय । न' सौहैनानै बियो बुरैनो लामायाव मोनबोनाय खैफोदनि बाथ्राखौ बेखेवनानै खिनथाबाय । बाथ्राखौ खोनानानै बुरैया दुखुमोनफानायखौ फोरमायना बुंबाय- "दे जा जाबाय जालांबाय, दानिया गनगआ खिन्थाहरनाय मुंखौ बुंनायसाय?" बोराइया बुंबाय- "सौजानाय बुजानायनि ताबावनो आंनि गोसोनिफ्राय नाम-साम गासैबो गलांजोबबाय ।

बोराइन बाथ्राखौ खोनानानै बुरैया बुंबाय- "बावबायबालाय बावबायसै, माथो खालामनो । गथ'नि मुंखौ दोननायाबो जाबाय आरो होमब्लालाय, दा जोंहा हाखौसो गायनो लाहार फाहार खालामदो । बारि खनानि दब्लायसेखौबो नोमलियायैबाबो गायनो खोथिया फोहैदो थां । "नोमलियायै", बुंनाय रावखौ खोनानानै बोराइया फिसाज्लानि मुंखौ गोसोआव फैगारबाय । बोराइया अब्ला रागाजों जेबो गैया जाना बुरैखौ बुंबाय- "जिदु नों, गथ'नि मुंखौ मिथिखागौआनो मानो आंखौ एरैनो बुजाहोगारखो?" बाथ्राखौ बुंनानै बोराइया बुरैनि बिखुंआव थाइगिर फिथाइ सिरिहोबाय ।

बिनि उनाव बोराइ बुरैया फिसाज्लानि मुंखौ 'नोमल' दोनना आरामै जायै लोडै राइजो जाबाय । जोंबो न'आव फैबाय ।



मासे सिंग्रा नानि सल'

सानसेखालि सासे निखावरि मानसिया जेखायजों ना गुरनो थानानै सानसे थाल्ला जेखाय गुरबाय थासेयावबो नाथाय मासेल' सिंग्रानानि अनगायै बियो गुबुन जेबो ना मोनासै। उनाव बियो नाखौ न'आव लाबोनानै जानो सानना नाखौ सायनो नागिरबा नाया बुंबाय- “आदा आं सिंग्रा नानि राजा, नों आंखौ जानो नाछ, आं सानफ्रोमबो नोंनि मोसौखौ नायबाय थागोन।” मानसिया सिंग्रानानि बाथ्राखौ खोनानानै बिखौ जायाबासिनो, अखानायै सानजौफुआव जाहोखां लोंहोखां बिखौ मोसौ गुमनो एगार हरबाय। सिंग्राया मोसौनि खिथुआव ज'नानै गावनि खुगानि सुजों थुयै-थुयै मोसौफोरखौ फोथाराव गुमनो होनानै लांबाय। बेबादिनो गोबां सान थांबाय। सानसेखालि सिंग्राया मोसौखौ हाग्रायाव गुमनो होनना होलांनानै नुबायजे मासे राक्षसआ बिसोरखौ जानो खुगा हां-हां सिना दं। राक्षसआ गोसोनि खुसिजों मोसौखौ जानो होनना होसोलांब्ला सिंग्राया हेंथा होनानै बुंबाय- “ओइ राक्षस, र' र', नों आंखौ नुवाखै नामा? नों जिदु आंखौ बोलोजों हायोब्लासो, नों आंनि मोसौखौ दां नडबोला नों दिनै ग'वा।” राक्षसआ सिंग्रानि थिफुदलाला देरगानायखौ नुनानै खे-खे मिनिनो हमबाय, बिखौ खनसे लागैनो हमना सेखेबनो सानना हमनायावनो सिंग्राया गावनि बिस सुजों राक्षसनि आखाइयाव सुनानै होबाय। अब्ला राक्षसआ सें-सें आलौनाय आरो सानायजों होसिखावना सहायनो हायै जाना बुंबाय- “नोंनो जा नांगौ आं बेखौनो होगोन, नों आंखौ एगारदो।” राक्षसआ बिदि बुंब्ला सिंग्राया बुंबाय- “जिदु नोंखौ एगारनांगौ नों आंनो मा होनो सिगाडवनो हर।” राक्षसआ गावनि उदैनिफ्राय मोनसे स'नानि आसथाम दिहुनना होनानै बुंबाय- “बे आसथामखौ थालिर बिलाइयाव लानानै मोजाडै खुलुमना आर'ज गाबोब्ला आसथामनि गुनआव नोंनि न'-बां गासैबो स'नानि जाजोबगोन आरो नख'रा स'ना रुफाजोंनो बुंजोबगोन।” सिंग्राया राक्षसनि बे बाथ्राखौ खोनानानै मोसौखौ होयै होयै न'आव फैफिनबाय। न'आव सफैनानै बियो नख'र बिगोमानि आखाइयाव आसथामखौ होनानै गासैबो बाथ्राखौ बुजाय-आजाय होनायाव बिगोमाया गोसोआव खुसि

बुरै आबैनि सल'

मोनबाय । बियो सिंग्राया बुंनायबादि आसथामखौ मोनसे थालिर बिलाइयाव
दोननानै जोथोनै खुलुमब्ला बिनि न'-बां गासिबो स'नानि जाजोबबाय । आरो
स'ना-रुफाजोनो बिनि न'आ आबुं जाबाय । बिगोमाया अब्ला सिंग्राजों गावनि
फिसाजोखौ गय-फाथै होनानै हाबा होबाय । बिदिनो गोबां सान बारलांबाय ।
सानसेखालि सिंग्राया सिरि-सिरि दैमा गाथोनाव सख्लाखौ दोननानै मानसि
जाना दुगैबाय थानाय समावनो सिंग्रानि बिसिया नुना हाखु दाखुयै सख्लाखौ
लाबोना अरआव सावब्ला सिंग्राया नानिफ्राय सासे समायना हौवा मानसि
जाबाय । अब्लानिफ्रायनो बिसोर जोबोर खुसिजों आलो गोजोनै राइजो जानो
हमनायसै ।

उखुमाव बाबाय फेसा
गयनि बिबाराबो बारबाय
आंनि सल'नि बाश्राया नंखाय ।
सोर बबेयाव थानो थां ।



The End